

宜春縣志

70250.89
38
12



宜春縣志卷一

地理志

周禮職方氏掌天下土地之圖與其人民九穀六畜之數保章氏以星土辨九州之地所封封域皆有分星以觀妖祥關係綦重矣宜春地居豫章上游凡星野之占應疆域之延袤山川水利之滋培與夫風俗之相沿物產之所出按籍而稽瞭如指掌食毛踐土者疇不瀟瀟於

熙朝之樂利歟

星野

宜春縣志

卷一

地理 星野

星紀斗牽牛也

爾雅釋天

斗牽牛者日月五星之所終始故謂之星紀

郭景純爾雅注

周時冬至日在牽牛為星紀之中則斗值星紀之初用是為十二次紀首故曰星紀然唐虞冬至日在虛為元枵正中不在斗牽牛也十二次之名蓋定自周人自元以來冬至日在箕為析木之津正中

邵二雲爾雅正義

按新唐書地理志袁州為星紀分于大吉天文祕訣袁州為吳越之分則以十二次言之袁州當在星紀之次

分野畧例云自南斗十二度至須女七度於辰在丑為星



紀 邵二雲爾雅正義

吳地斗分野也今之會稽九江丹陽豫章廬江廣陵六安

臨淮郡盡吳分 漢書地理志

南昌饒州廣信南康建昌撫州臨江吉安瑞州袁州贛州

南安天文斗分野九江天文斗牛分野 明一統志

按據此則江西十三府皆揚州之域於辰在丑分野

主斗惟九江兼斗牛故王子安滕王閣序龍光射斗

牛之墟至黃山谷道院賦則云勾吳之區為斗所直

以二十八宿言之袁州自以專主斗為是府志又云

吳分長沙立安成都晉以安成屬荊州袁州一郡獨

宜春縣志

卷一

地理 星野

二

兼翼軫之分誤矣

北方南斗六星南星者魁星也北星杓也石申曰魁第一

主吳二會稽三丹陽四豫章五廬江六九江 宋史天文志

按據此則以南斗言之袁州當占第四星

又按袁州分野屬斗固矣至入度之淺深則必星紀

之度確而後豫章入斗之度可得而核豫章入斗之

度確而後袁州入斗之度可得而核也今考星紀度

數漢志引黃帝分星次起斗十一度至女七度蔡邕

起斗六度至女二度費直起斗十度至女五度晉志

起斗十二度至女七度唐書起斗九度至女四度元

郭守敬起斗三度終女二度訖無定說伏讀

御製後編新法自箕一度九分至斗二十二度十三分爲丑

度牽牛星與星紀無涉星紀之度確矣而豫章入斗

之度有歧說焉晉書天文志云豫章入斗十度筠志

云豫章起斗十二度六分終十六度六分有奇東鄉

志據西士論云豫章入斗七度通志論又云南昌入

斗八度袁州入斗四度夫同一省垣而度數互相牴

牾且袁城與萍萬二邑較省偏西祇近一度分宜較

省偏西僅十分約四而四度至八度更覺徑庭善乎

郭堯京石城志論云一宿中星躔度數必且豆剖瓜

宜春縣志

卷一

地理 星野

三

分譬不異以髮屬心鬚屬腎遂一鬚必求一鬚之水

源於腎一髮必求一髮之火種於心微乎微難之矣

天道甚遠銖量黍較慎母以欲密者而反疏也

分野之妖祥主用客星蓋字之氣爲象鄭康成周官注

春秋緯文耀鉤云布度定紀分州繫象蒙山以東至南江

會稽震澤徐揚之州屬權星賈公彥周官正義

按此以九州屬北斗也星有七州有九充青徐揚並

屬故也則以北斗七星言之袁州故隸揚當屬權星

星經曰熒惑主霍山揚州荊州交州又曰辰星主斗牛女

虛危室壁後漢書天文志

按據此則以五星言之袁州次當辰星占熒惑
又按歷代所占豫章應斗者十之五六應牛者十之
二三翼軫無之袁州之占屢驗於斗如梁大同五年
彗出南斗占應劉敬躬陳天嘉四年太白入南斗占
應安成王宋乾道二年月入斗又犯權星占應夏皇
后元至正十一年太陰犯斗占應徐壽輝確鑿可據
今惟以南斗中之第四星爲主而北斗之權星及五
曜之熒惑星以次附焉其餘如上台下星天市垣東
藩第六星十二國越星五車司空星皆不具載

疆域 鄉畝附

袁州府轄縣四宜春附郭東界分宜袁家渡接壤臨江府之新喻計程

一百里西界萍鄉插嶺關接壤長沙府之醴陵計程二百里南界宜春瀾

富嶺接壤吉安府之安福計程六十里北界萬載穀皮嶺接壤南昌府之義甯州計

程二百七十里東南界分宜迎塘嶺接壤吉安府之廬陵計程一百二十里東北

界萬載連昌嶺接壤瑞州府之新昌計程一百四十里西南界萍鄉雙塘

接壤長沙府之攸縣計程二百六十里西北界萬載峯子嶺接壤長沙府之瀏陽計程

二百二十里通計衡三百里縱三百三十里至省五百里

本縣東連分宜以合山為界計程四十里西連萍鄉以黃廟堂

為界計程五十里南連吉安府之安福以仰峯為界計程六十里

宜春縣志 卷一

地理 疆域

北連萬載以亂石嶺為界計程六十五里東南連吉安府之安

福以瀾富嶺為界計程六十里西南連吉安府之安福以唐

佳山為界計程七十里東北連萬載以東山為界計程八十里西

北連萍鄉以桐木嶺為界計程一百二十里通計衡九十里縱

一百二十五里

明洪武二年以宜春為首邑與分萍萬三縣隸袁州府

國朝因之康熙三年編柴拾貳里轄壹百伍拾畝統以四

隅四廂一十四鄉二十二年均畝簽盛補衰改為一十

三鄉四隅四廂增新開里畝共壹百肆拾叁畝

城內四隅 轄捌畝

東隅壹箇 西隅壹箇 南隅壹箇 北隅壹箇
城外四廂轄陸箇

東外廂壹箇 西外廂壹箇 南外廂壹箇 北外廂壹箇

詔仁鄉城東之南五里橫貳拾里縱貳十五里東界歸化西界東外廂南界集雲北界信義轄六箇

欽賢里壹箇 大安里一箇 合興里壹箇 茂才里二箇

壹箇 永盛里壹箇

歸化鄉城東二十五里橫三十里縱二十餘里東南界分宜西界詔仁北界信義轄九箇 湖溪里

一箇 湖溪里三箇 宜化里一箇 正平里一箇

大康里壹箇 洪經里壹箇

化南鄉城西十里橫三十里縱四十里東界信義西界薦外石外南界修仁北界化北轄八箇 善東

宜春縣志

卷一

地理 疆域

二

一箇 善東三箇 善西一箇 南東箇 南西箇

貴東箇 貴西箇

薦裏鄉城西七十五里橫三十里縱五十里東界薦外西界萍鄉石裏南界萍鄉北界石外轄六箇

片一三箇 片二箇 片四箇 片五箇 片六箇

片七箇

薦外鄉城西三十里橫二十五里縱五十里東界化南西界薦裏萍鄉南界修仁北界化南石外轄十箇

福上里一箇 福中里一箇 二十福里一箇 十九

福里壹箇 再興里一箇 長平里一箇 常安里一

箇

石裏鄉城北迤西八十里橫四十里縱六十里東界化北石外西界瀏陽萍鄉南界薦裏北界萬載轄十箇

大一畝 大二一畝 大三四畝 大五畝 勝東畝

勝西二畝 大六畝

石外鄉 城西北六十里橫四十里縱六十五里東界化南
西界薦裏石裡南界薦外北界化北轄十三畝

神東里一畝 神西里一畝 神西里三畝 長上里

一畝 長中里一里 長下里一畝 大上里一畝

大下里一畝 大下里三畝

修仁鄉 城西南五里橫二十里縱六十五里東界西外廂
西界萍鄉南界集雲安福北界薦外轄十三畝

安豐一畝 安豐三畝 奉化一畝 奉化三畝 温

湯一畝 修仁一畝 修仁二畝 名得畝 勸善畝

福昌畝

宜春縣志 卷一 地理 疆域 三

集雲鄉 城南十里橫二十五里縱五十里東界詔仁
西界修仁南界安福北界詔仁轄十五畝 八

宣南一畝 九宣南畝 九加南一畝 十加南畝

十加北畝 建義里畝 宣北畝 親仁里畝 懷仁

里畝 宣東畝 宣西一畝 宣南畝

以上宣西等三畝是乾隆年間添開無轄地皆寄居

各鄉

信義鄉 城東北五里橫三十五里縱二十五里東界分宜
西界化南化北南界北外廂北界遷喬轄九畝

禮成里一畝 禮成里二畝 禮成里三四畝 禮成

三五畝 得南里一畝 大得北畝 小得北畝 懷

甯畝

遷喬鄉 城北二十里橫二十五里縱三十五里東界善和鄉西界化北南界信義北界萬載轄九箇 醴

泉里一四箇 醴泉二三箇 顯親里 一箇 顯親里 二箇

三箇 興東箇 顯興箇 甘泉箇 醴泉一箇

善和鄉 城北迤東三十五里橫縱各三十五里東界分宜南界遷喬西界萬載北界上高轄九箇 歸

德里 一箇 陽東里 一箇 安樂里安上箇 安樂里 二箇

安下箇 陽西里箇 興甯箇 名教里箇

化北鄉 城北三十里橫四十里縱三十里東界遷喬西界石裏南界化南北界萬載轄十二箇 信

東 一箇 信西 一箇 信西三箇 興東 一箇 興西 二箇

一箇 興西 二箇 東西 一箇

附載乾隆六十年棚民鍾朝元羅世南等妄開大七

宜春縣志

卷一

地理 疆域

四

勝北二箇 贛縣申詳生員陳大器等具控至嘉慶二

年府憲提訊詳奉藩憲會同臬憲轉詳撫憲批飭註

銷一案

府詳

署袁州府林為無籍開箇地深棚患抄叩吊銷事嘉慶元年八月初三日奉憲臺牌開嘉慶元年七月十三日奉巡撫部院陳批據宜春縣生員陳大器余開英彭斌民人李福魁李允洲抱告彭嘉祥等具呈前事詞稱生鄉原額十箇何待異氓湊補客戶輸糧客箇棚長催完豈必另立開補雖前經開補從無客戶混跡詎有異棍鍾朝元羅世南高文祿陳睿政余成章會亮達黃遠興等七人無一廬墓田戶可據籍且全無何來庠捐考試乃於生鄉另開大七勝北兩箇懸造箇册預立十遞議約候招異類以實之生鄉地界邊疆直楚橫連萍萬慈化桐木一帶康熙甲寅棚寇賴文武公祖撲勦驅逐棚戶勒碑垂戒志載慘目抄呈開此兩箇任從招集

棚匪祇須認作箇中人前監寒心何但混冒考試不由
新頒呈明入籍之例學院按臨生等公稟批仰袁州府
卽按例確查詳報府轉行縣書蔽擱抄叩大人俯念
邊疆慎重迅賞查核吊銷提究蔽書上告奉撫部院批
是否違例開尚無混冒考試既據控經學部院批府
查詳因何延擱不辦仰布政司會同按察司卽飭袁州
府迅速確查詳報毋任延訟抄粘並發等因奉此除移
臬司外合就檄行爲此仰府立卽遵照將陳大器等詞
控情節迅速確查妥議詳報併詳臬司以憑會轉毋任
延訟干咎等因查此案先據生員陳大器余開英彭斌
民人李福魁袁景川彭嘉祥黃文龍周志茂盧揚盛譚
子愛陳廷桂萬逢興李九洲吳森茂赴府控前情同併
奉前學憲鄒檄據生員陳大器等以無籍開尚抄案卽
察事具控鍾朝元等假以急公齊糧登縣開尚冒考等
情飭卽嚴催詳覆在案又據宜春知縣黃河清查明檢
舉事竊卑縣石裡鄉原立十箇前據鍾朝元高文祿以
丁糧繁盛糧難催齊稟請另開大七箇編立十甲以俾
糧賦早齊等情又據羅世南曾亮達等亦以前情稟於
石裡鄉開補勝比箇編立十甲卑縣以事關錢糧詳奉
前署藩憲司馬批准在案前訪查鍾朝元原籍贛州住

宜春縣志

卷一

地理 疆域

居卑縣石外鄉羅世南原籍廣東住居卑縣薦裡鄉既
未存石裡鄉居住乃混請開尚雖現無冒考情事恐其
將來藉有稟請詳准開尚之案在宜混行冒考亦不可
不防其弊卑職不敢以從前詳准有案自相迴護理合
據實檢舉詳請轉奉藩憲將從前詳准開尚之大七勝
北俯賜註銷以免冒考之弊等情卽應當經前陞府檄
提人卷解訊去後因人証未到旋值卸事未及審詳茲
卑府抵任查卷飭提去後今據宜春縣申稱此案因人
証外出未齊致稽解審茲催差帶訊內除原告吳森茂
被告余成章外未出到外餘俱帶齊理合據解等情到
府卽據兩造訊供除取結附卷外該署袁州府知府九
江府判林審得宜春縣生員陳大器等上控鍾朝元等
混冒開尚一案緣鍾朝元原籍贛州住居宜春縣石外
鄉在該鄉置有田產羅世南原籍廣東住居宜春縣薦
裡鄉亦於該鄉置有產業俱欲爲子孫將來在宜考試
之計赴縣稟請開尚希箇立案可免攻冒因石外薦裡
二鄉錢糧無多恐難批准隨以石裡鄉丁糧繁盛錢糧
雜催等詞赴縣稟請另開大七勝北兩箇併請邀高文
祿等五人於呈內列名該縣以事關錢糧據情詳奉前
署藩憲司馬批准在案石裡鄉生員陳大器等查知鍾

朝元等既不在該鄉居住乃稟縣混請開置恐藉此入籍冒考先赴前錢陞府任內控准復赴撫學兩院具控奉飭查報並據該縣查明前事自行檢舉請將從前詳准之案轉請註銷等情經前陞府飭提審在後因人証未齊致稽解詳茲卑府催縣解齊訊悉前情查入籍考試例應呈明詳請鍾朝元原籍贛州羅世南原籍廣東因在宜邑置有田產欲將來子孫可以在宜考試之計乃赴縣混請開置立案以免攻冒雖現無冒考之事但以此取巧圖考殊屬不合至石裡鄉已編立十畝本可無庸開置各錢糧向來各戶依限完納並無難催且住居別鄉之人於此鄉首請開置亦難據以立案所有從前鍾朝元等混請開置之案應請註銷以杜混冒該縣黃河清並不查明率詳既據自行檢舉請免置議是

冊者

會詳

藩憲批仰候會轉另檄飭遵仍候學憲臬司批示繳

宜春縣志

卷一

地理 疆域

該本司等會查得宜春縣生員陳大器等上控鍾朝元等混冒開置一案鍾朝元原籍贛州居住宜春縣石裡鄉在該鄉置有田產羅世南原籍廣東居住宜春縣石裡鄉亦於該鄉置有田產俱欲為子孫將來在宜考試之計赴縣稟請開置希冀立案可免攻冒因石外薦裡二鄉錢糧無多恐難批准隨以石裡鄉丁糧繁盛錢糧難催等語赴縣稟請另開大七勝北兩畝并請遷高文祿等五人於呈內列名該縣以事關錢糧據情詳開當經前司馬署司批准在案石裡鄉生員陳大器余開英彭斌等查知鍾朝元等既不在該鄉居住乃稟縣混請開置恐藉此入籍冒考先赴前錢陞府任內控准復赴憲轅具控批司會同飭府確查詳報等因茲據袁州府審詳前來本司等復查鍾朝元原籍贛州羅世南原籍廣東因在宜置有田產欲為子孫將來可以在宜考試之計乃赴縣混請開置立案以免攻冒雖現無冒考之事但以此取巧圖考殊屬不合至石裡鄉已編立十畝本可毋庸再行開置各畝錢糧向來各戶依限完納並非難催且住居別鄉之人於此鄉混請開置亦難據以立案所有從前鍾朝元等混請開置之案應請該府所議註銷該縣黃河清從前並不查明率詳今據

自行檢舉請免置議是否允協合將查議緣由另會文詳請

憲臺查核批示飭遵
巡撫部院張 批如詳飭遵繳原詞存

布政司萬 為無籍開崗等事本年七月十六日奉
巡撫部院步 批本司會同臬司議詳宜春縣生員陳大

器等控鐘朝元等混冒開崗一案緣由如詳飭遵繳原
詞存等因奉此合就抄看飭行爲此仰府即便轉行該

縣查照抄看內事理無違須牌嘉慶二年七月二十三
日行

署袁州府正堂加三級紀錄五次林 為無籍開崗等
事本年七月二十三日奉

布政使司萬牌開爲無籍開崗等因爲此合就抄看轉
飭牌仰該縣文到立即遵照抄看內事理即將大七勝

北兩崗註銷無違須牌嘉慶二年七月二十六日行
道光二十二年三月二十一日合邑紳士因客籍開崗

具稟
縣憲王 為稟懇批銷免裁勾跨事宜邑客居來自康熙年初耕
蘇生活稱爲蘇棚令其春來冬去後因客民朱益吾滋

宜春縣志

卷一

地理 疆域

七

事設立煙册册尾嚴造某省人氏原杜勾跨諸弊客稱
錢糧拖欠因此立圖不思錢糧南米舊章確據民客惡

無拖欠乾隆間有客民開立大七勝北二崗業經訟斷
除銷各憲有案永不准開今冷灰復熾歛錢舞雙開立

名崗十五姓不勝數切保甲因地而設倘任遷開土客
何別查客詞捐考隨錢糧廬墓攸定等語陽假錢糧拖

欠名色陰裁勾引跨考張本將來以姓冒姓不惟鄰府
鄰縣卽外省府縣呼朋引類通弊莫絕何能查其確切

稟請 文廉迅懇卽日批示吊銷現立賦册免釀巨禍
合邑清恩上告

批據客民稟請立首係爲依限齊糧起見是以准其
立崗並批飭捐考仍照舊章是與捐考並不相涉本

縣豈能任其陰裁勾跨今既據呈稱乾隆年間曾有
客民開立大七勝北二崗經訟除銷等情自屬爲杜

弊起見准將所立客崗一併銷除可也
二十二年二日 上午續詞

爲串客舞弊迅懇徹究事昨以稟懇批銷免裁勾跨等
情具稟客戶一案奉批既據呈稱乾隆年間曾有客民

開立大七勝北二崗經訟除銷等情自屬爲杜弊起見
准將所立客崗一併銷除可也推原其故由蠹書樂正

聲溫良達吳作霖曾至道羅以南卓成山羅朝植黃中
理施步恩末世輝等兜金肥已勾引花戶六百餘姓擅
開新衙十五外另立東西南北二鄉架驀廉聰以為
勾跨諸樊張本情難啞忍迅懇當堂吊册塗銷併將盡
等徹底根究永杜濫冒合邑沾恩上告

批客戶册業已塗銷其戶書如何勾引客戶舞
候嚴究確情懲辦

二十三日控縣續詞

為沐恩剪獎懇批勒石永垂不朽事查宜邑客民來
自康熙年初耕蘇生活令其冬去春來後因客民朱
益吾滋事設立烟册飭令民籍各邑輪備保甲嚴造
某省人氏編立册尾杜勾跨諸獎至乾隆年間有客
民開立大七勝北二邑久經訟斷除銷永不准開現
存各憲有案今冷灰復燃遭盡書樂正聲等兜金肥
已發串客民六百姓擅開東西南北二鄉新衙十五
另立議賦總册架驀廉聰業經迭稟各憲批發在
案併將戶書懲革獎册銷除仍照舊章推原其故皆
因客籍充當書吏勾引滋獎茲奉剪除再懇賜批示
嗣後不准復開衙甲及承充各書房吏以便勒石不

宜春縣志

卷一

朽世沾鴻恩上稟

批查客民應納糧銀照舊征收業已節次批示併
將衙册塗銷其捐考一節上年據客民具稟之時
亦經批示仍照舊章在案本已均可勒石何至復
開衙甲今既據呈請批示着即遵照立石可也至
造辦客民衙册之經書羅以南吳作霖業經革除
其餘並非經手之人已訊釋矣

三月二十二日

合邑又以狡申舞獎懇飭銷究事具稟府憲沈沐批
仰宜春縣將所立客衙先行消除並提承究處具覆等
論在案至四月初八日客民馮隆興等以地棍擾害叩
拘訊究事瀆府奉府批此案前據舉人柳成傑等
以客籍人民止淮烟戶册尾開造姓氏經訟有案被戶
書樂正聲等朦縣開立新衙等情控經本府批縣將所
立客衙銷除並提承究處具覆在案客民不准開衙從
前詳定有案爾等在縣請立新衙自應銷除毋庸越訟

續刊客民南京上控委員蔣會同訊結詳文併各

憲批詳

為札飭會委查辦事道光二十三年十一月十三日奉
藩司轉奉 憲臺批宜春縣客民曾光堯等控湯邦才
等阻撓朦稟銷除畝甲糾眾開考等情一家奉批客戶
另立畝甲有無滋弊空碍自應由地方官體察與情秉
公議斷該疎棚客戶曾光堯等請編畝甲以便征輸兩
府縣議詳則謂詭寄跨考弊從此起空碍難行惟據查
客民僅止四十餘戶糧止二十餘兩與該客民詞稱戶
糧俱有千餘多寡懸殊又該縣童試有因此罷考之案
作何究辦亦未聲明均未便顛預了事仰江西布政司
遴委賢員會同袁州府確查客民戶糧究有若干應否
編立畝甲妥議詳請立案並將罷考之案嚴行查究詳
辦免再滋生事端抄粘並發等因並奉藩司札委卑職
啟教馳赴會同查辦等因奉此計抄發控詞一紙內開
告狀人曾光堯等年不一歲係江西袁州府宜春縣為
稟明事切事不關課猶可罷手惡不糾眾尙可不誅身
等皆屬客畝催征錢糧因糧及千餘兩戶及千餘戶畝
未編甲未立星散各戶得以逃糧累及前之承催賠墊
有剗肉醫瘡之嘆卽今身等承催有瘡滿於肉之苦前
歲身等各鄉哭叩縣階願請編畝立甲明准立案仰見
上裕課賦下甦民困詎料土豪湯邦才勢惡柳成傑於

宜春縣志

卷一

地理 疆域

九

縣試大典勢惡土豪糾眾阻撓登時罷考卽時塗銷復
又紛紛連名赴府狡訟身等是以上控各大憲皆奉批
府詳覆今讀府通詳身等皆為淚下陷及哭訴無門可
隣客畝千餘戶府詳四十餘戶客畝千餘糧府載二十
餘兩其詳若此皆柳成傑勢壓府主顯詳之靈也故將
糾眾罷考置若不聞徧將當日開大七勝北各憲不准
為詞查當口開大七勝北因爭地界非為錢糧其不准
也斷之以情卽如朱益吾滋事皆由無畝甲良善客民
無從察而攻之決之以理若謂康熙年間祇准客民烟
戶册尾身等開畝自乾隆初年今請編畝立甲是為錢
糧星散並非爭地界與考之事若有窒碍身等皆有應
得糾眾罷考若干律文柳等罪有應誅錄卷粘結奔叩
大憲大人作主賞准卽飭編畝立甲千萬課賦得以俱
併而催頭免受賠累千萬人客民沾恩上告 被告柳
成傑等遵卽東裝馳詣袁郡會同府卷查原詳內開道
光二十二年六月二十四日奉
撫憲批宜春縣民人馮龍興等具控詞稱竊客籍例載
三十年置有田產印契投稅准其入籍與土著民人無
異民等來自康熙年間至乾隆四年置產呈明立畝有
案在昔糧少戶單未設畝規於今人煙繁盛花戶千餘

家糧銀千餘兩散居十三鄉每屆征收銀米有拖欠之
憂催頭有賠累之苦立旨專責劣衿拂愆把持民等去
臘復稟縣主批准具詳立案被地棍湯邦才等拂詐串
衿柳成傑等朦稟府憲捏立新旨率請批銷泣思民等
來自康熙起自乾隆按旨完納相安已久今僅按旨編
甲便於催征且設有不非法匪徒奉官稽查頭甲長有
專責成是旨甲在在均關緊要並無窒碍棍衿事不干
已而不把持於興起之昔年拂愆挺身捏情控擾於今
日與自縣主滅由衿棍叩乞藩憲未沐憐提粘卷糧單
號叩

大人鑒空衡平俯賜電察飭縣查照原案申詳頂祝上
告 被告湯邦才等奉批該民人等在縣呈請按旨編
甲如果僅為催征錢糧起見別無窒碍柳成傑等何以
稟府飭銷仰袁州府查明詳覆察奪詞粘並發等因奉
此遵查此案先於本年三月初後因客民朱益吾滋事設立
宜邑客居來自康熙年內據舉人柳成傑等呈稱
烟册册尾嚴造某省八氏原杜勾跨諸弊至乾隆年間
有客民開立大七勝北二箇外經詞斷除銷有案今縣
戶書樂正聲等狡串客戶擅開新箇懇請飭究吊銷等
情當經卑府以客籍人民既止准烟戶册尾開造姓氏
地理 疆域

宜春縣志

卷一

經訟有案批飭將所立客箇先行吊銷並提承究處具
覆詞據馮龍興等以伊等去臘稟縣批准立箇編甲被
湯邦才等借端阻撓等情具控又經卑府查案批斥又
查乾隆五十七八及六十等年據客民吳會揚黃上育
劉紹一羅世南等各以伊等祖父在治置業立戶客箇
久經宜邑輸糧應考奈因客箇未經編甲以致糧難早
齊邀集現有田糧廬墓及已經入庠捐考人等請各在
集雲鄉開立宜西宜南各箇並石裡鄉開立大七勝北
各箇編立議約輸糧各等情先後由縣詳奉各前藩司
批准在案又查嘉慶五年六月內據客民鍾萬昌李萬
高等各以客箇編甲另立催糧等情呈奉仰前藩司批
府飭縣確查妥辦具覆據該前縣方令議請客籍不准
自行編甲另立催糧客箇由府詳奉批飭遵照辦在案
奉批前因遵卽檄提卷宗去後茲據該署縣申解前來
卷查道光二十一年三月間據客民葉光顯等呈稱伊
等客箇十有三鄉一鄉卽一箇花戶住址星散因未編
立箇甲錢糧屢有拖欠懇請設立箇名編立十甲等情
經該前署縣林令以客箇編立十甲以便催納錢糧事
屬可行至客箇住居星散並無鄉分地界議立箇名有
無窒碍批飭查明核奪嗣據鄧培初等以前情粘呈十

甲糧單稟縣又經林令批飭查明造冊旋卽卹事該前
縣王令抵任據客民馮德祥等稟稱自乾隆初年開立
客畝花戶無幾糧少拖欠迄今百餘年花戶千餘家錢
糧千餘兩糧多戶繁縱編催頭無如每年輪值更換不
知花戶名字住址從何催追伊等爰集各鄉客戶一鄉
歸併一畝編立畝名分派十甲以就地納戶輪催就地
銀米依期輸完懇請具詳立案等情王令以係爲歸併
銀米易於催集起見如稟批准立案其捐考等事仍飭
循照舊章旋據舉人柳成傑等以客民歛錢無獎開立
畝名呈請批示吊銷等情卽經王令批飭將所立客畝
一併銷除並將經書羅以南吳作霖革懲又在案卹府
伏查宜春縣一十三鄉四隅每鄉設一催頭按年輪催
錢糧立法已周歷久無異至外來寄居客民多寡無常
後先靡定勢不能與土著壹體編甲然自昔年朱益吾
滋事以後客籍人民俱於烟戶冊尾開造姓氏該催頭
按冊催追無虞遺漏則編甲立畝之無益於征糧與不
編甲立畝之無害於征糧已屬顯而易見今馮龍興等
呈請編立畝甲無論百數十來年相安無異忽改舊章
事涉紛更土著必有藉口且馮龍興在縣與上控詞稱
花戶千餘家糧銀千餘兩而查核伊等在縣粘呈十甲

地理 疆域

宜春縣志

卷一

十一

糧單內開糧僅二十餘兩戶僅四十餘戶核之馮龍興
控詞所稱未及十分之一若據現開各戶編甲立畝不
惟掛一漏萬辦理偏枯且其餘未經編立各戶畝頭甲
長無憑查催旣不免詭寄欺隱之虞復恐滋跨考冒捐
之弊所有馮龍興等呈請按甲立畝之處實屬窒碍難
行應請毋庸置議等情詳奉批飭遵照在案茲奉前因
遵卽行提人卷去後茲據該縣以飭查舉人柳成傑等
已赴京會試將被告湯邦才副貢唐大年廩生李人杰
貢生李傳恭貢生梁成廩生晏際清生員劉起鯤及原
告民人曾光堯劉碧蘭傅有紀王國仁蘭臣龍鄭振桂
等同卷宗客畝征冊解訊前來隨核卷會同提集查訊
據會光堯等供稱伊等充當客畝催頭催追客畝銀米
因客戶星散無從催追致有賠累懇准立畝編甲至上
年三月內有無罷考情事伊等並不知道不過藉詞聳
聽據唐大年等供稱客民每鄉立有客畝編有征冊催
糧不致遺漏其另請開立畝各係爲冒考起見是以歷
據出具甘結前來卑職等伏查該縣客民卽係棚民其
來自何時已無案卷可稽查前卷內據紳士等呈稱康
熙年間棚民朱益吾滋事之後客籍民人俱於烟戶冊

尾開造姓氏等語現查並無此案舊卷其爛册亦年久
無存惟詳核縣志內載宜邑山谷深阻昔年閩省流民
賃山種蔗羣萃蓬處順治戊子金逆叛變棚民朱益吾
等乘機肆掠官兵勦撫頑梗投誠經

前巡撫部院大人將客籍棚民各鄉編甲造册立籍迨
康熙十三年吳逆竊據長沙朱益吾等復蜂起響應茶
毒城鄉勦除屢年始就撲滅其餘留棚民行令地方官
盡行驅逐回籍并於康熙二十年編審時詳奉部覆將

原册內缺額棚丁戶口銷除在案惟現所有客籍來自
何時志內並無明文大約康熙雍正以後承平日久客
民陸續仍來墾山生齒日繁買產立戶悉屬醕樸良民

土客相安無事然在土籍因鑒於往事總存匪我族類
之心故至今土客之限分別甚嚴此該縣客民之始末
原委也查該縣向分十三鄉各鄉所有客籍歷未編入

土籍冊甲之內其客籍銀米另編征册一鄉立一客籍
如詔仁鄉即曰詔仁客籍歸化鄉即曰歸化客籍之類
除善和鄉無客籍外餘十二鄉并附城東西南北為四
隅其十四箇合編一册册內分載某鄉客籍其戶名銀
米條例於後征收串票亦填明某鄉客籍字樣每鄉客
籍內公舉催頭一人承催銀米應來按箇完納相安無

宜春縣志

卷一

地理 疆域

異其一鄉中客戶約百餘至數十戶不等糧銀皆不過
數十兩惟石裡一鄉戶糧較多征册內已分為前中及
義興義順四處亦係催頭一人承催此該縣編立客籍
征收錢糧向來章程也查各鄉既立有客籍各箇又編
有征册其立箇催糧之法已與土籍無異所異者箇名
上冠一客字以為土客之分至各鄉客籍戶糧多者百
餘少僅數十共列一箇之內該催頭按册稽查瞭如指
掌已可無虞遺漏而該客民歷次控詞多稱每年催頭
輪換不知花戶姓名住址致有逃糧累及催頭賠墊現
據會光堯等供稱客戶星散無從催糧起見殊不思每
歸併其所請立箇以專係為便於催糧起見殊不思每
鄉客戶為數無多且共列一箇册之內已有歸併向為星
散其催頭即係客戶僉充以本箇納戶催本箇銀米耳
目甚近稽核易周何至姓名住址之不知此而尚有逃
糧其未設立催頭之處勢將全被欺隱其為飾詞聳聽
已屬顯然此該客民所請立箇之不必行也再查該縣
客戶內有已經呈明入籍者於指考時籍貫仍填註客
箇字樣又有入籍後請入土籍者准其將客籍戶糧撥
入民箇之內又有年例雖符尚未呈明入籍者并有別
縣之人在此置產立戶仍回原籍指考者蓋因客戶向

歸客畝卽已呈請入籍而尚未請入土籍雖年分久遠終別之爲客畝不得混入土籍誠以該縣十三鄉客民征册內共有二千一百十四戶糧銀一千三百三十四兩零而每屆應試童生多則十餘人少僅六七人其未經入籍之戶深慮土籍按畝查控不敢輕出言考也今查該縣客民在縣所呈另立畝式如詔仁客畝卽改爲永吉畝歸化客畝卽改爲永茂畝其餘各鄉皆然畝名內並未冠有客字推求其意務在抹煞客畝之名全仿民畝之式卽可與土籍混而爲一則凡未經呈明入籍及寄庄各戶均可朦混一體捐考土客無從分別其流弊不可勝言不然各鄉客畝戶糧該客民供爲星散難催豈敢立畝名卽無虞星散乎此該客民所請另行立畝之不可行也總之客戶有畝而復請立畝弊已昭然該客民所供星散難催之處係屬狡歸之詞其勢斷難准行况其不准另行立畝已歷百數十年之久今若忽改舊章土籍土民必至紛紛構訟意外衅端實難逆料卑職等詳查案卷細察與情該客民所請立畝之處實屬窒礙難行應請毋庸置議以昭安謐惟查石裡鄉戶糧較多一人承催勢難兼顧應照征册內所分四處各畝一催頭分辦以專責成再查該客民上控詞稱戶糧

地理 疆域

宜春縣志

卷一

千餘而府詳僅四十餘戶糧止二十餘兩指爲偏詳查卑府前詳戶糧數目原僅指客民鄧培初等在縣所呈十甲糧單而言故原文內聲明謂若止據現開各戶編立畝甲不惟掛壹漏萬辦理偏枯且其餘未經編立各戶亦無憑查催等語蓋以十三鄉客籍戶糧尙多未便僅就所呈數十戶糧單經立畝甲非謂十三鄉客戶僅四十餘糧僅二十餘兩也文義本屬瞭然該客民並不索解率稱偏詳實屬冥頑至編立保甲係爲稽查匪類本非催征錢糧該客民鄧培初等在縣所呈糧單以四十四戶分爲十甲瑣屑區分殊乖體制查道光四年五月內欽奉

上諭

著各督撫等嚴飭該府州縣將棚民逐細查察按十戶設立甲長每年遞換門牌隨時抽驗等因奉此該縣客民既有二千一百十四戶之多其間良莠不齊自應編甲稽查應令各鄉客民按十戶設一甲長其不敷一甲之戶責成該處各甲長就近會查每年遞換門牌由地方官隨時抽驗該甲長平日既可稽察匪徒亦可帶同催頭查核糧戶至所編之甲仍繫於客畝之下不准混入土甲以示區別其各鄉客畝仍照舊冠以鄉名不准另立名目俾杜冒混除將會光堯所控開考一案另行

具稟外理合將會訊查議緣由具文詳請
憲臺俯賜察核立案除詳
照兩院施行須至詳者
具申伏乞

袁州府正堂沈 札開道光二十三年正月二十三日奉
布政使司費 札開道光二十三年十二月二十二日奉

奉 巡撫部院吳 批據該府等會稟宜春縣並無罷
考之案無憑查辦緣由奉批據稟已悉仰布政司核明

飭遵仍候
審部隨 批示繳等因奉此查前據該府稟司業經批
示在案今奉前因合就轉行為此札仰該府即便轉行

遵照毋違特札同日又奉 布政使司費 批據稟已
悉仰候 三院憲暨 緝緝 批示繳又奉 督學部院

孫 批據稟已悉仰仍候 緝緝 批示繳又奉
按察使司溫 批據稟已悉仰候 緝緝 批示繳又奉

緝緝 批示繳又奉 批據稟已悉仰候 緝緝 批示繳又奉
候 三院憲暨 緝緝 批示繳各等因到府奉此合就

抄稟轉行爲此仰 縣即便遵照毋違特札
袁州府正堂沈 札開道光二十三年正月二十三日奉

布政使司費 札開道光二十三年十二月二十二日
地理 疆域

宜春縣志

卷一

四

奉 巡撫部院吳 批據該府會同候補同知蔣承詳
宜邑客民曾光堯等控湯邦才等朦銷甲等情一案

奉批所議殊屬詳晰允當仰布政司轉飭如詳立案仍
候審部隨批示繳等因奉此查前據該府等詳立案仍

批示在卷今奉前因合就轉行為此仰該府即便遵照
轉飭如詳立案毋違特札同日又奉 緝緝 批示繳又奉

督學部院孫 批如詳立案仍候 緝緝 批示繳又奉
又奉 按察司溫 批如詳立案仍候 緝緝 批示繳又奉

緝緝 批示繳又奉 批據稟已悉
仰候 三院憲暨 緝緝 批示繳各等因到府奉此合

就抄詳轉行爲此仰 縣即便遵照立案毋違此札
右札仰宜春縣准此

特授袁州府正堂加十級紀錄十次沈 札開道光二十
年二月二十六日奉 布政使司費 札開道光二十

四年二月初十日奉 總督部堂耆 批據該府等會
稟宜春縣並無罷考之案無憑查辦緣由奉批該縣查

無罷考情事曾光堯等控詞失實殊屬不合即據稟稱
尚屬控出有因其控立旨甲之案又已詳銷姑免深究

仰江西布政司轉飭知照仍候 緝緝 批示繳等因

奉此查前奉撫憲批示業經轉行在案今奉前因合
就轉行爲此札仰該府即便轉行遵照毋違特札等因
奉此合就轉行爲此仰縣即便遵照毋違須牌
特授袁州府正堂加十級紀錄十次沈爲轉飭事本
年二月二十六日奉布政使司費札開道光二十
四年二月初十日奉總督部堂費批據該府會同
候補同知蔣丞詳宜邑客民會光堯等控湯邦才等朦
銷冒甲等情一案奉批查會光堯等之主控欲另立
甲本爲便征輸而設今據該縣征糧舊章名鄉凡有客
民居住俱立有客名目戶名銀米條例於後征收申
票亦俱填有客名字樣按冊而稽各戶亦無從逃糧是
其法本善會光堯等必欲更改舊章另立名目以避客
民二字滋訟無休殊覺多事該府所議尙屬允協准如
詳立案仰江西布政司轉飭遵照仍候部院批示
激等因奉此查前奉撫憲批示業經轉行在案今奉
前因合就轉行爲此札仰該府即便遵照轉飭如詳立
案毋違特札等因奉此合就轉行爲此仰縣即便遵照
立案毋違須牌

按宜春考試點名冊民籍之外即儒籍衛籍彙爲一

宜春縣志

卷一

地理 疆域

五

冊另有官籍一家係前太守陳公廷枚之裔別繕一
冊點名注曰官籍並無客籍字樣近有奸吏扶同客
民弄弊改官籍爲客籍附名入冊希圖朦混勾跨當
經查出稟官塗銷責懲嗣後闔邑廉保暨各鄉首事
造冊時均詳查毋忽

附縣學詳文

袁州府宜春學爲遵查稟覆事案奉
憲台批該廩生余星煌既已補廩何以不合出保仰
該學查明有無別故迭覆等諭卑聯即遵諭檢查據廩
生彭鴻章稟稱宜邑籍隸郡郭客居輻輳每逢歲科兩
試多屬冒籍滋事向年入籍者少易於稽查近年入籍
者多最難識認往往考期在邇呼引類有身住他邑
而來此跨考者有籍未呈明而瞞眾冒考者合縣向來
公議章程凡屬客民入籍者補廩不得與保併一切文

昌老會宜陽書院等項均不得與焉原所以杜勾冒而絕樊端是以前頂薦外鄉十九福黃之廩生張志椿張志權張能均俱未認保又劉俊張吳郭際春黃道隆張鳳翔等亦恪守舊章不得與保毫不敢索今有客籍廩生余星煌語言乖張行為詭異藉頂余與祖絕戶恃強濫保當經關屬文武生童擁擠禮科不准填冊前向生等公囑凡有承挨余保者不准花押倘有私行花押定當公擊生等未便濫與致干牽連等情並據十三鄉首士黃星燦等稟稱藉頂濫保公懇扣除以絕勾跨而杜後患事竊宜邑向來公議章程新籍補廩者俱不准認保因其引類呼朋勾跨舞弊從前疊滋事端故也所以前項薦外鄉十九福黃之廩生張志椿張志權張能均概未認保即後補廩生如劉俊張吳郭際椿黃道隆張鳳翔等亦恪守舊章毫不敢索今有修仁鄉新籍廩生余星煌藉頂余與祖絕戶恃強濫保衆情洶噴有煩言勢必釀成巨禍生等因散給各童卷資目擊此情向星理勸星強不耳爲此公叩學師批示扣保庶勾跨以除而後患悉靖等情前來據此卑職復查兩造俱赴府縣呈詞府批宜邑新籍廩生不准認保既舊章如果余星煌恃強濫保着該首事核實稟報以便飭房扣除

宜春縣志

卷一

地理 疆域

六

可也縣批據稟宜邑新籍廩生不准濫充認保既有向章可循自宜照常辦理余星煌向得故違濫保殊屬不合着即扣除以昭畫一而息爭凌等批卑職當即飭傳余星煌到案面諭不得與保余星煌聲稱情甘不出認保免致滋生事端昨據余星煌稟稱奉批認保理合稟請送冊事生去冬將試已保有文童數十名後因府試被人倡造謠言以致各紳稟縣將生扣保在案生因含冤不甘只得縷情稟明

學憲昨沐批諭准生認保今當考試文章場期在邇理合填冊認保以便稽查查各童爲此粘呈批諭稟請恩准送冊認保等語卑職以事關合縣一經送冊必致滋生事端且查該生素有狂妄滋訟情節是以未便濫送茲奉

憲批理合將不合出保緣由錄呈
憲臺俯賜查核爲此備由具申伏乞
批示遵行須至申者

提督江西學院李批

據詳余星煌本係客籍且向有狂妄滋訟情節業已闕悉查宜邑舊無客籍學額該生已古土籍入學補廩已屬使宜若以新籍之人而保舊籍文童意不過圖分保

册等費而新籍耳目不周縱有弊端安從查悉且密邇
萬載等縣客籍人多影射頂冒在在難於防範此土籍
廩生可以保占籍之童而占籍之生未可以保本籍之
童亦實在情形也昨因該生遞稟朦混但云諸生因其
資格尚淺阻其出保本院未經查核此縣情形信一面
之辭遂云既係廩生自應出保旋因該生滋訟不已始
疑其中容有別故合據宜春縣學詳文停其出保所有
伊保下各童迅飭土籍各廩生認真查保以杜鎗替該
縣既無客籍學額所有寄籍日久縣有廬墓之童生即
不應異俗殊言自分土客庶與土民相習日久即是土
人目前便於應考日後亦無土客互戕之案本院此舉
全為該縣實在情形起見且與爾土客兩民計度久遠
不止為余星煌一人計也該學將此批通飭諸生知之

宜春縣志

卷一

地理 疆域

七

沿革

唐虞肇十有二州夏改爲九州商因之袁屬揚州究係荒服

周東南曰揚州袁亦屬焉

春秋時屬吳周元王三年吳滅屬越

戰國周顯王四十六年楚威王興兵伐越盡取吳故地

秦始皇二十六年并天下置三十六郡袁屬九江亦曰南

楚

西漢高帝四年分九江置豫章郡始置宜春縣豫章領縣

十八宜春其一也

宜春縣志

卷一

地理

沿革

一

元光六年封長沙定王子爲宜春侯國元鼎五年國除仍

屬豫章郡

新莽篡位改豫章爲九江郡改宜春爲修曉

東漢建武元年復豫章郡復宜春舊名仍隸豫章

中平二年析宜春東境地立漢平縣

三國吳孫權據江東改漢平爲吳平孫皓寶鼎二年析宜

春西境置萍鄉又析宜春東境鍾山以下置新喻中爲

宜春與廬陵之平都永新長沙之安成置安成郡轄之

晉武帝大康元年平吳因避鄭太后諱改宜春爲宜陽仍

隸安成郡增置七縣平都新喻永新宜陽安福廣興萍

鄉改屬荊州

惠帝時分貴陽武昌安成三郡屬江州安成郡仍領七縣
宋齊因之

梁大平元年割臨川安成豫章巴山四郡置高州尋廢安
成仍隸江州又廢平都縣地分與廬陵安福宜春三縣
陳因之

隋開皇九年平陳省安成郡所屬新喻入吳平改豫章郡
曰洪州吳平隸焉十一年廢吳平入宜春十八年于宜
春始置袁州是年再立新喻縣

大業三年仍改洪州爲豫章改袁州爲宜春郡依漢制置

宜春縣志

卷一

地理沿革

二

太守以司隸刺史相統治領縣三宜春萍鄉新喻隋末
蕭銑林士宏相繼據其地後復張善安據以降唐

唐武德五年復袁州改太守爲刺史又置洪州都督以治
之領縣如故

貞觀元年分天下爲十道袁屬江南道治吳郡

開元二十二年置十五採訪使袁屬江南西道治洪州江
西之名始此

天寶五年改袁州爲宜春郡

乾元元年復改郡爲袁州

楊吳南唐俱仍舊

宋初開寶八年曹彬下江南得州十九袁居其一是年以
筠州萬載來屬

宋雍熙元年析宜春之神龍招賢豐樂化全儒林彰善挺
秀文標旌儒清教十鄉置分宜縣袁共領縣五

宋淳化三年割新喻縣屬臨江軍袁領縣四遂爲定制

元至元十有三年立袁州安撫司十四年置總管府設錄
事司隸湖南行省十九年升袁州爲路設達魯花赤隸
江西行省至正十五年斬黃寇起徐壽輝僞將歐祥陷
袁州路據而守之

壬寅年春明兵下江西歐祥遣子納地甲辰年七月以袁

宜春縣志

卷一

地理 沿革

三

州路爲袁州府除錄事司

明洪武二年仍以宜春爲首邑與分宜萍鄉萬載三縣隸
袁州府并隸江西布政使司道曰湖西道

國朝因之康熙三年裁湖西道改爲驛鹽道分巡宜春仍附
府郭

封爵附

西漢

劉成長沙定王子武帝元光六年封宜春侯元鼎五年坐
失酎金國除

東漢

劉匡中山王劉茂弟建武二年封宜春侯永平中子浮嗣
傳國至孫獲無子封絕

彭翼本縣人獻帝朝歷官建平長沙北海三郡太守封宜
春侯

施游本縣人歷官九江太守封安成郡宜春侯

晉

桓謙冲次子封宜陽縣開國侯改封甯都侯

張闓丹陽人賜爵宜陽縣伯子混嗣

檀韶高平人封宜陽縣侯食邑七百戶子緒嗣無子國除

張劭封宜陽侯降封臨淄伯

宜春縣志

卷一

地理

封爵

四

劉宋

劉愷義宣次子元嘉三十年改封宜陽王

柳叔仁元景第六子封宜春侯永光元年殺元景并誅叔

仁國除

童太一東莞人景和元年封宜陽縣男食邑三百戶大宗

卽位國除

南齊

蕭子光封宜陽侯永元中義師圍城卒於尙書都座

蕭嵩大祖第六子高帝建元元年封安成王食邑二千戶

蕭梁

蕭秀太祖第七子天監元年封安成郡王食邑二千戶卒子機嗣機卒子操嗣

唐 王珍國沛國相人天監五年改封宜陽縣侯子度嗣

李綸順宗元年封袁王

李游袁州刺史封宜春侯

李仙豐王珙第二子封宜春郡王

王雄誕曹州濟陰人武德初封宜春郡公誕卒子世果襲封

楊吳

宜春縣志

卷一

地理 封爵

五

楊瑋睿帝第三子乾貞二年立為宜春王

楊瑋睿帝從子封宜春王南唐時降郡公

南唐

李從謙元宗第九子後主母弟也建隆二年後主嗣位於

金陵封弟從謙為宜春王後歸宋改名從誦

宋

趙宗勝濮王子政和四年追封袁王贈太師

夏執中本縣人成宗皇后兄官至奉國軍節度使以后貴

封宜春侯加郡公

明

朱盤姚獻王第三子宣德三年封宜春王子奠圻嗣宏治八年薨子宸會嗣宏治十一年薨子拱櫟嗣正德十四年坐宸濠黨國除

歐祥一名普祥初事天完徐壽輝至正壬辰祥據袁州庚子五月陳友諒殺壽輝僭號祥耻友諒所爲不爲用辛丑八月明太祖討友諒拔江州祥遣使以地降壬寅正月太祖至南昌祥率衆來見封袁國公俾仍守舊鎮預征討尋率師取撫州等郡又從克武昌甲辰三月太祖遣使以書諭祥及江西守將鄧愈進攻贛州熊天瑞未幾贛州平

宜春縣志

卷一

地理

封爵

六

黃彬江夏人初歐祥取袁州彬爲副將後祥附太祖彬亦屬焉數從征討有功洪武三年封宜春侯歲祿九百石二十三年坐胡惟庸黨死

山川

袁山

在縣北五里峯巒秀拔漢高士袁京隱居於此卒葬其側故名後因山名州此為大袁山傍西為小袁山

兩山相對唐人詩袁山大小雙螺並秀水東西一帶橫

附劉長發詩

翠聳高峯玉削成祇今泉石帶餘清人因峻潔偏傳姓山似幽棲亦擅名大小雙螺

環北瀆東西疊嶂繞江城崇巒極日窮攀陟想見孤高處士情

坤長山

在城西南七里山自坤方來綿亘甚遠因名是山關係袁城一郡來脈入城處多石骨狡民燒灰取

利道光二年闔邑紳士呈請勒碑示禁以全風水

半邊山

在城南八里與坤長山接壤山形半面壁立數十丈峭拔峻秀

附鍾爝詩

每望山餘半山行穩不驚賓從宜款段父老與班荆空谷花叢笑幽林鳥語迎層巒多豁

目淡淡岫雲生

宜春縣志

卷一

地理 山川

震山

在城東十五里亦名馬鞍山下有巖幽深險僻唐彭構雲隱釣於此寶應中徵召不就郡守嘉其行因名

其鄉曰詔君鄉巖曰詔君釣臺唐盧肇記

附盧肇記

宜春郡東十五里有山望之正若冠冕同麓而巽峯在東方如畫震卦郡人名之曰呼岡

意者謂其若長幼相呼同在一處其義不顯予無取焉其西北有石室臨游溪之淡邑人彭先生嘗釣巖下先生諱構雲善黃老言寶應中詔以五帛召先生不至時

太守命其鄉曰微君鄉巖曰微君釣臺咸通七年予罷新安守以俸錢易負郭二頃在震山之西又得楓樹之

林於溪南日與郡守高公遊其下公名厚衣纓之茂上也為政嚴簡民悉安之予以震山易呼岡之名白公公

喜命刊其事於巖下予既得西林而羅烏置兔挾彈走馬於其間命其林曰盧氏弋林以對其東彭氏釣渚也

因謂高公使郡人無得樵漁於是林之檀欒杉檜不日豐茂以冠於郡高公因戒吏以丹書貽盧氏使西疇之

人世世掌之郡民相率言曰二刺史俱好事者吾儕幸

遇目焉遂以刊之是歲十一月二十三日記

湖岡山 在城南十五里即湖岡臺山

南峯山 在城西十五里孤高峭拔山頂有寺倒影澄江如

口下臨深潭江中有鄧公石因鄧表

鵬山 在城東二十五里高

小仰山 在城南三十里晉鄧表修煉於此又號鄧

附宋州守蕭炳詩 萬丈青山插碧天真人煉藥石依然

仰山 在城南八十里為府之鎮山周迴數百里高聳萬仞

與國禪寺及二神廟小釋迦塔山有水分流會于正廟

附張嗣古詩 嵯峨大仰峯雲氣摩蒼天山靈喜迎客收

老歲月喬松裹山川水聲含萬古處處聽潺湲是時秋

色半景氣相澄鮮叢柱為我芳拂拂吹清妍行穿苔磴

滑樓觀懸其巔殷勤一瓣香致敬西方仙人 徐誼

果矣賴俗累相拘牽是事且置念一榻分雲眠

詩 我行之宜陽便作大仰道上有參天松下有漱石流

泉石療我飢竹層層清幽老禪雅愛客要作數日留

勝秋江上獨釣滄浪舟所恨招不來莫我更唱酬

張毅詩 蕭寺藏幽谷谿流燕尾分松蘿諸洞合鐘鼓土

鶴自 陳繼道詩 雨啼鳥弄春風草色幽巖裏濤聲荒

淵中藤蘿深秀 李冲元詩 紺蠟千尋人杳冥我來心

處石徑一溪通 地已澄清孤雲欲作人問

雨流水空傳物外聲老柏倚巖高轉瘦寒花著 胡志

雨壁還生故人願怪歸來晚遠寄新詩照眼明

隆詩 山下清泉道石流山前松竹自春秋猿吟古寺偏

語鎖寒澗葺天更在藤 陳亮詩 絕頂龍潭照壁空落

蘿外欲削峯前眼末山 煮茗併徧溪上雨杖屨從

一掃羣山盡畫 李叔銓詩 倚竹間風塵埃不納雲烟

出溪南雪後峯

步又入清 陶定詩 蕭然清境世間稀 巨竹喬松合翠 涼境界中 微一徑巧穿雲外去 鐘聲依約送

人 鄭燠仰山讀書堂詩 大仰岡巒映碧濤 鷓鴣聲倚 歸 古松陰萬山烟雨孤燈下 應

有雙龍 袁克贊訪鄭都官仰山讀書堂遺址詩 仰山 聽夜吟 高處

白華生渺渺 荒踪古木橫一卷 段如錦遊鄭都官讀 雲臺剛讀罷 耳邊疑聽鷓鴣聲 故址荒涼唱鷓鴣 山水

書堂故址詩 讀書堂側老松枯 故址荒涼唱鷓鴣 山水 留人隨處有風騷 一代到今無雲臺 曾詠

詩千首 藤閣空餘樹兩株 一字 之師齊已拜早梅 開侯獨踟躕

集雲峯 池相傳 葛仙煉丹處 天羣峯勢若連 瀑珠飛作雨 嵐

附劉幼發詩 大仰接青天 羣峯勢若連 瀑珠飛作雨 嵐 氣結成烟 霧裏山容失 雲中塔影懸 仙踪

何處是丹 趙如鎡詩 平生幾兩謝 公屐愛山愛水真 竈火猶傳 成癖集雲峯 在指顧間 年來抗

塵乃絕跡 西風慙慙作 意登佛境未入心 境清九秋顯 氣接嵐氣 五里松聲 答泉聲 招提金碧 壓深窈 鐘鼓四

宜春縣志 卷一 三

時遞分曉 梵音獨許山鳥聽 禪夢不驚蝴蝶繞 土映露 飽蔬筍 鮮一粥 一飯天下仙 伊蒲供罷日 卓午浮雲半

是烹茶 烟四藤 欲知閣中味 萬字欲參堂 上意請將此事 且放置坐看 山雨濯晚翠

書堂山 在城西南三十里 鞏 溪唐盧肇讀書處

石屋山 在城北三十餘里 洞深百 餘丈 有石柱 石鐘 石鼓

橫江山 在城西南三十里 為郡脈 脊隆降突 起綿亘五里

蟠龍山 在城南四十里 自麓至頂 凡三十六曲 上有蟠龍 寺唐末南平王鍾傳建 四面峭壁 瀑湍飛瀉 前有

龍門關 平挹雲峯 誠勝境也 王 雲詩 經夏地無暑 未寒泉有冰 崢嶸崢嶸 崢嶸崢嶸 崢嶸崢嶸

附張嗣古詩 蒼龍蜿蜒 復蜿蜒 崢嶸崢嶸 崢嶸崢嶸 崢嶸崢嶸 崢嶸崢嶸 崢嶸崢嶸 崢嶸崢嶸

三十六鱗 甲參差 動林谷 不將霖雨矜 神功却向寒巖 散飛瀑 西風吹我衝 晴烟飛 甍金碧 懸山巔 白雲脚 底

飛欲盡 此身忽轉 層霄邊 問漚堂 前舊消息 拍碎欄杆 人不識 心隨境在 萬化新 覩出世 間縛不得 清興未盡

還歸來却立平地聽風雷紛紛
袁廷鈺詩 幾回盤曲

冠蓋趨塵埃此龍此寺長崔巍
人雲隈歷

盡羊腸古寺開峭壁嶙峋從地聳飛泉灑落自天來野
會經夏不知暑山客題詩欲掃苔漫道蟠龍終隱伏會

須霖雨 劉長發詩 靈山遠在白雲邊徑轉巒迴望若
走風雷 連鳥道千層環石磴龍門百尺濺

寒泉好風時向松間度清磬遙從竹外
傳坐覺涼生襟袖裏不知身處碧雲煙 袁一菁詩 雲

谷口渡寒泉山到蟠龍古刹傳歷
劫不灰三乘法鐘聲猶自破晨煙

獅顧山 在城東南四十里集雲鄉原有古刹
康熙十九年僧開雲創建樓雲禪院

細鐘山 在城北五十五里槎溪蒲山皆石如仙佛如獅象
如旛戟濱河處石開宏敞上面平如蓋板中懸一
石似鐘扣之有
聲鐘乳常流

石門山 在城東南六十里石
峭如壁中通小徑

老山 在城西南六十里崇高峭拔山巔有飛瀑即雲谷
飛瀑處下有雞嘴峯非內山雲托不見見則大雨

宜春縣志

卷一

地理 山川

四

寶山 在城北六十里世傳肅禪師過此山遇訟者勸之云
欲出輪迴道先回自己心訟者以此言為寶因名

大岡山 在城南六十里界連分宜安福左有銀礦洞山
腰有潭潭上石壁峭立瀑布從巖瀉下遇歲旱居
民禱雨輒應相
傳潭有伏龍云

木平山 在城南七十里三峯峻拔郡守王祐禱雨立應遂
名其中峯曰妙慶左曰瑞光右曰慈雲又有與化
禪寺寺中有銅龍亭嘯月亭景物清絕
宋冲元詩窄徑隨溪轉懸巖帶薜斑

太平山 在城西南一百
里詳陳之龍記

附陳之龍記 太平山者初不知為何名因定空禪師將赴
南嶽道經袁州夜夢老人指此峯頂曰天下

太平山敢以相贈師覺遂從峭壁叢棘中攀援直造峯
頂古樹蔽日清泉噴珠四望悠然爰敲石融冰日為一

食而人不知也一日有採藤者見而異之歸告里人相
與裹糧築室蓋茅而居焉苦巨石當道忽迅雷大震巖

崩石泐遂成坦途室惟一龕不設衾枕與人語惟告以
習靜元旦師忽諾于眾曰自我

習靜元旦師忽諾于眾曰自我

習靜元旦師忽諾于眾曰自我

朝定鼎本山陰霧頓開日星朗耀天下自此太平矣因憶
前夢實與運會相符契其即以太平名茲山可乎余時
尋芳至山問師起居適遇老人劉迪吾語及師言太平
之兆與山所以名太平之故相與稱快謂太平今永昌
焉用是徘徊山中周迴願望東則有若雷打石暨走砂
瑞慶塔中巖二王試劍石劃然棊置焉南則有若虎皮
江下烏雲巖隱然如圖畫焉若夫西之仁澤江楓陰獅
子巖四傘樹松巖百步地與北之中山下江香山分水
地皆茲山之勝槩也覽睇久之竊重有感焉茲山綿亘
二十餘里昔號官山人跡罕到蓋數千百年以來虎豹
之所居麋鹿之所穴也而長老定空得之遂成太平山
焉意其土之淨與地之靈天蓋待其人以作千百載之
上方者乎

是為記
書寶山 在城西一百二十里薦裏鄉庚溪一名書寶臺高
八十餘丈山頂平圓寬十餘丈中有石類楸枰即

鍾牧童
過仙處

弓山 在城北五十里
因形如弓故名

宜春縣志

卷一

地理 山川

五

源頭山 在城北六十里內有洞通十餘里奇形怪
狀無所不有惜路不當孔道罕有知者

烏山 在城北東七十里又名烏紗嶺接連數
障皆峻拔中計一十七坡三十六坡

馬鞍山 有三一在下浦一
在沙江一在上坵

望鳳山 在城西北七十里周迴六十里
高三里中有一峯如鳳因名

玉京山 在城南七十五里唐家山東一峯聳峙相傳桃石
仙人煉丹於此屢顯神異居人楊姓因建菴以祀

菴左側一巨石下有洞空濶若堂中有二小洞左則寒
風淒冽右則暖氣薰蒸名風火洞即仙人煉丹處也分

宜進士嚴秉璉曾遊其地有句云煉
丹尚覺三冬暖鼓橐偏教六月寒

天台山 在城西九十里薦裏鄉一名大嶺多蘭花幽香滿
谷山巔可望袁城上有寺相傳朱竇二神自空中

飛來春夏之交雷
神掃寺禱雨輒應

楊歧山 在城西一百二十五里高聳雲霄周迴百餘里山
左屬宜山右屬萍西有千丈路東有千坵田萬杉

嵩仙跡相傳十八羅漢一夕幻成頂有石天池廣數畝
每夜午氣衝星漢中多石洞仙橋石臺尤勝夏雲起雨
立至冬日陰晦
峯頂積雪皓然

青臺山 在城西環溪又名青臺嶺
高峯聳拔頂平圓若臺

印山 在城北蘆塘峯
頂可望袁城

筆架山 有二一在城北錢塘上有廟一在
城東彬江三峯並峙形如筆架

月山 在城南
仰峯 在城南七十里岡
巒層疊路通安福

大鵬山 在城東四十里北臨江江水澄澹淵深莫測
下有石竅奇險幽邃漁者嘗余水捕魚焉

天馬山 有三一在城北瀧溪有大小峯形似馬明浙江嚴
州同知柳渾居其下一在城南集雲鄉邑人楊察

院夫人墓其上前有石人石馬
石坊一在城北東七十里橫塘

木魚山 在城西薦
外鄉山口

宜春縣志

卷一

地理 山川

峯頂山 在城北八十里餘里為宜萬交
界之處孤峯聳拔高入雲表

羊角峯 在城東十里雙聳如
羊角一名雙箭峯

聳翠峯 在城西三十
里峻壁孤峙

貓峯 在城西北一百里魯溪界峯多巨石望類
蹲貓俗呼為貓尖雲起其巔片時即雨

神岡嶺 在城南門內凡祀仰
山神皆由此因名

江北嶺 在袁山
門外

黃牛嶺 在秀江之北自成巖
來數里形勢如牛因名

社壇嶺 在城西門外街北一里因有社稷壇故
名岡巒平衍中多古塚下有萬福古寺

玉坡嶺 在城西四里舊傳有
王者葬此一日王坡

花冠嶺 在城西五里
近化成巖

曹家嶺 在城東五里

獅子嶺 在城南五里草木鬱茂形勢如獅因名近有猴兒洞

銅釘嶺 在城西南五里相傳本長沙温氏墓宋初削平僭偽因鎔銅灌其頂故名與坤長山相連

金鐘嶺 在城西南十五里

銀瓶嶺 在城東二十里下浦奇石峭削如瓶頂有寺四面懸崖一鳥道延緣而上古樹鬱蟠秋時青紅輝映

讀書寺中覺風露蒼涼如坐仙界俗座飛不到也

龍髻嶺 在城西南三十里

白鶴嶺 在城西三十里

袁州嶺 在城北東八十里近末山嶺外屬上高內屬宜春故名

嚴嶺 在城北五十里山勢峭拔自下而上有小徑十八折頂名仰公山下有小溪流田甚廣

宜春縣志

卷一

地理 山川

七

石嶺 在城北東七十里

雞冠嶺 在城北東七十里橫塘為袁姓居址來脈

牛嶺 在城北東七十五里橫塘形如牛故名

雲障嶺 在城北東七十五里橫塘極高峻中有張恭人墳

五虎嶺 在城北六十里以五嶺相連形勢如虎因名

仙女嶺 在城西南六十里下為宋成恭皇后所居清瀝江流於其側

澗富嶺 在城南六十里與安福接壤宋嘉定四年嘗于此置寨以遏郴寇咸豐六年里紳夏啟先捐金數百

為石卡極牢固

分水嶺 在城東南六十里與嚴營山寨相近皆防阨峒寇之所載府志

大將嶺 即九七嶺通志作大軍嶺在城西北九十里周迴十五里山腰有泉名水漿湖相傳隋煬帝時戰場

載通志

婆婆巖

在城南集雲鄉懸崖陡壁中有石刻開天帝

獅石巖

有二一在城西白沙其石皆具獅形紋若

牛欄峽

在城東二十五里左金雞嶺右銀瓶嶺中峽

富家嶺

在城西薦外鄉張家坊

葫蘆嶺

在城西薦外鄉南山下

來龍嶺

在城西薦外鄉新溪街

王高嶺

在城西薦外鄉馬鞍潭前

坪子嶺

在城西薦裡鄉

月光嶺

在城東三十里孤峰

宜春縣志

卷一

地理 山川

八

紅花仰嶺

在城東南五十里與分宜交界山極

萬勝岡

在城東五里楊吳時柴再用與米志誠討劉景崇

太平關

在喝斷山城北一百二十里與萬載萍鄉及湖南

載通志

得勝坡

在城西八里原名倒馬嶺咸豐六年統領援

古神寨

在城西薦裏鄉極高峻下有巨泉左出明湖右出

居于

建陽寨

在城西石外鄉深村極高峻山半有田朱

石扶梯

在城西北薦裏薦外交界處兩傍皆山

舉子岡

在城北東七十里舉岡

天紫岡 在城西北五十里

天龍巖 在城北一百四十里距慈化寺西十里為普菴祖師禪定之地洞幽邃相傳祖師坐石上臂膝陷寸許母往視之作禮起首戴石上成腦頂形髮痕宛然

玉谿洞 在東城外半里郡人李觀夢符居之白號玉谿叟洞今塞

石窟洞 在城東北五里雷潭菴側舊傳龍神潛於此今石有龍爪跡

正陽洞 在城南七里坤長山之側即栗坑巖深濶三十丈上圍窈如鐘稍狹而暗非火炬不能入憩少刻仰望有光如星折而右有小口僅容一人鞠躬入既而宏厥明豁石乳流結為觀音為涼傘為旗為碗千態萬狀

石乳洞 在城東三十五里深一里許兩壁石乳凝流幻成燥一濕邱隆宛然又有鐘鼓各勝後復合為一其洞平坦潔淨冬溫夏涼人遊宴其中殺核狼藉經宿如掃宋

附鄭王賓記 袁為州在禹貢揚州之西南治宜春按寰年刺史蘇公球于嘉平節率其僚游而觀獵焉命從事魯受為文識之題曰乳洞文久失傳莫稽其迹後有蕭九宗者縣掾也書于壁間亦能言大中事惜當時之文不授無以紀勝槩予被命典教于袁嘗從容茲所嘉其隱然天成與人世絕遠自立區域也將使聞四方傳不朽因叙其畧洞在縣東三十五里洞之前有石亭衡二

宜春縣志 卷一 九

教授鄭王賓記

行歷歷可數曲而深度百尋其廣自三步步其崇自五尺而殺之環蓋維石入門而履之初則平土也可驟可馳已而降登旋折所融石乳盤結下垂旁出異狀人物可名若觀音若羅漢若鐘者若田者若井者觀音之狀上覆下承羅漢之狀森列不一鐘無形而有聲附壁莫辨叩之乃應田有邱陸卑高廣狹為之制井分三級水清而甘滿不溢酌不減田之上有小洞方廣二十餘尺峻不可入號石倉井之旁深入可十尋裂兩歧終合為

一號南北而洞之畧如此洞之中冬溫而夏涼昔有李
生者隱焉里落每夏旱則往問雨之口告無差期人咸
異之其化也又朽木聖壇立像而神事焉像今存於亭
或無雨禱之必應生既失其名字且不知其世聲聞相
傳在人耳目予意天造鬼置當有物護持代不乏處者
豈一李生止哉抑嘗聞陸羽茶經其評水謂山水上乳
泉石池又上信也然羽雖喜泉源使其品第必知洞之
水不劣於惠山虎邱也及讀韓吏部江山多勝游之句
其謂宜春則是矣然吏部雖賞宜春江山之勝亦
未必知乳洞又其勝者也政和癸巳中和日記
幼發詩 谷口探幽境披蘿見洞扉
石壁飛桃源信在眼應
來稀 朱憲詩 一壑煙霞古洞幽
曾乘佳興漫遊已
可能生羽翼志機相與度春秋
今朝喜訂重行約不識山靈得許不
莫塘洞 在城北六十里初入濶數丈有潭水流洞外繼入
里鄉人嘗避寇於此

宜春縣志

卷一

地理 山川

風火洞 在城西九十里江東二洞如鼻觀相距數尺左為
三月水漲小魚流出紅白間色土人謂之桃花魚洞前
多田塞其竅則禾稼和右為火洞較淺近之氣燉燉
然蒸人

曲泉洞 在城西一百二十里地名環溪上洞在山腰峭壁
下闊二室明潔可容五六筵中洞受羣山水穿里
許忽開豁見天廣數畝遊者舉火入洞見龍田龍潭龍
井空曠處高不見頂兩旁雲屯雪積皆石乳結成下洞
水聲潺潺曲折行四五里出
荷花潭內有鐘鼓旌旗諸狀
附張錫疇詩 勝蹟伊誰鑿江流出處通石門懸絕壁洞
琴韻譜到 勝蹟伊誰鑿江流出處通石門懸絕壁洞
此識天工

四基洞 在城北東八十里其洞甚廣界上高宜春
分宜萬載之間故名明一統志作四溪洞

龍洞 在城西薦裏鄉快石
泉源自石洞湧出

黃花洞 在城東北善和鄉梅村大坳嶺

子母龍田洞 在城北壇子母相連母洞深數十懸

峯頂山亦有石田數坵

金雞洞 在城北壇下金星峯頂下

胡仙洞 在城南七十里山高出雲表明胡真人修煉洞內仙去里人祀之歲旱禱雨輒應

桃花洞 在城西薦外鄉儉塘

響石 在城南五里獅子巖後聲傳響答因名

蝦蟆石 有二一在城北五里崇勝寺側一在城西北六里許瓦江中流石畔江水深碧莫測其底

龍頭石 在城北五十五里槎溪石門嶺形如龍頭角口鼻宛然下有五石撐住

雞冠石 在城北東五里善和鄉形如雞冠因名

宜春縣志 卷一 地理 山川 土

五星伴月石 在城南六十里地名桃溪江

紗帽石 在桃溪水口

道士石 在桃溪向山右有黃公金頂左有武華仙山

金星石 在桃溪上

石穴 在城西六十里燕州神廟一穴清流入內可行三十里

獅子石 在城西一百一十里中溪石昂首張口如狻猊狀石紋層折若旋毛寺倚巖前間以松竹宛然如畫

秀江 在城北門外源流詳水利

附施閨章詩 秀江空翠看欲無盤渦激瀨寒侵膚乘流喧轆轤釣臺巨石青瑒瑚河伯江妃白晝趨卧聞灘響

忽已逾颯如勁箭離鵬弧萬籟奔騰鳥獸呼枕藉清光離簿書藤花飄落上頰鬚逸興

今朝不可孤舉杯滿酌酬江湖 熊曰華詩 灘魚戲秀

江月灘淺水聲高月逐江流歇白雲片片醉飛觴銀河
灩澦連波光沙鷗出沒村煙外漁火零星蘆荻傍樓臺
徹夜笙歌起舟中之人快入耳遷客當年此地多鷓鴣
聲渴袁山雨借問山靈誰最賢高士於今傳姓袁江上
長歌明月月在天

清瀝江 在城西南六十里源出老山山頂有瀑數派一派
瀉山下為此江過壘溪又過了山分二派一為官

陂水一為新江又分二派一為司谿
江一為新江會為麟橋江人於秀江

龍門江 在城西一百二十里薦裏鄉兩山對峙若門山腰
將大雨先有濁流湧溢俗名神龍

洗洞水 經滄江嶺有瀑布泉二道

仰山水 在城南六十里源發三鑊潭北入獺逕
潭過仰山迤邐東流出浦村入秀江

九曲水 在城西南發源鄧尖峯歷明村經山
口諸境滌紆九折至下浦入秀江

避賢谿 在渚田仰山正祠前自塘溪在城南七十里源發
仰山徙廟於此因名

宜春縣志 卷一 地理 山川

鸞谿 在城西北六十里下流入秀江相傳
吳綵鸞與文簫游此傍有鸞史臺

雷潭 在城東北五里舊傳有龍潛於此上有峭壁石罅龍
鱗印苔成痕潭邊有寺今改為多寶菴傍石亦名鈞

魚臺竹木陰
森稱勝境

附陸經詩 山郭五里餘氣象忽異色蛟龍嘗此蟠潭水
至今黑變化驗莫窮白晝起霹靂山形抱江

來怪石多傾側有寺出其間戶牖立丹壁微雲垂鑑中
異彩畫不得小閣纔數弓吐納半江碧日光涵游魚到

底如不隔老竹風蕭蕭長根孽青石隨風送哀絃往往
動魂魄載酒同遊遊逢奇得搜索形體相與忘山林信

吾 李原古詩 城東僅十里靈迹傳古今兩山夾寒潭
適 李原古詩 秀水清且深山光與水色上下相浮沈

傍有釋子廬高低托叢林停臚叩門扉勝槩閑追尋殿
宇隨石級危簷巧相嶽是時秋已高霜雪捲微陰輕風

弄黃葉村鳩鳴疎砧高閣瞰空迴影落澄波心晴輝射
窗壁爽氣飄衣襟僚友盡佳士璞玉兼渾金設席具肴

果酒盞仍自斟天高白日晚欲去
又狂吟誓將樹微績此地須投簪

石牛潭 在城西五十里江流中

飛劍潭 在城西七十里舊傳唐王將軍坐潭

附張運南詩 萬山厯亂石齒齒靈源遠峽傾石髓縋幽

稱姓王腰佩青虹閃徙倚上窺崩男掀天之危巖下臨

湖泝鼓地不測之涯淡靛頭飛躍化爲龍招之不得迷

霧裏延平津上已蕭條神物縱橫復如此於今沈埋幾

千年河伯荒落五丁死石門鳥道雖劃開捫壁憐然頽

失履潭水黑土花紫老藤走鼪鼯松濤嘯虎兕行人細

語雜不聞青天白日雷貫耳曲磴空有壑仙亭瀛洲遠

近知何似竹筏沿流不敢登直須凌虛泛 張一清詩

赤鯉青虹兮青虹與我斬蛟破浪乘風起 張一清詩

萬里奔騰出此中更誰倚劍耿長空傍巖欲釣波心月

出峽先乘谷口風噴石草翻蛾子綠湧磯花沒雉頭紅

壯懷恍惚延平過 破海終看戴角龍

雪谷潭 在仰山上水極 冷盛夏不可濯

宜春縣志

卷一

地理 山川

三

附張嗣古詞 崎嶇鳥道開煙蘿長松偃蹇聲蕩摩白龍怒

色雷雨收功神斂跡窮源不 得空歸來掬雪搏珠三嘆息

獼逕潭 在城南八十里仰山之上泓澄

荷花潭 在城西一百二十里四時澄澈春漲瀾漫

黃龍潭 在城北遷喬鄉水從石洞

馬鞍潭 在城西葛外

靈泉 即宜春泉在縣治西上有寺舊傳泉曰兩涌與海潮

盛乃見萬歷中知府鄭惜典寺前發墻禁人污穢魚復

出是歲應鄉舉二人明年中進士亦二人

查郡邑前志載靈泉在縣治西又載宜春泉在縣西四

里且云唐地里志云宜春泉醞酒入貢蓋指此或謂靈

泉即宜春泉又引郡守李景夏靈泉記泉宜作酒見于

吳錄晉記而泉已失所在不可復尋以靈泉醞酒出于

近世是宜春泉與靈泉異然圖經載宜春泉在縣西四里靈泉距縣亦四里則靈泉即宜春泉且攷縣治隋以前在東城內大業三年移于州之東七里宋紹興徙于城內善政坊明洪武三年遷于府治北開元寺廢址即今治是宜春泉就隋以前之縣治言之恰在縣西四里

附袁克生詩一泓冰鑑最澄清自是靈源巧綴成影映

桃溪曲聆偈如聞琴韻鳴比日錦鱗時獻瑞芹宮彩筆煥文明

珠泉 舊名湧珠泉在城南門外登為池方廣丈餘平地湧

宮徐之孟臨流憩賞泉上築臺下為樓東西連簷接棟與宜春臺相望萬歷己未知府黃鳴喬重修於樓前置

厚軒豁深窅為宜巨觀崇正未燬國朝順治庚子知府胡希聖倡建乾隆間于池上建亭名觀我今亦毀

附江皋記 宜春以泉勝志稱醞酒入貢或云在城西四里久失所在今縣治之西有寺清泉一池當

其門舊傳泉曰兩涌與海潮同中有文魚邑文物盛時乃見是為靈泉又出城南門里許有珠泉源出泉水嶺

宜春縣志

卷一

古

地理 山川

下平地湧出穿石罅中注以方池廣尋丈清冷澄澈其光可鑑微波蕩漾時噴沫波面歷亂如珠圓轉錯落掬之隨手而散上覆一亭橫以小橋可俯而濯汲而飲輕儵遊泳其中去來如空其流湯湯激田千頃民賴其利此蓋泉得地之靈而溥潤物之利者也聞之易曰坎者水也勞卦也萬物之所歸也又曰坎為水為溝瀆為隱伏為矯揉水之為用大矣哉故其流為江河匯為湖海注為淵潭激為驚濤揚為飛瀑奔騰振撼其勢動而不鵬化之舟航泛之網罟依之以至寶藏珍奇珊瑚瑤琨木難火齊百貨填委而山積莫非其源流之變幻而不可測也况乎隱伏出沒不可端倪倪矯揉波折茫無涯際如禹貢所稱沅水東流為濟入於河溢為滌或入地忽千里不可尋或出土高數丈不可抑又豈人力之所能施地利之所能盡哉若斯泉之悠然一勺也同乎水之性而異其情出乎水之源而故殊其象人之被其澤也既足以助遊觀又足以資稼穡謂非鍾山川之靈秀大潤澤於茲土也哉則所以培其源而廣其澤者又在挽狂瀾而濟巨川者矣豈徒供耳目之玩已耶

附江泉詩 兩餘秋乍寒山靜泉逾潔方池清且漣涵虛
虹疊石步數折閣勢欲凌空憑高俯一切下視泉脉幽
瀑潺出巖穴疑聞環佩聲悠然自淒咽時傾數斛珠波
紋共聯綴盤旋沙底輕素絲如可繼豈是驪龍眠頰下
光明滅何不噴驚濤微向此中泄手汲試茶鐘臨流爭
一啜恐有徑寸珠盤胸蕩水
雪堪貽飲冰人滿甕歸還挈
甘泉 在城北十五里山竇中流出味甚甘冽唐咸通二年
僧道光築室為甘泉院宋嘉祐中僧智汪建二堂郡
守李觀記

溫泉 在城西南三十里修仁鄉定光寺前氣温如湯冬可
為池一出江心巨石中石類釜上寬五六尺
平坦可坐遊者多飲此以為樂一在西岸下
附鄭燧詩 千山攬遍未須錢薄暮荒村又得泉
淨泉 在城北三十里
灌田萬餘畝

宜春縣志 卷一 地理 山川 五

叔季泉 在仰山院之左傍有龍淵亭或
傳徐瑒扣石橋謁二神之所

飛鴻泉 在城西石外鄉白沙
泉灑如篩漑田甚廣

鳴玉池 在府治內之西唐刺史張公叔後
改為疏泉為疏西陂之水至此

龍江 在城西薦裏鄉明
湖口水口外石巖下

天池 在城西一百三十里地名猪牙塘山
頂有塘大四畝四圍泉流漑田甚眾

防虞池 在府治西北與郡倉相距數十步舊為居民盲占
宋紹興二十一年郡守李觀復取歸官歲久淹塞

寶慶三年郡守曹叔遠既復李
渠并浚此泉以濟渠之所不及

菱池 在府治東南委巷
中有菱獨茂因名

西池 在城西外唐乾元中刺史鄭審開池上有故城潭
木瓜島薔薇洲楊柳堤青田壇石橋灣釣磯今毀

蚪塘 在城西北四里舊傳
有蚪龍蟄其中因名

雷塘在城東北七里初開雷震因名歲旱

蜈蚣塘在城西四十里下有山曰懸牙峻曰茅冲大冲峻

口社等處山下居民鱗集稅田萬頃明萬曆十二年因掘煤有害地方民控院司道府勒石封禁闔鄉賴以生

石湖在城西十五里湖傍平疇廣衍中忽聳一石峯高二

鑰鎖

砲沙河一名砲石河在府治內東

按嘉定志山川有笏山在州東十里了山在州西十里有寺將嶺在州西百餘里上有黃王寨石梁嶺在州北五十里地多怪石有石門白石門登嶺高百餘丈昔有十數民家居其下灑嶺在州西北四十里分女嶺在州西北六十里佛子嶺在州南五里斫岡嶺在州西北四十里桐木嶺在州東五里望城嶺在州東三十里石笋

宜春縣志

卷一

地理 山川

六

峯在州東南七十里逢岡在州南三十里十里岡在州西十里甘泉山在州北二十里高一里出甘泉師姑山在州南三十里下舊有尼寺父老相傳仰山神正殿李如嘗於此屍解今基猶存將軍山在州西百里外周迴四十里高三里世傳漢武帝時將軍易洗領兵至山遇疾卒因墓焉故名南源嶺在縣城東南四十里長嶺在州西南六十里嶺上下各七里故名石梯嶺在州南三十里南源嶺在州南四十里嶺凡五故俗稱五嶺四望嶺在州西南七里高可四望灰于嶺在州東南五里黃岡尖在州西南二十里稠江在州西十五里入秀江類家潭在州北五里鵝公潭在州東七里亦名何公潭宜春潭即坐石潭在州東五里渥潭即渥江在州北十餘里其水深渥故名清水池在舊開元寺西長三十餘丈水深而清冬夏不竭南水在州南仰山祠之前其水淵源延袤百里東流至新淦布水潭三獲潭織女潭皆在仰山歲旱禱雨即應化成巖潭在州西北三里百危亭之下賴家潭在州東七里平原上有廟與碑遇早禱雨即應石館潭在州東五里淨妙寺後或云與賴家潭相通小龍潭在州西北五里江流中上有廟曰石潭本然泉在仰山太平興國禪院中木平山泉在本山興化

禪院之左下井在州北城外一里至道光三年化成巖
僧所斫方濶四五尺深二三尺雖旱不竭泉井在州南
城門外冬夏不涸澄源池在州治內唐乾德二年邵守
呂延貞鑿方沼命名以此謂為治當澄源也明以後
府縣志俱未載今補附於此

附錄城內砲沙河一帶城外坤長山一帶二處來脈嚴

禁挖害二示

宜春縣正堂龔為公請嚴禁以杜後害事案奉署府黎
檄據宜分萍萬四縣生員王文燧黃寅李熙績聞之味
等具稟郡城內西南一帶俱關學官官署來脈曾經嚴
禁挖害第恐日久玩生請再示禁等情飭即查明該處
一帶地方毋許居民開挖以固來脈等因到縣奉此合
行出示仰該地居民人等知悉郡城內西南一帶泡沙
河桃花園茶園嶺等處俱係郡城來脈爾等嗣後不得
在子該處豎屋挖塘墾土種蔗故意傷害自示之後如
敢故違許該地保等立即指名稟縣以憑拿究斷不稍
寬該地保亦不得藉有此示混行阻擾致干併究各宜
凜遵毋違特示嘉慶十三年三月十八日示勒石府學
前魁星閣下大街

宜春縣正堂程據舉人黃邦達等稟稱袁郡來脈自小

地理 山川

宜春縣志

卷一

七

仰山作少祖星峯聳拔行三十里為坤長山即俗呼屏
風山穿田過峽突起高峰入城今被王魁文王能文楊
學峻郭忠林鍾德旺等挖鑿燒窰致居民莫能安生稟
明府縣學師移送案下沐賞親勘有碍來脈屬實沐訊
柳責押令拆廠下山取遵具結在案惟恐日久玩生故
智復萌合應公懇終恩賞示嚴禁以垂久遠等情到縣
據此除稟批示外合行出示仰閭邑居民人等知悉嗣
後如有不法之徒在於郡脈坤長山一帶要處豎棚開
窰挖石燒灰許該地保諸民人等立即指名稟縣以憑
拿究斷不稍寬各宜凜遵毋違特示道光二年六月十
一日示勒石三兩立坤長山一立府學前魁星閣下大
街

府縣案內嚴禁二示

宜春縣正堂陳為滅禁強挖頒救來脈事據生員張紳
魏國相等詞稱袁郡城內西南一帶來脈實為官署學
宮士風民命攸關歷來培護無傷地靈人傑後被不法
棍徒強行取土種麻挖成深坑致傷元氣生齒凋耗人
文寥落已前合邑士民呈稟府縣荷蒙委勤責懲歷有
嚴禁告示押令填滿改種別苗在案以故十餘年來棍
黨知係來脈無虞官署棠樹士民安堵不料去年又遣

一黨異棍金子龍胡端生等止圖蠅頭小利不顧來脈
重大滅視前禁任意開挖不惟取土成坑且多掘糞窖
深至丈許大傷地脈官民受害

聖廟不安土風不振生等目擊心酸難甘緘口爲此粘
呈前官長禁示公籲仁廉俯念合端生靈趨茲冬月麻

收貨准親勘凡遇城內強種麻之處押令棍黨填坑以
種別苗取具遵依勒石永禁以至來脈以培根本合郡

頂祝切稟等情到縣據此除即親詣查勘當經爭獲強
挖人等訊明責懲押取不敢再犯遵依存案外合行出

示嚴禁爲此示仰該地保甲居民人等知悉嗣後倘有
不法棍徒敢于西南二門一帶來脈處所任意開挖栽

麻者該地保甲人等立即扭稟本縣以憑嚴拏重究斷
不寬恕各宜凜遵毋違特示乾隆十三年十二月初五

日示
宜春縣正堂郭爲嚴禁強挖傷脈以培地靈以固金湯
事照得郡城西南一帶來脈實爲官署學宮士風民命

賴以鍾靈歷來培護後有無知棍徒種麻取土剝削元
氣據各士民呈稟究懲取遵示禁各在案茲據生員黃

大華張紳民人魏仲仕饒旭文等爲恃蠻強挖違禁傷
脈賞勘究懲事具稟前來詞稱袁郡西南一帶爲合郡

宜春縣志

卷一

地理 山川

六

來脈要地實係官署學宮士風民命攸關歷來培護無
傷後被不法棍徒強行取土挖傷地脈剝削元氣以致
生齒凋耗人文寥落已前合邑士民具稟府縣荷蒙親
勘責懲立有示禁取具各棍遵依在案去歲慘遭異棍
鍾宗周等在于城南過脈要處鑿山平基豎造公館開
屋恃衆強挖大傷來脈止圖壯己之觀瞻不顧滿城之
生靈生等呂擊心酸公彈伊非惡等自知罪戾情願填
補醮謝詎惡口是心非不惟不加培補今春復行在于
傷處挖進數丈現出過脈長百每日又在西城脚下挖
挑黃土地脈被災城垣受害不願法究官民不安爲此
情急粘呈歷憲禁示公叩仁廉俯念官署學宮一部生
靈遭惡毒害賞准親勘豎法究懲押取不敢再犯遵依
出示嚴禁合郡頂視激切上稟等情到縣據此查城南
過脈要處如泡沙河茶園嶺等處俱屬地脈不容鑿山
平基造作閒屋其西南一帶又屬官署文廟來脈且經
城垣新修尤須保固何得在城脚附近挖取黃土種種
爲害除經詣勘訊斷令將後棟折毀填坑補謝從寬取
遵在案外合再申禁爲此示仰該地保軍民人等知悉
嗣後西南一帶來脈處所稟行嚴禁不許挖掘傷害及
恃強取土有損城脚如敢放違許該地保民人等立即

指名稟報以憑嚴處倘保隣狗隱不報一經察出定卽
并拏究治決不寬貸凜之慎之毋違特示乾隆二十七
年二月十四日示

宜春縣志

卷一

地理

山川

九

水利

秀江水發源萍邑羅霄山由蘆市宜風而下至薦外鄉柘

桑始入宜境又二里為新溪街左合北河北河水有二源一自薦裏鄉荷

花潭東南流至此西九七竹亭合天台諸山水始通舟楫

又東南至兩江橋與石裏石外鄉水合一自石裏鄉建陽

寨諸山發源東南流至白沙合石外之下墩水薦裏之魯

溪水又東南至飛劍潭出峽至繞洲橋合蕉源水南流至

兩江橋與薦裏鄉水合更五里至東流十餘里至淇田右

曬塘又十里至新溪街同入秀水

納螺江水其水自石溪穿發源又東十里左合稠江水其

自北石外化比等鄉又東二十里抵水汊右匯麟橋水其

歷新田橋入稠江又東二十里抵水汊右匯麟橋水其

上合三流一自老山經劉家坊賈溪名清瀝江一自溫泉

經大埭上長豐一自仙源經鞏溪下鞏皆會於了山始入

麟橋更五里為郡城北關下夾狀元洲旋分復合右納城南

宜春縣志

卷一

地理 水利

之珠泉水歷二十里至下油納流最多一自仰山三鑊潭發源歷獺徑潭東

流出梅洲絳橋諸境一自鄧表峯發源灤洞三十里歷明

村合南廟水出郵橋至下浦廣潤橋一自澗富嶺發源歷

黃源路口出新坊又二十里至渥江北納三陽橋楓林水

又二十里為分宜洋潭左納洋江水其水上匯二流一自分宜琴山背上及紐

村會白水一支合分邑楊橋朱陂及本邑橫塘諸水一自

琴山前納本邑漠塘洞水出分宜新安會本邑栗村分邑

灌陂又十里復轉本邑鵬津又三里左納門江水其水自分邑

諸水又十里復轉本邑鵬津又三里左納門江水其水自分邑

山歷鳳陽橋又五里右納秧陂江水又二里至彬江南匯

勉村至門江又五里右納秧陂江水又二里至彬江南匯

南源水其水自大嶺發源一自五嶺發源至林家坊合

赤橋彬田等又納南岱水其水自南岱歷鄰家坊又納白

處入於江又納南岱水其水自南岱歷鄰家坊又納白

竹裏水十五里至江斜復入分宜界歷昌鍾二峽至臨江

合贛水同歸省會此秀水之大概也

其別流不入秀江者東北三支一由乾陀嶺為石曹坑水
一由清溪嶺為潤溪水同出上高一由河溪嶺會慈化諸
水出萬邑珠樹潭俱入瑞河南流三支一發源明月山歷
本邑唐佳山廟下一發源仰峯歷南坑中村塘溪一發源
濤珠江歷下村俱出安福入贛河西流三支一由白家源
出龍門岡會大潭小潭兩泉至青草坡歷滄江霞苑合中
坑之水過滄下一由潭前菴出快榮磨坡頭會蜈蚣潭水
抵蟠龍岡一由上洞出梓木至石關口會滄頭小洞等水
俱出萍邑入湖南湘江此分流各派之大概也

宜春縣志

卷一

地理 水利

二

李渠

李渠源出官陂

城西南十里今福昌里新田橋下十數步即陂口也

其水自清瀝江

來

城西南六十里

江源出老山

清瀝南十里

地名仰下

仰山周回百餘里仰下在其西

山頂有瀑瀉下為此江過了山

城西十五里山下有藥浮陂

至渠口分

為二派正派為沙陂

城西五里瀝田二萬畝

支派為官陂

溉田二萬畝

事始

唐書地理記云袁州西南十里有李渠引仰山水入城刺
史李將順鑿攷將順以憲宗四年守袁州時州多火災且
民居負江汲漑艱甚將順以州城勢高秀江低地數丈不
可堰使入城一日與僚屬出西郭門知南山水可堰乃鑿

渠引水溉田二萬畝又決而入城繚繞閭巷其深濶可使通舟邦人利之目曰李渠仍於城外西北築塘名曰溢州中留二島曰臥龍作亭其上曰仁智曰義政自塘穿渠繞州治與李渠接東流直出本縣南至赤板橋入石潭

繼修姓氏次序

宋至道三年郡守王懿

距將順一百八十九年

知袁州時州人頗困

於火懿曰郡之火無水備耳命眾協力分治舊渠民歌之

曰李渠塞王公開四境惠利絕火災

天祐三年袁延度

舊志誤作延慶石碑作延慶

通判袁州

距懿二十三年

有能

名時民新罹火延度復濬舊渠為備刻石記其事仍創疏

宜春縣志

卷一

地理 水利

三

泉亭賦詩見志

詩云本與居民禦火災不辭迢遞費紆廻夜澄明月家家到春泛飛花處處來漱淥

寒聲喧巷陌碎光紅影見樓臺凭欄如解思經始知我為亭有以哉

宣和六年孫琪

即延度百有六年

通判袁州到官未幾民三罹火

琪贊太守林徽之委宜春尉馬緘治西陂兵馬監押趙士

勿浚舊渠琪自為記

附孫琪疏泉記

宣和六年春正月予始至袁未幾民居三火而求水艱甚詢其故則曰井泉不豐歲旱輒涸仰水於江汲遠而售貴常以為病故緩急之際不足供綆缶昔嘗堰取仰山水為西陂溉田而以其餘轉緣城中為火備今渠塞陂壞田變為陸不知幾何年矣博訪耆老莫知其端而老吏劉澄者出天禧三年通守袁延度疏泉亭記具載始未顧其石雖忘而跡可考又按合許歲委軍吏部役開決以防火災則知興廢之跡開浚之法其詳如此惟

吏多苟且慢令不恤民瘼耳予為敢不勉冬十一月農
功既秋乃召宜春尉馬緘治西陂乃召兵馬監押趙士
勿浚渠未浚日已告功支分派通皆復其舊田不病既
居不病汲緩急之際不病救邦人歡呼樂復其利予於
是樂斯民之樂而嘉前人之志感興廢之迹而懲苟且
之習蓋自唐元和及今凡三廢而三復矣焉知今日之
復能無後目理廢之患乎因復刊袁公記於石而書其
後庶幾異時體國愛民者有考云七年三月望日記

純熙四年張杓

距琪五十四年

知袁州教民導渠千五百餘丈市

中古有義井為豪民湮塞亦皆浚治而揭其名

十年曹訓

距杓七年

知袁州以李渠廢而不治命工疏導水復

通並刊圖經所記李渠事龕於疎泉亭壁間以告後人

宋寶慶丁亥距唐元和四年踰四百載自將順後繼修名

氏可傳者僅五人嗣後歷年既久湮塞愈多春夏之交城

宜春縣志

卷一

地理 水利

四

中疫癘間作民每以為病是年直文華閣曹叔遠來知袁
州下車之日訪民利病亟議修復人以湮塞既久或者難
之叔遠曰興利除害州守責也利孰大於李渠其可以塞
小功殷遂已乎乃相水源觀地勢規撫經畫一出親授官
吏聽焉甫闔月渠成邦人莫不鼓舞相慶又恐久之復湮
乃委邑貢士李發專管引水湖

其浚治程法除具於後

明洪武初年知府劉伯起復修宏治間知府朱華繼疏之
正德八年知府徐璉大加修治建亭於罄溪顏曰浚渠自
為記

附徐璉浚渠亭記

宜陽官渠考諸志唐元和申李公將順因郡民恒罹火
患距西郭外南行十里許舊俗名鯉魚潭下雨溪夾洲
相地勢築陂漲水鑿石開渠延山麓引入城縈迴曲折
可容小舟抵東門北隅注秀江其始為弭火災而民田
藉以蔭灌者不可項計其智謀許遠比之白公穿池陽
渠鄧艾開白水陂功尤過焉郡民目之曰李渠後二百
年於盡宋至道中王守懿大疏之元禧年通判袁延度
再疏宣和年通判孫琪繼疏年久湮塞至我朝洪武初
劉守伯起重疏如舊迄今宏治年朱守華疏後壅頽日
甚正德癸酉歲璉來守抵袁江北嶺火起左右告曰舊
有官渠備火久塞當疏予拒之曰甫下車未能反風以
拯民災遠興征役勞民力費民財殆有不可未及旬日
回祿三報民心驚悸子曰古渠之疏或有待於子耶乃
詢及吏民耆老謀諸僚友皆曰當疏遂督集夫匠循舊
堰址壘石覆土高數尺濶丈餘堰固勝昔滄州培川夾
壑砌頽未半月告成上下流通外而原隰坳窪內而井
塘池圃灌漑霽足居民飲食滌濯咸取給焉繼後防微
杜漸視其塞者即疏之水流通不息適今戊寅上巳前子
與諸同寅巡行渠堰處見熬谿委會地勢殊勝嘉其景
而憇焉縣尹張參亦與畫經久之計欲建亭立石以記

宜春縣志

卷一

地理 水利

五

事逾月亭完予携僚友會飲以落之棟簷軒昂窗扉耿
爽背巖谷而洞流穿石越嶺湍激潺湲溪前有怪石盤踞
巋然巖然如企如伏其遠岫翠巘環列巖巖傍林多楓
柗松篁近渚多蒲荷蘭芷野花競香幽鳥諧鳴娛心悅
目予歎曰山水之景在在有之顧所遇何如耳會稽山
陰不有蘭亭則崇山峻嶺茂林修竹付之荒沒斯亭之
作山增其輝水益其媚於浚渠不信有微乎合尹請予
名亭以記予遜在坐者各立名擇之少頃有曰香泉有
曰清流香泉則取醉翁琅琊泉香酒洲之義清流則取
五柳東臯臨流賦詩之義命名雖美吾懼後人欣慕異
景將以為登游逸樂之所於古渠之通塞不加之意焉
予因名曰浚渠使登斯亭者知為渠而苑又知渠開創
於前者如彼之難繼浚於後者如此之易利澤及民者
又如此大且遠修葺疏導自不容懈利民之功將垂之
無窮豈特專美於前哉衆皆稱善遂扁諸亭而刻諸石

萬曆三年知府鄭惇典復循故道重修四十七年知府黃
鳴喬重疏明末迭遭兵燹水泉莫通

國朝康熙八年知府李芳春定議修渠委照磨吳允慶巡檢

魏映奎分董其役工竣鄒檢討度瑛有記歲久復涇雍正

六年知府薄履青知縣王淑京倡眾捐修渠復通

附鄒度瑛修復李渠記

開之一年之計樹穀十年之計樹木百年之計樹人千年樹
德皆不欲為其僅也僅則為目前所謂難與圖始易於樂成
而止是也不僅則不為目前所謂難與圖始易於樂成
是也今我李公之復修李渠誠樹德務滋者哉郡之有
渠起於唐憲宗之元和四年刺史李公將順以員外郎
守袁時袁多火災公適堰南山水入城緣繞間巷深淵
使可通舟此渠之始事也至宋太宗之至道三年州守
王公認以秘書丞任袁因渠梗州賴困於火乃理舊渠
而新之民是有李渠塞王君開四城惠利緜火災之論
後聞有疏淪埋塞相仍亦未有經久之規理宗寶慶丁
亥置華文閣曹侯叔遠寔來下車之初訪民利病亟議
修復而渠成嫩繼諸如溝之滅水接水斗之在內在外

宜春縣志

卷一

六

橋數之大小渠長所率之陂戶甲戶李渠志詳哉言之
遂為茲事底績焉此渠之繼事也明郡侯徐公璉修之
則有浚泉亭記而鄭公博典黃公鳴喬皆赫赫有治聲
者靡不先心於此為地方求莫計至
國初而渠猶名具茲郡者非不志修而格於久廢紐於動
眾者有之即今日修矣而無當前此之修抑今年修矣
而無當後此之不修噫又易能為茲事底績是則渠之
待人而舉於我公信然矣一日幾務之暇同協鎮許公
壯猷邑侯陸公柯謙鄉先生袁公繼梓及文武屬往視
渠源於陂口再四審量不憚紆步相水勢度地宜調某
處當堵某處當浚不局為從前增卑培薄之智凡有規
劃一出中裁而復愈稽之此治其源者善一也自陂口
至西城約十里必親歷其沿務所疏濬皆得其舊自西
城渠口至報恩寺入江迤而北而東凡數十折其深廣
皆務徹底此清其流者善二也經始於曠之初告成
於月之念五不費民間一絲一粟唯做古至冬乃役公
旬三日之力每越日單騎出郭且慰且勉為時無幾而
遠近內外一如子之趨父事而渠乃集大成焉此節其
力者善三也一舉而三善得謂非事之待人而興有若
此哉至若水利之溉田二萬地版之流通滋遠與夫汲

引之甚便疾疫之不作又皆良法之種種相連者而謂
我公之德不慶遠流長哉雖然公之造袁匪僅一渠其
多所修葺為輪為輿者載在口碑未易悉數然即渠以
論其入人深又何如也昔狄梁公為魏州刺史民祀之
生祠及徵入朝民猶於祠月朔舉酒灌奠而梁公在朝
有醉色今者渠成而使後之君子臨流而觴詠小人擊
壤而謳歌知我公之在
朝端亦必有洋洋盈耳之聲則袁與魏人之思將無同時
余以同門朝諱文衡授郡士且以巖末請余記余諱不
敢辭得總其要畧而為之言且以志私竊嚮往云公諱
芳春號煥章三韓人登順治甲午鄉
進士歷宰沈邱刺岢嵐俱有循卓聲

自雍正迄道光中隔九十年渠又塞邑侯程國觀議開濬
選邑貢生蕭元善劉樹芸董其役閱一年告竣知府鄭心
一記自是至今近五十載濬者又不免復塞同治五年邑

紳劉作賓胡開元恐塞久疏難乃勸民商捐資大為疏導

宜春縣志

卷一

地理 水利

七

雖徑途有異而流通固無滯矣

附鄭心一重修李渠記

蓋聞民計在農農力資水水利不興旱澇皆足為農病
袁居豫章上游水勢易漲易瀉無滯導宣之法往往
傷於旱復傷於澇唐州刺史李公將順乃堰南山水鑿
渠通流溉田二萬決而大城至東城隔北折入秀江邦
人利之名曰李渠自後修於宋者六修於明者五修於
國朝者二其疏濬之功相距或百數年或五六十或
三四十或七或八年危期有久暫用力有多寡皆因歲
久淤塞水泉不通民甚苦之是以歷經疏濬惟自雍正
戊申以後閱今九十五載渠遂堙廢如故余蒞袁之明
年適程大中丞來撫江右首以興修水利督率寮屬宜
邑令程君國觀始倡議開濬焉遂擇邑貢生蕭元善劉
樹芸二人實董其事其自官陂口分清瀝江水入渠依
山曲折循畝穿林自北折東達於城西萍實橋下入城
至府學齋署前鑿以方池約寬三畝為渠水滯蓄之處
圍以石欄中甃石橋其明溝暗渠凡數十折水循故道
清流汨汨如縈如繞以資灌溉以便民汲總計凡一千

九百餘丈興功於本年九月
年幸觀厥成焉夫功必待人而興而功始成事必擇人
而昇而事始善是役也程君經營規畫不辭勞瘁絕無
畏難退阻之心是能興廢舉墜勤求民莫者而得蕭劉
二子矢公矢慎襄厥勞勩相與有成謂非細潔自好而
能事者與此邦之人驩欣踴躍無不樂其樂而利其利
矣子守茲土於民生至計固宜因勢而利導之而兼表
率之責茲幸千有餘年之故跡中間興復者不一人疏
濬者不一時屢修屢廢而於近百年之後一旦窮原竟
委泉流不竭俾民間灌溉有資汲取甚便此何如功利
及民又非大得民心允洽輿情烏能底績哉尤當斟酌
籌畫銓次善後俾渠身無殘缺無壅淤傳之世世咸資
利賴是又子
之厚望也乎

附錄曹太守叔遠治渠次第

渠水自官陂口東流越二十餘丈有鄉民毀隄分水而北
以爲水磴由是渠水入城者無幾乃首命役夫塞罅增庫

宜春縣志

卷一

地理 水利

八

嚴其毀撤之禁越九十五丈踰爲橋以便往來自橋以東
渠與江並流僅隔一隄隄不滿二三尺江流湍急日夜衝
嚙其下隄以此輒壞越百餘丈隄沿江曲轉山下多巨石
渠以此益狹且去江尤迫常岌岌欲潰今植木爲柵實以
土石高濶眠舊踰數尺仍截江築官陂四俾江流背隄而
趨隄自是始固山下巨石夾以積薪淬而鑿之渠自是始
寬過此渠與江相去漸遠江則趨沙陂落麟橋以合於秀
江渠則傍山遶田迤邐東注越二百五十餘丈地名小水
口闊其地爲一斗係第一深五尺長九尺濶二丈七尺又越
二百五十餘丈其地古有水斗久爲冒占浸以湮廢今升

而廣之周遭可三十七丈深一尋係第由是西至陂頭展

築新隄七百餘丈隄舊不容一武今可通車首尾立二華

表扁曰新隄越八十餘丈北至茂林渠轉而東復為一斗

係第三斗濶二丈深丈餘凡斗皆因渠流奔湍使之渾涵停蓄

盈科而後進既出茂林地勢浸高隱隱若岡隴狀渠深二

丈許水始可通疏鑿之功倍費焉又越百餘丈由崇勝院

前過西甍橋歷社壇出官圳巷居民以板覆渠屋於其上

者三十餘家官給費以助其開浚至州城西門萍實橋下

即其處立華表扁曰唐李公渠渠抵西城下曲轉入城恐

卒有暴漲水口不足以受之乃於城下展塚為湖旁為一

宜春縣志

卷一

地理 水利

九

開渠堰則啟閘分水於湖以殺其勢因扁之曰分水濶可

二百丈中植荷旁植柳雜以花竹翫亭五間扁曰玩芳北

望多李花扁其軒曰雪映總扁之曰李渠亭去亭十餘步

為屋三間扁曰菽房俾護渠者居之以司是閘之啟閉又

於水閘之北創亭曰激湍

西城下渠口蓋渠水入城之咽喉傍城舊有斗歲久遂為

比近居民傾積糞穢之所水不復通今浚深丈餘濶一丈

二尺即其上創屋三間為仰山祠使民有所畏無敢踵前

之為者自渠口入三登坊大街過子城背將入郡圃復為一

斗繚以垣牆居於其旁以為看守者居止之地自此穿郡

圍繞延月橋過虛舟入鏘璆亭下下漱玉之左向修稷亭
東牆而出歷袁公祠前屈曲四十丈析而爲二一越龜石
巷小街入判官廳西池內流入倅圃石澗此係古渠正派經花園
內穿牆而出一小派北流過判官廳迴屈曲數步卽落江
一正水遠流從古渠橫越疏泉坊大街遂折而東歷民居
一過韓文公祠歷民居五至泮水又歷民居五轉獎廉坊
斜歷民居三越大街而東歷民居十有一過常家巷小街
歷民居九過鐵爐後巷小街歷民居四又折而北穿神問
坊大街歷民居十有二越街東復折而北歷民居三過治
平院又歷民居三過蔡家巷小街歷民居十有九轉而入

宜春縣志

卷一

地理 水利

市過獅子橋下南經民居六經右龜目井華表內歷民居
四過蔡家後巷小街歷民居九過萬家巷小街歷民居十
有七過論思坊小街歷民居三十有三又斜穿集雲坊大
街歷民居十有四過半城營口歷民居八自此越大街而
北復折而東又歷民居十有五穿迎恩愛棠東行衙三驛
過報恩寺入貢院轉而北會於秀江此渠古稱可以通舟
則其初深濶可想兵火之餘民居日益侵占今慮爲民擾
不欲毀撤止令家自開浚官備其費餘則官自浚之濶皆
三尺以上凡渠水所經巷陌之衝舊爲暗溝覆以磚土今
悉撤爲明溝深廣皆丈餘非特可以驗通塞亦可以便汲

溉里巷好事者爭願出力跨橋其上丹堊煥然橋下清流汨汨繚繞城市耆老聚觀以爲前所未睹云

減水溝

減水溝凡三所一在獎廉坊之街東穿民居而北又自甘棠坊口轉而西流復折而北落通泉坊注於秀江一在市心越大街而北經阜通坊街西自善利坊注於秀江一在育材坊前越大街而北經育材坊內注於秀江此三溝者所以防渠水之溢本宜於此各置一閘時其啟閉但渠流民居舍下置閘實難今於三處溝口砌高三尺許水溢則俾自流而北每溝各浚斗架橋

宜春縣志

卷一

地理 水利

十一

接水溝

接水溝凡三所乃諸溝水與李渠相接者一在州學西桂仙坊前每雨驟至溝狹既不足以容而渠湮塞不流卒泛溢於街深至尺許往來者以爲病今於學之西牆外拓地幾二丈鑿新溝深與渠等而濶過之以其餘地創亭三間扁曰濯纓環亭植竹以爲諸生遊息之所一在積慶坊一在熙春坊每溝各浚斗架橋

斗總數

大小共
三十七

小水口

古斗

茂林路前

城西仰山廟下

子城背

三登坊大街橋下

疏泉坊橋下

獎廉坊橋下

常家巷橋下

鐵爐後巷橋下

神間坊橋下

蔡家巷橋下

古龜目井橋下

蔡家後巷橋下

萬家巷橋下

論思坊橋下

桑雲坊橋下

牢城營門口二

營前大街橋下

迎恩坊橋下

報恩寺門內二

貢院二

右係李渠所經處

靈泉坊口橋下

右係自通判廳牆下一派向北流去

桂仙坊口橋下

積慶坊橋下

熙春坊橋下

宜春縣志

卷

地理 水利

三

右係接水溝

甘棠坊橋下

通泉坊橋下

市心獅子橋下

育材坊大街橋下

右係滅水溝

通泉坊橋下

即鮮魚巷

飭化坊橋下

阜通坊大街橋下

右係市北諸處溝水與滅水溝東西相接

橋總數

大小計二十七
西城外者不與

三登坊內

疏泉坊內

靈泉廟巷口

通泉坊口

獎廉坊內

甘棠坊內

桂仙坊前

積慶坊內

神間坊口

市口獅子橋

右龜目井路

阜通坊內

集雲坊內

育材坊內

已上大橋十四

子城巷內轉處

子城背斗邊

常家巷內

鐵爐後巷

熙春坊口

蔡家巷內

涌泉坊內

蔡家後巷口

萬家巷內

論思坊內

飭化坊內

育材坊內

迎恩坊內

右共小橋十三

此宋志所載李渠開浚始末甚詳今具書之雖代異

宜春縣志

卷一

地理 水利

三

事殊亦仍其舊云

附程國觀新修李渠分段丈尺圖記

渠凡一千九百六十五丈分十二段

繪之圖以可斷處為起訖仍載所
 丈數目於各圖之眉並彙記於此
 第一段自簷家橋下引源由新堰分水入陂口至鑿石
 處計二百六十五丈沿河障以長隄鑿石處有橋渠在
 水可從橋下開口分注大河也重建龍王廟在其上又
 有明太守徐璉浚渠亭記大碑第二段自鑿石處至獅
 子山尾計一百五十五丈第三段自獅子山至鳳凰山背
 計一百三十丈第四段自鳳凰山背至鳳凰山背尾上
 計三百丈此三段渠傍山行去大河遂漸而遠至山尾
 河從沙陂橋東注入秀江合流矣沙陂橋者即廣惠橋
 今請議叙邑監生徐汝亨所獨建者是也第五段自鳳
 凰山背尾上至官圳弦上計一百二十五丈此處兩岸
 夾渠多民居第六段自官圳弦上至白馬廟前計八十
 丈立有華表渠亦折入民居矣第七段自白馬廟前至
 黃泥巷計一百四十三丈皆穿繞民居或屋後曲折而
 行間有塘圳蓄水處既折而北乃出黃泥巷第八段自

黃泥巷至西門城脚計五十六丈渠既出黃泥巷折而東出西門外大街皆從民居屋內暗溝出復折而北過萍買橋下曲趨城脚矣此處向有闢水閘水旺則啟關分水入湖今並甃石作一池俾有停蓄又其上仰山廟基火圯今當復建仍造一閣以供憑眺邑人士亦可肄業其中湖水下注秀江是則西城脚至陂口一百四十九丈之工程也第九段自城脚至二府巷計二百四十一丈由城脚入民園內水塘折出常平倉前至登瀛橋皆東行明溝復折而北靠府署圍牆皆暗溝有斗又入府署後園三折出二府巷第十段自二府巷至府學鬢牆右計九十五丈此段一路均失故道就形勢於二府署左右尋挖皆丈數尺深得有古溝脚沿至民居屋內出判官巷瓦子坪復穿民居始接府學前之明溝今悉作暗溝二府署園內有二斗又上房階下甃一池上架橋又判官巷凡六斗渠向經泮水今稍前乃於學署門首開一池中甃石橋水可稍蓄亦以視渠之盈縮也第十一段自鬢牆左至中十字街口計一百四十四丈第十二段自中十字街至府城隍廟後園循城脚出城計二百六十六丈渠出秀江矣此二段悉多暗溝至城隍廟後園仍係明溝又校場頭開一小池圍以花牆具

宜春縣志

卷一

地理 水利

古

註圖中是則城內七百十六丈之工程也蓋卽寶慶時浚治次第如此惟第十段溝脚多沒非若前後兩牆顯然竊以康熙雍正時所浚或未必悉通不則何以僅隔九十年獨此段湮塞無跡至減水溝接水溝悉如舊圖中亦不詳其段落渠既告成邦人相慶爰記其浚治次第以附於篇亦使知功不易就云道光四年十月

陂塘

詔仁鄉

徐家坊塘

楊羅埭塘 欽賢里

滑陂

龍板陂 大安里

末陂

后陂

鄭陂 二畝

窰壩腦陂

均陂

合掌坑塘 茂林里

長源陂

檣陂 合興里

黃土陂 欽名里

中洲陂

石陂

陳田陂二

良陂

塔下塘徑化里

白沙陂

中州橋下陂湖岡里

按府縣前志分詔恩仁孝為二鄉後奉制裁併為一其欽名徑化湖岡三里四畝之名亦裁

歸化鄉

增陂湖溪一 嵩七甲

桐車陂

栗源陂湖溪里一畝

秧陂二 畝

彬陂

羅家陂三 畝

石虎陂

梅田陂正平里一畝

梅陂

白竹陂

山心陂二 畝

張舟陂

新陂

梅塘

官塘宜化里一畝

宜春縣志

卷一

地理 水利

五

上黃陂

枳陂

賽力陂

黃潭陂二 畝

廝陂

戚陂

鄭陂

宋陂

溝陂洪徑里

源頭陂大康里

化南鄉

都陂

新車陂

下賽陂

大陂善東里一畝

雙塘陂

廣機陂

泉塘二 畝

湖家車陂

湖墻陂

石車陂

田段陂

楊坊陂

龍源塘

白湖塘

朱麥源塘

楊塘

荒塘三畝

龍塘陂

小源塘

逆蔭塘

鄒家塘

泉塘

在台洲關帝廟西頭係中坡鄔家坊衆姓契管之業

百戶塘

南東畝

蔭馬塘

諫山塘

小源塘

長坑塘

南塘

南西里

易家車陂

高車陂

翁家車陂

謝陂

顏家車陂

石湖塘

溉學田民田甚廣

樟木塘

石湖坑塘

貴東里

桐車陂

黃家陂

張家陂

新車陂

新陂

老木塘

李家塘

鴻鵲塘

貴西里

宜春縣志

卷一

地理 水利

六

蜈蚣塘

城西四十里詳山川志

蓮花塘

在邑西泉塘水湧如珠蓮花滿塘

王家塘

在泉塘上社蔭注民田數萬

薦裏鄉

桐車陂

社陂

郎中陂

新陂

姜陂

南塘陂

南岸陂

和尚陂

車陂

漣陂

九七陂

瓦甕陂

大陂

冷水陂

木龍陂

龍立陂

片一三畝

馬安陂

張家陂

何家坊陂

萍陂

李家坊陂

新陂 片二
畝

下陂

荳麥陂 片四
畝

車碓陂

橋下陂

社前陂

山前陂

鳳山陂

磨陂

江陂 片五
畝

青草陂 片六
畝

黃土陂

劉源陂 片七
畝

長塘 片一畝方廣十畝內有泉
源為彭姓開濬蔭注塘

集成塘 城西薦裡鄉咸豐壬子黃葆
元倡濬册經知縣林駿訖

乾塘 在薦裡鄉方
廣數十畝

薦外鄉

下坊陂

郎中陂

李家陂

宜春縣志

卷一

地理 水利

志

廟前塘 福上
畝

兩江陂

坐郎陂

新陂

黃泥陂

連村陂

邱家陂

指榮陂

高埭坑陂

石陂

皂隸舟陂

湖家車陂

三車陂

毛家坊陂

橋頭陂

趙家坊陂

廟山陂

羅家坊陂

早禾塘陂

張公陂

江東陂 福中
畝

姚家村陂

黃家陂

楊家車陂

江東陂

牛車頭陂

桐車陂

巉塘陂

雞子坑塘

湖理塘

東西坑塘

二劉塘 二十福

義坊陂

楊家車陂

上黃沙陂 二

黃沙陂

棠下陂

茅家陂

魯榮陂

高車陂

院前陂

良田陂

迷馬塘

駱家塘 十九福

湯家嶺陂

潭前陂

高車陂

中下車陂

羅塘

王家塘

草塘 再興里

泉塘 在招桑上首地名石嘴頭蔭

和尙陂

奪補陂

胡家陂

攔江陂

界首塘 二

施家陂

坊陂

宜春縣志

卷一

地理 水利

夫

山口後陂 安常里

上車陂

南道陂

徐家坊陂

馬欄坊陂

中車陂

中洲陂

上車碓陂

泉坑塘 長平里

木堯陂

壬家車陂

雙車陂

單車陂

曹家車陂

高規陂 在小江口彭姓汲井泉流東邊為

泉背陂

潭邊陂

凍陂

周公車陂 二

姜頭陂 二

大坑陂 二

侯公車陂 二

貴壽車陂 二十福

花橋陂 新

石裏鄉

前茅陂

金山嶺下陂

丁家門首店前陂

石馬鞍陂

灌塘陂

水口山陂

盤田陂二

柘源塘大一

盧家坊陂大二里一

南岸陂

曾家坊陂

殷家塘二

冷水陂

殷家陂大三里

雞籠塘太五里

石下陂

南岸塘勝東里

石外鄉

大新塘

上仙塘神東里一

寶山橋陂

埭下塘口陂

西鄉市卒陂二

叔翁坑陂神西里一

牛子塘三

松楊陂

桂陂

大水陂

陳家坊陂

鐵爐陂大上

宜春縣志

卷一

地理 水利

九

煩陂

官陂

廖陂

金瑞陂

石下塘大下里一

石下陂

茶陂二

石下陂

黃土陂

鄒家坊陂長上

韶陂

茅陂

桐車陂

賀家陂

桐車陂

旱口陂

官塘長下里一

易家塘二

澤陂

石欄陂

市陂

平埭塘

白竹塘長中

潭陂

石陂神西里二

觀陂蔭注北社墩有圳係長下一

練塘城西北石外鄉湯姓衆管方廣二十畝溉田十餘畝

修仁鄉

板陂 安豐里二畝

潮陂

湖陂 三畝

假溪白沙陂

下坑陂 奉化里一畝

黎江陂 二畝

高陂

油坑陂

上下山陂

二龍陂 三畝

大陂

官陂

涉陂 名得里

龍鳳陂

廣惠橋沙陂 勸善里

高官陂

藥湖陂

舟陂 福昌里

烏石陂 修仁里一畝

院陂

龍陂 二畝

高陂

塘陂

楓陂 溫湯里一畝

楓陂

院陂 二畝

宜春縣志

卷一

集雲鄉

白沙陂 入宜南一畝

樂安陂 二畝

楊家陂

洪江陂 九加南二畝

黃江陂

藁薦陂

花橋陂 觀仁里一畝

梁山陂 二畝

長陂

湖陂 十加南

黃公陂

橫陂 九宜南

澤陂 建義里

信義鄉

上林塘 禮成里一畝

大荒塘 二畝

茶園塘

古塘 三畝

燕宗塘 四畝

姜安陂

官園塘

早埭塘 五畝

黃家陂

地理 水利

桐車湖田陂

桐車黃泥陂

下石袁柳陂

廣基塘懷寧里

楓林千江陂

荷蓮塘

黃家塘

竹山塘

簡家塘

巷前塘小得北

江東陂大得北

石甕塘得南里一畝

潘家塘

石壁塘二畝

溫泉塘其泉如珠連晝夜不竭灌溉上石一帶田畝

遷喬鄉

乾陂醴泉里一畝

牛路陂

兩頭塘

和尚塘

燈籠橋塘二二三畝

焦塘

兩頭塘

天枯塘四畝

石湖塘顯視里一畝

宜春縣志

卷一

遂陂二畝

徐陂三畝

板陂

江陂塘四畝

紐塘陂

水塘

荷塘

李子塘

沙塘

刑塘甘泉里

蔣溪社塘與仁里東畝

南門陂

蹇陂與仁里西

善和鄉

楊陂

鮑埔陂

羅埔塘

良灌泉塘歸得里一畝

韓塘陂

鐵平塘

角塘二畝

蔣府志作莊陂

上水陂

社陂

龍塘

切塘與甯里

地理 水利

黃藍陂 陽東里一畝

謝家坊陂 二畝

窰前塘 名教里

井塘 安樂里一畝

鄒家坊陂

安樂陂

經陂 安樂里下畝

龍羊陂

黃埭塘

安樂陂 陽西里

成紅陂 安上畝石曹裡建

傅家陂 梅村獅布台山口

翻官陂 陽東二畝建

化北鄉

歐陽陂 信東里一畝

安陂

公陂

輪塘

扭塘

新塘 信西里一畝

小陂

皂角陂

石門陂

深塘

蔡塘 興東里一畝

仙塘 二畝

宜春縣志

卷一

地理 水利

三

狼陂 興西里一畝

小坑池陂

二井塘 二畝

會陂

施家陂 三畝

下山墻陂

五雷陂

上山塘陂

江家陂

羅家石陂 北東里一畝

任家陂

下墻陂

新田陂

陶塘

蔣家塘 二畝

仙塘二 北西里一畝

塞陂

石陂

賽下陂

殷家陂

其石陂

割碓 府志作碓

甘家陂

勝陂

橋上陂

二袁州陂

潘家陂

郭家陂 二畝

隅廂

烏泥塘

南隅一崗

郭家坑塘

東北廂

油榨坑塘

南外廂

上官園塘

後荒塘

北外廂一崗

兩路口塘

二崗

徐陂

城東十里詳軼事載徐璠事今田號徐田陂曰徐陂

宜春縣志

卷一

地理

水利

三

津梁

秀江橋

在袁山門外元至正間建舊名畫舫石架木覆

燬分宜太常少卿嚴世蕃請於父少師嵩出賜金改登

以石少師以橋名請於上賜名廣澤吏部左侍郎徐階

記萬曆戊子大水北岸一瓮連隄衝倒知縣蔣應震捐

修萬曆己酉四瓮盡頽戊午知府黃鳴喬知縣廉養貞

邑人京卿袁業泗等重建崇正丁丑江督袁繼成補修

國朝順治丙申知府吳南岱重新欄柱瓮堞辛丑夏江

漲傾壞十餘丈知府胡希聖重修去任知府李芳春接

修康熙乙巳告竣進士袁繼梓共襄是舉四十二年北

岸二瓮傾頽知府胡應麟重修工未竣解任知府葛繼

孔知縣江為龍始董厥成乾隆四十九年甲辰大水衝

圯嘉慶十九年邑庠生徐宏鵬獨力建修移橋於小北

門外即浮橋舊岸知縣徐樂山記道光二十六年橋墩

橋面損壞邑舉人徐子璠等募緣補修同治三年洪漲

衝壞北岸墩脚六年邑舉人徐夢虎貢生易雲衢等募

貲補修知縣

林祖壽記

宜春縣志

卷一

地理 津梁

秀江浮橋

在城小北門外因乾隆四十九年大水衝圯秀

贊編舟為梁以通行餘銀置田若干畝擇首事易樹

蘭陳仁厲上選梁份等管理生息五十八年署知府張

五緯嘉慶三年知府林其宴七年知府王朝颺知縣方

宗敬重修三次至嘉慶二十二年徐宏鵬建石橋而浮

橋遂廢眾以此項公產關係後來橋梁未便開銷公舉

胡雲登董理每年九月合邑清算後復撥歸宜陽書院

管理以給每年生童膏火今將原置田產續增租業均

列于後

原置田張家坊民田三十三畝七分額租四百零一桶

雷橋民田五十三畝額租二百四十四桶 彭家窰民田

二十畝除水衝破外實收額租二百五十七桶 南廟早遲田二

十五畝除水衝破外實收額租二百一十桶 蘇家塘民田二畝四分

土田七畝五分額租二百一十桶 漢路園土田十畝除減

額租二十桶實收一百二十桶 東嶺下民田二百四十九畝

五分額租四百一十三桶 又左右傍城店三所又傍城

額交租十八石 小北門外左右傍城店三所又傍城

角屋三直橋背店屋二 又一處二間 又小北門外

屋二直歲收地租錢二百文又空基八尺歲收額租一百文魁星閣外東邊戲臺背左右及後空基口上

除穀外租錢共三十五千文

續置田白木頭民田十三畝五分土田五分額租二百

六十四桶南沙陂橋民田二畝三分土田一畝額租六

十四桶南路窩前民田十畝額租一百六十桶池

塘下民田十一畝額租一百五十八桶上石民田一

畝額租十四桶張家坊民田八分額租十桶又六畝

三分額租一百一十桶又一畝八分額租三十桶

又柏樹下民田十七畝七分額租二百八十三桶小北

門新造屋五直十間

歲收額租十三千文

附徐階記廣澤橋在袁郡袁山門外秀江之上秀江于

與其驛舍在焉厥初伐木跨江而橋之嘉靖甲辰燬於

火往來者胥以為病郡人謀改甃以石遂募緣重建以

費缺弗克底於成丙午春少師太學士嚴公嗣子太常

少卿世蕃蒙恩賜假歸郡父老相率詣君言狀君為請

于公欲以屢歲所獲賜金為之公慨然曰古之居位者

先其民而後其身是故苟利于人有約已以圖之者矣

宜春縣志

卷一

地理 津梁

二

予幸際聖明忝輔職屢荷駢蕃之錫懼無以勝焉矧台

父母之邦望予以濟其曷敢自吝而不以急其所不

哉遂出金二千七百兩餘命太常君從事乃擇匠而與

之謀募工而授之役增其高十之三厚築之以防水之

決溢經始于是年八月明年六月告成廣二丈表三十

二丈有奇于是行旅之經其上者坦然如履康莊其秋

公以橋之建出自賜金具以疏聞上親賜名曰廣澤言

公不自私而克廣其澤也嘉名載錫山川增賁于是巡

撫中丞傅公巡按待御伊君方伯喻君合辭以謂是惟

少師公彰君之賜是惟聖天子重輔臣之請乃希闕盛

事不可無紀爰命有司建坊樹碑于江之濱書來屬階

為之記階闢之三代以降願治之君莫不欲康又兆民

以宏大業而時無其臣則其澤不能以下究其士大夫

之賢者亦莫不欲利濟斯民以行所學而弗遇其君則

其勢不能以有為仰惟皇上兼體堯舜淵衷宸憲無一

日不在于民而公以明德異才贊襄密勿其視天下揚

然有饑溺由己之心夫是以道合志同諫從言聽下揚

政事若育賢才弭邊患罷煩苛之令養和平之福賑窮

郵孤長善宥過既已導宣皇仁流澤蒼生矣乃今又屬

念梓里捐千金之重發累年之積以就茲舉同時建郡

東下浦二橋上又賜名曰廣潤行道之人一旦得免病
涉而皇上仁澤覃敷若雨露之施元氣之運遠邇大小
罔不濡被蓋公之學得上而大行上之澤得公而彌廣
豈不可謂有君有臣曠千載僅見者夫公之勤德在朝
廷利澤在天下固當有紀相遇之盛垂竹帛銘鼎
彝者而階非其人也謹因茲橋之成論之如此
胡希聖記 秀江在郡城北門外為通衢要津跨江而橋
焉因不止利有攸往宏濟萬人已也明嘉靖年間分宜
介溪公在相位出資金二千七百有奇鼎建此橋極一
時盛事嗣是屢圮屢修至萬曆間全橋盡頽大鴻臚景
源袁公倡義續建崇正丁丑楚寇逼城橋被挖壞總督
臨侯袁公復與景源公重謀修葺越二十載為順治丙
申兵寇蹂躪茲橋漸以不支前郡守泰巖吳公思患預
防為經久計而孝廉勝之袁君慨然倡首謀贊拮据功
德懋焉登斯橋者固如履周道而馳康莊矣余不佞叨
守是邦景仰前徽將與都人士慶遺澤未艾也乃辛丑
夏五月淫雨連綿洪水陡漲滔天之勢實從前未有壞
民居湮民田溺民命慘苦百端橋遂因之崩裂惜哉余
不佞念此殘疆知恢復之難也袁郡七遭兵燹民窮財

宜春縣志

卷一

三

盡而此日物力艱貴較嘉萬時且十倍亦復奈何雖然
此固非得已事也余謀之寅協諸公與廣文范君而孝
廉勝之即起而身任其責多方料理不遺餘力勝之即
景源公令嗣也後先倡義均足不朽茲橋漸告成矣郡
邑紳士百姓皆於萬難措處中慷慨樂輸襄此盛舉而
奔走効力協謀勸助則老僧破衲與橋長蕭引悅楊文
瀾張廷耀余一麟姚文元等鄉耆張文雲徐益俸張國
卿葉元茂等之勞均不可泯也工始於辛丑六月越癸
卯七月乃竣計費金二千五百有奇嗚呼艱哉余不佞
不敢侈言功特敘茲橋興廢始末與夫今日落成之難
用告後之君子當留心護
徐樂山記 古王政之行自
肯以永茲澤也是為記
橋梁道路皆所有事夏令所謂九月除道十月成梁是
也宜春北門外舊有秀江橋燬於火明嘉靖嚴介谿公
捐金獨建易名廣澤後屢修屢圮仍名秀江事詳郡志
泊乾隆甲辰五月山水驟漲橋盡圮往來者遂艱於渡
邑人士雖建浮橋以濟然春夏遇洪水橋不能禦擱兩
岸間仍資小舟往還稍傾仄即患仆溺而官之以公事
出北門者亦病之余自壬申膺
簡命下車以來親見山水橫決而浮梁之不足恃也亟思有

以易之而未能也蒞治之三年城北生員徐宏鵬呈請
獨建石橋具言生母施氏苦志數十年積有餘貲憫渡
江之危遺言必成此橋生今年屆七十體患偏枯不及
時興建恐無以成母志而留餘憾余謂生既誠於好善
當力為申請准其獨建生因舊橋當北門之衝民房稠
狹水勢過急恐不久易壞乃徙建於浮橋之址自甲戌
興工迄乙亥四墩出水而宏鵬身故其子驥良續承前
事而益堦告成丁丑面幕石欄悉竣八月望日余請於
郡守隆郡鎮托闔屬文武僚吏胥落成焉曠良乞余一
言為記余謂宜地北界最寬民商輻輳密邇萬邑間渡
者日不暇給浮橋既不足恃而石橋之修二百年來亦
無敢獨任初建者况長江天塹拱衛之固觀瞻所係缺
而弗修將使採風者按圖溯古必歎是邦之無人今不
資眾力不擾閭閻橋成而若無所事可不謂盛舉歟曠
良復拜曰此賢宰玉成之力也余曰否宰官奉
天子命原期與民興利除害今好善如生良由我
國家久道化成淳厚之治深入人心然則生之恪承母志
謂非動於天良而不容自己者乎官斯土者方藉以有
榮施矣橋仍舊名示生之不欲私也橋計醴水者七為
墩八延袤三十四丈廣二丈四尺工匠木石油灰鐵鍵

宜春縣志

卷一

地理 津梁

四

之費用銀三萬有奇董事者職員厲 林祖壽記 袁郡
上選監生彭之綱楊崇山例得並書 越嘉慶甲戌城北
外之秀江道當吳楚之衝為往來要津舊有石橋在袁
山門外乾隆甲辰年遭洪漲橋盡圮越今垂五十餘
營數載費三萬金有奇橋成行者便之迄今垂五十餘
年矣中間屢圮屢修伊子廷佐補葺者三次伊姪孫魯
巖孝廉募緣補葺者一次石堅工緻固已完好如舊矣
無何江漲不測復於同治甲子仲夏遭水衝激北岸一
墩坍塌過半傍南墩脚亦壞又數被兵寇蹂躪摧敗而
瓮級欄杆日就傾頽雖前任胡公會出示勸捐嗣以倉
儲事不果次年余奉檄來袁思欲修復但功鉅費艱非
棉力所能勝適舉人徐夢虎貢生易雲衢等備述巖末
呈請倡修余謂此舉深合吾意遂捐俸出示并書數語
以爲之引茲幸合邑紳民聞義樂輸共襄盛舉工將竣
而亦莫難於橋梁葢橋梁之難不難於庀材費石而難
於下固作箱一不得法則箱壞水溢雖竭力彌縫而罅
漏四出是猶捧土以塞孟津多見其無濟也余於公退
之暇親督工役方懼蚊負難勝爰偕局紳諏吉備牲向

江虔禱已而天晴水涸始得施功由是向之傾者頽者
損壞者悉完固精堅是役也經始於丁卯七月告竣於
戊辰五月計費四千六百金有奇而董事者復以橋捐
餘貲繕修縣學之明倫堂土地祠文昌宮并補葺奎星
閣及泮池等處以公辦公一舉而眾善皆得於此亦可
見經理之在得人無虞事之難成也余故於橋之竣也
述其本末以爲之記
俾後之人有所考焉
袁一鳳引 大江東去幾千秋浪
淘盡風流人物古郡

南來約十里誌載有通聖橋梁星移物換六朝遺地壩
陵存焉際車馳一道垂虹河漢近誰料馮夷失馭頓令
德水易常使山谿泛濫橫冲致橋堞崩騫不保泉流百
尺空喚汪洋行李一肩難箭漸濡春江瀾漫青山古道
忽迷途夏雨驟盈白晝中流難駐足到秋來芒履穿霜
舉日煙波魂欲斷逢冬至裸衣入水露脛雪浪骨如割
夕陽芳草誰惜畏途暮雨啼鵲幾成苦海雖蜀中題柱
之客駟馬何處堪旋縱圯上取履之英韜略從誰指授
昔匍匐入井穀獻過堂且動怵惕惻隱之心今嗟怨載
途呻吟滿耳豈無哀矜拯救之術况袁郡秀橋通衢要
道前經創建紀載昭然今雖傾圯續修宜急是用伐石
庀材鳩工集眾鼎新重建以便往來第眾緣可就獨力

宜春縣志

卷一

地理 洋梁

五

難支釀蜜非一樹之花成裘豈一狐之腋所賴土農工
商各發慈仁南北東西羣倡公義愆前因後果今生受
用總良緣矧明去暗來這一段修持皆福地但得眾生坦
道何愛阿堵遺狀滅綺筵歌舞之費則人免向隅捐繡
閣珠玉之貲則遊無病涉彼浮屠佛像幻境也禮空懺
幽士夫尙圖身後計此道路橋梁顯績矣往過來續賢
豪豈吝囊中資願施錢穀之餘共助橋梁之費石虹駕
水舉足無虞天塹分流投鞭可斷二十四橋憑夜月神
女吹簫咫尺數里望行人春臺躍馬沉犀十二爭誇砥
柱之功渡蟻萬餘蚤應掄魁之兆勛名碣石德契穹蒼
行看儒生登龍禹穴商賈跨鶴揚
州萬井豐盈千利樂利矣是爲引

落流橋

在府治東北唐李將順疏西陂
水入城於北落流入秀江故名

湛郎橋

在府治東三里舊名赤板唐湛賁登第彭伉過此
橋聞之失聲墮驢又名落驢橋 國朝乾隆十四

年庠生胡安榮捐修並焚官
道自橋達城東門九百餘丈

附習廷獻懷古

城之東袁之陽自昔有橋名湛郎何爲
橋不朽當年郡吏非尋常連襟彭伉題

各早廣羅名士坐中堂憐郎閣後無兼味側目笙歌竟
如沸譬若神駒伏櫪鳴伯樂不能吐其氣倏忽旋空冀
批羣變吏為儒剛且毅座間名士盡茫然閣後書生宮
錦衣嗟哉彭仇意何如聞之失聲且墮驢貧時相識不
相好富貴崇朝驚絕倒君不見仰山翠聳與天鄰秀水
灘高錦浪頻雲物卷舒無定態朝為瞻落水之濱嗚呼
水濱久乏陸驢客
我過此橋空太息

麟橋 在城西五里沙陂下流舊為水汊眾姓建編木架石
墩嘉慶年間易周演謝家傳周鏡楊錫輿周德溥周
夢蓮等募捐改造
石橋四墩三瓮

廣惠橋 在西門外三里舊名沙陂宋州守趙箴夫建明正
今名崇廣一丈表二百尺覆屋二十楹 國朝屢修屢
圯康熙四十五年知縣江為龍率邑庠生楊嘉楠等連
修二次後復圯雍正十二年知府薄履青謀諸邑庠尹
化鵬張大紳徐鍾英募修時彭德四彭澤溟洋濟邑增
生澤潤兄弟各捐修石墩數瓮薄公當以額旌工未竣
而薄公卒乾隆二年知府程文華繼修告成後又圯嘉
慶元年復架木又朽二十二年監生徐汝亨

宜春縣志
卷一
六

慶元年復架木又朽二十二年監生徐汝亨
改造石橋郡博羅允成記文武官各旌以額

附羅允成記 與官陂分派正派為沙陂源出清瀝江上流
陂水引入城深闊可通舟邦人利之今所稱李渠是也

沙陂水北注秀江勢頗洶湧迨李渠湮而其流益大舊
有橋名廣惠自明迄 國朝屢修屢圯往往釀金編木

為渡經雨雪不數年輒毀地當孔道斷岸朽板如履春
冰國子生徐君汝亨好義士也尊甫明經鍾賢先生曾

督汝亭捐數千金創建下浦石橋工成即屬事此有志
未逮而明經沒汝亭遵遺命鳩工伐石所費至萬餘金

橋分長短兩折首坐庚向甲址坐申向寅起手為大瓮
者七為墩者八闊二丈表三百餘尺高一丈有六東折

為隄較長橋低三尺闊殺六尺表十餘丈自隄右折為
趾小瓮二墩三崇廣與隄等袤五丈有奇經始於嘉慶

丁丑年五月告竣於戊寅年十月橋名不襲廣惠即以
沙陂補從其地也時會郡伯際公保齋秩滿將入都而

攝府篆譚公琴岩適來兩太守偕方鎮托公率文武僚
屬往落成余亦與焉時江流潺湲官道一線旌旆飛揚

車馬絡繹父老鄉垠緣兩岸觀者不下萬人兩太守咨

嗟嘆賞以為此盛舉也而顧余屬筆焉余謂徒枉輿梁
政治攸關而汝享以獨力任之其補政治之遺而助有
司之所不逮宜太守之稱許不置也郡之擁資自豪有
數倍於徐氏者矣而徐君父子獨急公赴義如饑渴之
於飲食一之不足至再至三當下浦橋初竣此舉尚未
興工會省垣改修號舍與豫章溝散募各郡縣鍾賢先
生毅然囑汝亨貸千金賚局局中諸君子高其義噴噴
稱頌綜計先後建大小橋已數十處此舉又經營浩費
如是汝亨之善成父志可謂不遺餘力矣余司鐸此邦
見聞既稔今從長官後攬山水之秀靈紀郡邑之勝跡
深羨慕焉獨惜李渠湮而官陂之水盡汙沙陂倘得好
義如徐君者濬復李渠實於郡縣大有裨益水主文運
查唐自開渠後盧易相繼大魁在城在鄉皆得其力又
引水入城血脈宣通主文人居官福壽至沙陂之水分
注官陂則水勢漸殺山溪暴漲不至衝突而橋愈如鞏
固渠之裨益於橋者豈淺鮮哉既以復兩太守遂書遺
徐君俾鑄諸石用志不朽嘉慶二十四年己卯
廣潤橋在城東十五里上浦宋清熙三年立明景泰五年
知縣楊宏重修成化初知府劉懋復修一在下

宜春縣志

卷一

地理 津梁

浦舊編木為之遇漲復壞分宜少師嚴嵩捐賜金伐石
改費二橋並以橋名上請賜名廣潤祭酒鄒守益記萬
曆七十年上浦橋圯知府鄭愷典重修至國朝盡圯康
熙四十年上浦橋圯知府鄭愷典重修至國朝盡圯康
聯昇馮文炳易家驪等募賞興工上架以木乾隆八年
天花寺僧普化募緣重修翼以木欄後復壞詔仁鄉茂
才捐
建石橋

附鄒守益記

袁郡東十五里曰上浦宋清熙間創橋名

下浦舊無橋地當楚蜀滇黔孔道輿騎旁午遇霖潦激
射編木以渡寘足者惴惴若溺及圯則望若秦越少師
介溪嚴公聞而喟曰吾當為鄉人拯此患公為明天子
簡注自宗伯人柄弼嘉靖之化寵錫鴻典罔敢自私出
賜金付男少卿世蕃伐石僦工以與鄉人沐皇澤于無
疆始于丙午四月成于丁未七月計橋二浦灑水九道
袤三十丈廣一丈五尺面費以費工竣請額上親定曰
廣潤意良深也已而少師勒狀命幣徵言于益益瞿然
曰巖廊宗工炳炳而公于山林取之將以對牀論文軍
門趨義三十年舊交其出頌功贊德表耶昔伯禹佐舜

克艱交微八年于外視溺猶伊尹相湯一德用協匪
夫弗獲若推諸溝中少師其諸猶溺若推之志乎古語
有之觀室於閭觀家於境觀天下於鄉世有陵駕鄉閭
微化茂義人之視之若觀火然維公造膝密勿嘉猷外
順于邦本邊務人才時政天下陰被其賜至於比歲大
饑出粟五千石以活邑孳茲復費鉅役艱用屹茲偉績
以酬鄉父老曰仁以貽翼子姓曰訓以祝皇釐而推以
彰賜曰忠曰廉夫教于一鄉而運天下猶掌也晉史載
杜預橋富平津武帝舉酒勞之君臣動色相慶則仰瞻
聖額規模更宏遠矣帝德廣運澤潤生民若天涵日臨
申命用休老有終幼有養俊民有章狂獄有經旱潦蝗
疫有備將薄海若比閭畏途若衽席而無復墊溺昏札
之診以干中和是睿訓之所嘉虞而樂江為龍記
殷也公倚懋之罔俾禹伊專休于謨訓江陸行二十里許至
甲申秋予自桐來宰是邦舟次彬江陸行二十里許至
下浦見長橋頽頽僕從褰裳以涉予乘輿而濟心惴惴
然訊其名曰廣潤橋水自大仰山發源經入秀江值春
霖激射以圯予遂捐俸募眾為修復之越丁亥歲邑人
來告曰去郭五里而西有沙陂橋焉忽秋漲水決而橋
壞渡甚險凡十瓮工費浩繁予復捐俸以倡募資鳩

地理 津梁

宜春縣志

卷一

工以堅石固其岸巨材壯其趾閱歲而成蓋二橋歷有
年所當楚蜀滇黔兩粵之衝利于商賈負販之往來者
甚大關乎仕宦郵驛之奔馳者孔亟也昔杜預以孟津
之險請建橋于富平津眾論不可後橋成而眾便焉百
官舉杯勸預曰是非君不立又王周易四鎮噴有仁聲
橋壞覆民車粟周乃慨然曰予過也遂償民粟而治其
橋二者雖先後不同其為利民一也余之不逮古人遠
矣是兩役者不過率羣力以董成之較之杜王二公之
流風遺澤吾固遜焉而未遑抑修舉廢墜其于自責之
意或有合焉向之傾頽而病涉者今則鱗鱗密次危而
易之以安險而與之以夷登斯橋者可以臨流而
賦矣爰綜其本末為之記俾後之人得以覽觀焉

獲鹿橋 在城東二十里下浦即廣潤橋之一亦名長橋入
國朝候圯康熙十年知府李芳春率士民鼎建更
名獲鹿後復損壞知府胡應麟知縣張綸汀為龍先後
遞修改砌石墩編木為之乾隆四年決壞橋墩過半改
修鞏固第西岸低陷水衝每易崩塌嘉慶二十年例貢
生徐鍾賢命子國學生汝亨獨力捐修改建石橋知縣
徐樂山記更名好義撫憲程旌以急公好義額同治四
年閏五月山漲驟發全橋傾圮鄉紳等募修河橋至九

年易言颺盧嶽等募建石橋
更名萃善知縣路青雲記

附徐樂山記 此橋舊名獲鹿即前明嚴少師所建廣潤

以下浦亦當要津復捐金創為此橋廣一丈五尺袤三十丈崇二丈五尺工成入奏賜名廣潤而邑人至今稱爲下浦橋者從其地也下浦水來自仰山源遠且鉅昔遇霖潦奮迅殊不可當故橋之廢而復修而復廢者不勝記焉余自嘉慶壬申六月始蒞茲土所見境內橋梁宜修造者隨在多有存公無項利濟徒殷心竊憂之乙亥三月有貢生徐鍾賢者偕其子汝亨以下浦橋頽頽既久呈請獨力捐修余乃如釋重負瞿然以興曰此義人也亟許之未及一年而工已完善請賜新名余命之曰好義夫鍾賢父子耕讀傳家貞具粗足非能操奇贏權子母有三倍之獲也平居謹身寡過無罪以當責不必藉善端以自贖也且於鄰里鄉黨多所周恤亦無慮多藏厚亡也乃能不待勸諭不惜重賞不藉羣力以濟千萬人往來風波之險志稱里民好義洵爲不虛而我

國家休養生息漸以仁而摩以義者亦於此而見其大凡

宜春縣志

卷一

地理 津梁

九

蓋善氣之涵濡久矣抑聞之仁在乎熟而義貴能充昔范文正公爲秀才時即以天下爲己任卒能出入將相道濟天下而澤潤生民今生既以濟物爲心亦能充其所好宏此遠謨而勿斤斤焉抱義於尋尺之間是則余之所厚望也 路青雲記 蓋聞濟人利物必有善念而後發力爲之時勢即有不同而其以善念爲善舉則一距城東二十里之下浦有溪自新坊來建有長橋自明嘉靖迄今三百餘年經始難守繼亦不易非其地紳民志存利濟樂善不倦則日久坍塌勢必一圯而莫可復完考斯橋之設自嘉靖至 國朝康熙一新於郡守李公率民修治自康熙至嘉慶再新於邑善士徐君鍾賢命嗣汝亨選石獨在爰有學使省崖王公臨觀邑令徐公樂山作記計前後命名之異初曰廣潤繼稱獲鹿又更名好義均有誌可稽雖義各有取而善則同歸且夫無不傲者勢也可長綿者善也予自下車數月以來殷殷訪古遺蹟卽聞此橋自同治乙丑閏五月間山漲驟發西岸之甃被洪流冲塌無存鄉紳民以不忍人之心捐貲設浮橋以濟誠善舉也第非修復如初終難持久方擬設法興事又念邇年來物力維艱未便遽謀工作乃惻

然興起適有分宜鄉紳盧君嶽下浦鄉紳易君言錫家
潤兆麟騰驥諸善士既自捐倡復合募得若干金襄成
美舉以史新為守舊俾圯者完傾者定王虹如跨蔚然
成城東一鉅觀焉吾因之有感矣天下事經始固難繼
守尤不易下浦於宜治為衣冠名區地當滇黔楚粵衝
輪蹄往來絡繹不絕今其紳民志存利濟能本善念以
續成善舉於三百餘年之後不可謂非盛德益見本
朝仁漸義摩之澤久而彌光也若但云古王政十月成
梁斯舉足補有司奉行所未逮又其餘矣予既樂為之
記又以義者善端所發見即移好義名為葶善也可質
之紳首諸君
其與我否乎

赤橋 在城東三十五里袁業泗建又五里為彬江市

眉壽橋 在城東四十里路彭建邦建

南源橋 在府治東南耆民黃倫武建

指南橋 在大門外

宜春縣志

卷一

地理 津梁

十

郵橋 在城南十五里邑人袁繼樟建

通聖橋 在城南十餘里俗名游橋

砥柱橋 在城南二十五里中村嘉慶二十三年眾募建

善同橋 在城南三十里集雲鄉南廟原編木嘉慶十四年監生楊超緒等倡建石橋六墩五瓮

福慶橋 在城南三十五里集雲鄉下石爐下舊有木橋嘉慶十一年傅步瀛龍濱黃雲綉易友元等募建石

橋四墩三瓮費銀千兩

由天橋 在城南五十里東庄乾隆戊戌龍仲珍建

福龍橋 在城南四十里絳橋乾隆間龍朝昱建

東里橋 在城南七十里道光壬午楊望元從周耀台富培等建

絳橋 在城南四十里嘉慶十一年重修四墩三瓮費銀千餘兩

壽萱橋

在城南四十五里集雲鄉梅洲嘉慶年間黃髯山子孫建

普福橋

在城南五十里澗富嶺下莊上嘉慶年間建

東山橋

在城南四十里月山下塔前乾隆庚辰塘溪謝慶貴修墩架木嘉慶十八年裔孫州同職向榮同姪

監生祖貽庠生遴陞遴壩等重修石橋五墩四貧資銀千餘兩

大椿橋

在城南六十里枕溪嘉慶六年里人劉信占建

保孫橋

在城南七十里集雲鄉塘溪嘉慶十年謝作傑建

長峯橋

在城西南三十里揭亢宗建

附魏瑞記

距袁城西南四十里曰長峯有大溪源出清灑江曲折至此合溫泉水而流更大兩山夾

川水石相激灘聲如雷鳴地當南北之衝向有橋編木以渡經雨雪不數年輒毀斷岸朽板寘足者喘喘職員揭翁亢宗謀欲新之督其嗣君明經莊獨力捐貲易以石焉崇一丈八尺廣一丈六尺袤十一丈六尺有奇

宜春縣志

卷一

地理 津梁

十一

水三道糜金千餘橋成手勒狀命其子造余徵言為之記余維杠梁之成王政之首務也罕聞以一士之力而任有司之責者求之史傳惟晉杜預富平津後魏崔亮之建至今傳為美談夫名公鉅卿輔相朝政流澤蒼生即以一入董其成亦易為力猶且垂諸竹帛不可磨滅而況為鄉曲之士竭一己之貲為萬民所利賴傳諸後世其功德又曷可忘耶翁為唐刺史揭公鎮後裔公蒞袁時增築羅城浚治濠塹歛不及於民惠澤不可枚舉其子孫家於袁數十傳而至於翁蓋祖宗化行之鄉即子孫桑梓之地則斯橋之成豈惟利濟斯民抑且繼前人光將使輿騎往來過斯橋不忘翁惠因不忘刺史公也豈不懿與勤其事者翁之子莊翁長孫國學生邦彥次孫邑庠生邦俊例得並書道光壬午孟夏上浣

長庚橋

在修仁鄉龍下徐鍾賢建

椿壽橋

在修仁鄉鞏村徐汝亨建

松齡橋

在修仁鄉下鞏徐鍾賢建

罔極橋 在修仁鄉鞏村徐汝亨建

永安橋 在城西北四十里化北鄉當要衝邑民易永濯屬其子職監生光緒捐建橋垂成而光緒故洪水冲塌永濯妻徐氏又屬次子吏員克宗及光緒妻周氏續修袁芳杏記

附袁芳杏記 古人有志興作必為之紀其歲時詳其巔末凡以誌不忘也然往往見於鬚眉丈夫

若身列閨闈惟凜無成之戒已耳縱偶有創造何敢存誇示人羣之想哉若易門徐孺人永安橋之建有不容不誌者是橋經始於乾隆戊辰年季夏月至庚午仲秋月告竣地舊有津渡每當春夏之交山水衝決往來咸病徐孺人之夫易君永耀始易為木橋不數年又為波濤飄沒長嗣光緒克承父志重為增修較前雖完固然兩淋日炙板終易朽孺人以夫創於前子修於後聽其蕩然無存此心何以安且夫與子相繼而亡莫克計其長久此所謂望洋而痛轉深也因與長孀媳周氏謀廓前功盡易為轉瓮石橋命次男克宗董其事召匠采石於己山不敷用適同族潤一佩仁等慨然以山石樂助今幸纍纍告成矣計其時二載有餘費金一千五百有

宜春縣志

卷一

地理 津梁

零橋長十丈闊一丈六尺四墩三瓮名之曰永安橋蓋深望乎功之永保而行者之常安庶有以全夫與子之志於不朽也初基日長媳周氏慮功難成默禱於神既藏事將橋首店屋後棟捐貲改造佛殿雕塑觀音大士金身以答神眷其餘諸神像眾善士解囊玉成孺人以一女子不沒其夫好善之心有志竟成人歡神佑濟人利物無成而代有終此鬚眉丈夫所難能孺人優為之志之可恃也如是夫

新田橋 在城西三十里舊有橋三瓮四墩乾隆四十九年一序贈普懷利濟額嘉慶二十三年眾加護石欄

成元一碑 距城西三十里曰新田市居稠江上游舊有辰夏江水驟漲衝裂橋西岸墩蘇生恢武恐橋一傾坳

舊石蕩然未若早拆改建取舊墩蘇生恢武恐橋一傾坳鄰蘇世藝周義廷等勸捐重修闔境士民皆踊躍捐輸共勦盛舉藹然有古鄉鄰敦睦之風爰取本年八月十五日與工明年己巳十一月初八日告竣該生等履利濟之念廣種福田且卓識特見先事綢繆實為關心之

至予承乏茲土凡地方士民有好善樂施者罔不大加崇獎是橋締造完固雁齒排煙虹腰疊浪余按臨諦視不禁歎動眉宇因於簿書之暇秉筆而書其額曰普懷利濟以為急公好義者勸

流芳橋 在城西六十里嶢塘嘉慶十一年邑庠生劉榮陞妻彭氏屬其子鶴翔捐建教諭茅連茹記

附茅連茹記 者有鄉邑士民公建者有好善樂施獨建者或仍其舊而重新之或乘其缺而肇創之其經費之多寡出於眾擎者易成於獨任者難彼鬚眉男子識大謀遠憐愷捐貲者尚不數觀求諸巾幗中愈難之難矣

嶢塘故文學劉榮陞之妻彭氏以未亡人矢志撫孤修德樂善任卹施予無吝色憫門首洪潦衝溢雖設舟以濟而成毀不一僱募維艱非久遠計也慨然曰吾自飲冰茹蘖以來計所積資差堪成橋爰命男鶴翔觀流審勢定子午為首趾鳩工伐石跨河為梁越歲餘而橋落成蓋所費不下數千金云夫嶢塘僻鄉小鎮耳其經途亦非官騎衝衢也然由郡城之西數渡而至於斯上接萍楚下達秀江肩摩踵接負戴崎嶇若使其阻于津涯徘徊焉需一葦之杭裹千人之足視為畏途情殊可惜

宜春縣志

卷一

何如有橋之長年便捷率素履而占坦道也哉焉人所居去此僅數十武其同懷弟彭太學泰勳謁余署偶言及之余曰此義舉也實可以流芳後世矣今有斷港絕潢懸略約橫斜於左右為值幾何而鄉里稱善人具一溪一澗卵色半篙石齒齒駕兩涯丈尺許輒碑於道曰某年月日某某建道路傳之必曰某義士某義壬者所在多有以視斯橋之利濟又何如余烏知異日子孫不有題橋如司馬相如其人者爰額之曰流芳以表伊母子樂於循善因記其事俾泐石以垂不朽嘉慶丙寅季夏上浣

遠洲橋 在城西六十里康熙五十六年取建四墩三瓮

久遠橋 在城西六十里修仁鄉夏家坊監生鍾毓川建

渡春橋 在城外鄉石陂坑鍾毓川建

兩江橋 在城西七十里當洋楚孔道

通濟橋 在城西八十里店下乾隆二十四年里民陳耀邦劉思聖倡修

齊眉橋 在城西一百二十里社溪乾隆十二年民黃道清捐修

廣惠橋 在城西七十里竹亭監生黃國用倡修

檀溪橋 在城北三里嘉慶年間西外廡監生李宗榮建

萬福橋 在城北十五里信義鄉渥江三岔四墩高二丈四尺廣一丈五尺袤十丈八尺明贈序班楊春諤建

國朝乾隆三十九年謀映燦楊堯璧張理標黃釗國楊君寵等倡眾重修六十年項爵耀鄒倬雲謹學成楊炳

機張翠雲楊禮載等倡眾復修

長瀾橋 在城北二十里信義鄉白沙明贈序班楊春諤建後復募修改名萬壽橋

楓林橋 在城北二十里舊有橋久圯明萬曆丙午邑紳袁業泗倡造石橋共三岔費三百五十餘兩 國朝

雍正十三年袁振紳袁振鈞等重修建亭於上

會勝橋 在城北太平庵僧林巖建

宜春縣志

卷一

地理 津梁

古

三陽橋 在城北四十里

廣福橋 在城北五十里小江西乾隆二

寶山橋 在城北五十里郭人傑倡修

韓塘橋 在城北五十里

良灌橋 在城北五十里

南村橋 在城北六十里明進士袁魯訓建順治八年袁一忠改建二岔乾隆六十年袁起汝等募眾重修

通仙橋 在城北五十里化北鄉嘉慶十六年邑庠生易煥謙煥謨續修石橋廣一丈六尺袤三丈六尺高

如其長左右護以石欄費七百餘兩

大庾橋 在城北五里

新橋 在城北七里橫塘

萬壽橋 在城北六十里金瑞王應龍龍發遠袁帝

永安橋 在城北六十里石外鄉金

石湖橋 在善和鄉橫塘

兩江口橋 在城北六十里石

院前橋 在善和鄉定安院前接連二橋明橫

下湖橋 在橫塘水

零江橋 在城西一

保定橋 在集雲鄉仰峯舊有木橋嘉慶

康樂橋 在城西南四十里修仁鄉大埔上嘉慶甲

附周德潤記 郡城西南四十里有村名大埔上當諸山

宜春縣志

卷一

地理 津梁

橋木沒橋傾往往為行路者病村東謝氏國學敬亭翁
自東林遷居於此歷有年所每顧病涉者向隅嘗欲營
石為梁惜有志未逮至嘉慶甲戌翁之季嗣君上舍生
名澄者始遵遺訓鳩工伐石以竟其業橋崇二丈一尺
廣丈有八尺表十丈有奇醜水三道糜金二千餘兩工
竣鄉里稱之而上舍不欲勒石余聞之悚然曰成枉成
梁是乃仁者濟世之心非乘輿濟人比也世固有合數
十人之力而為一橋者鄉黨尚傳為美談矧竭一己之
賞為萬姓免徒涉而復功成不居有如是耶予深嘉其
事尚能追功太傅因名之曰寶樹不獨見上舍利濟之
心併以見其亢宗之孝倘所謂善繼其志非歟維時董
其事者上舍之長君邑宰生大勳次君國學生大榮姪
例貢生大昌

心田橋 在化北鄉油木嘉慶

砥柱橋 在城北七十里溪村監生晏世

承先橋 在石外鄉溪村嘉慶

永福橋原名九七橋在薦裡鄉乾隆間李占鼈等倡建木橋道光丙戌年圯李偉贊妻彭氏改建石橋易樹

年記

附易樹年記 宜邑西路九七村為通楚南瀏邑要道前

備備焉余姻兄州司馬李偉贊先生世德相承樂善不

倦每欲大加修治而有志未遠遂捐館舍其德配彭安

人立志撫孤承夫未竟之志而竟之道光丙戌歲梁為

洪水衝廢村人儀舟岸側繫以修綆互牽以渡往來艱

甚安人聞而惻然出囊金三百餘命長君萬濤即余婿

也不擴舊礮橫板其上旁約以欄於是行若稱便第雨

淋日炙終易朽壞壬寅歲安人欲為一勞永逸之計時

長君雖逝而次君監生萬純暨家孫培芬等俱克襄事

遂使鳩工伐石創建石橋礮四瓮三廣丈六尺袤十丈

高三丈有奇費金二千落成之日眾請告於當事以相

表揚安人不許橋仍舊名永福不立碑紀功此非慷慨

識大義行其心之所安者不及此噫世之號為丈夫者

挾厚貲遇善舉人相勸募輒掉頭不顧即勉強以為費

數金猶形德色安人以巾幗質借長媳力矢清操持門

宜春縣志

卷一

地理 津梁

共

戶俾子若孫咸為鄉里善士聞範已為可風况復好善樂施屢費多金無少吝吝他日即或水潦不時吾知趨而過者如履康莊緩急悉各得其所斯其功德求之鬚眉中又豈易數數觀哉安人即不居成功余以臧諱故烏能見善不彰故特濡毫而記其事

竟成橋 在永福橋下里許嘉慶間眾建墩瓮廣袤與永福橋同

福壽橋 在石裏鄉墓湯係湯河宗李蘭馨捐建石橋三瓮

三元橋 在姚家港渡頭職員易仕華修主事費嘉樹記

附費嘉樹記 姚家港為萍楚孔道在兩江橋之下雙流

雖設有義渡人未病涉而春夏霖雨暴漲奔激瀾漫招

擊心惻思欲創建石橋而便往來有志未逮賈以沒焉

道光乙未嗣君廷安廷登乃遵遺命伐石興工經始於

是年五月越二十餘月而工竣橋凡七墩六瓮高二尺

一尺縱二十五丈橫一丈五尺上翼以石欄高二尺縱

丈尺亦如面計費緡錢八千串有奇夫以一身一家之利克出所藏不呼將伯廣而為數百年千萬人之利俾往者熙熙來者于于輪蹄絡繹不致望洋莫前孟子所謂焉得人人而濟者固居然已人人濟之矣其惠不誠大歟然非曉暢夫義好善而忘利必不能志於前述於後宏濟艱難若此公之孫煥勳予同年友也以其事來告予予嘉友之有世德而鄉邦竟卓然有此義行因不禁喜而為之記

文峯渡

在城東五里文筆峯下州同職李廷謀捐造渡船

瓦江渡

在城西八里眾募造渡船二隻

王化渡

在城西十五里

稠江渡

在城西十五里

永興渡

在城西四十里

嶼塘渡

在城西十五里

宜春縣志

卷一

地理 津梁

七

北關渡

在小北門外乾隆間州同職李廷謀造渡船二隻今廢

官渡

一在北門上水關渡船二隻一在西北溢洲河下

上水關渡步岸基地

石外鄉陳金鼈捐

附錄合街眾姓碑記蓋聞乘輿濟人古之遺愛袁郡秀江橋創自元明係來往通衢今年五月二十一日洪水衝圯過者無不望洋興嘆茲合街公議編舟置渡奈古巷窄狹止二尺餘展步維艱有本邑石外鄉國學生陳金鼈樂善好施將所管上水關店屋右邊磚牆前後二棟折卸捐闢地基三尺以廣步岸以利行人方諸古之遺愛復何以加於是嘉其志勒諸石以垂不朽乾隆四十九年歲次甲辰孟秋月立

利濟渡

在溢洲河畔修仁鄉同治庚午例貢生周建肇捐田畝店租獨造并建風雨亭

南壩渡

在城東十二里詔仁鄉雷潭

山口渡

在蕩外鄉栢桑

上窰渡

在城東十五里詔仁鄉

新溪渡

在城西五十里

下浦渡 在城東二十里下窰

良田渡 在薦外鄉

朗下渡 在城東二十里潭頭

黃沙渡 在城西十五里

渥溪渡 在城東北二十五里信義鄉

魯嶺渡 在城西薦外鄉

白沙渡 在城東二十里信義鄉

上石背渡 在城西四里

石壁渡 在城東三十里信義鄉

下石頭渡 在城西十五里

薑山裡渡 在城東四十里湖溪獨船

新安渡 在城西化南鄉

鵬津渡 在城東四十里湖溪

關聖渡 在城西下街

江下渡 在城東四十里湖溪

淇田渡 在城西三十里

船坊裡渡 在城東四十里湖溪

永保橋 在城南集雲鄉嚴營兩江口塘溪州同職謝向榮

宜春縣志

卷一

六

姪孫國子監典籍錦光等修

寸心橋 在城南五十五里高坑口塘溪州同職謝向榮建

宜安橋 在城南七十里仰峯龍尾巴橋跨宜安兩縣

按嘉定志橋渡有萍實橋在西城門外神安橋永濟浮

橋在北城門外嘉定十三年州守滕強恕重建更名平

政獅子橋在神門巷口上浦橋在州東十里頃歲木橋

多壞嘉定十三年知縣事黃應酉命僧鬻石爲之中浦

橋在州東十二里金雞橋在州東十四里司溪橋在州

西五里一名沙陂盧橋在州西六里唐大厯中因麟見

於此刺史蕭定改名麟橋中村橋古溪橋皆在州南二

十里平橋在州北七里五百橋在州北十里渥橋在州東北七里厚田橋在州東南十里二聖橋在州東北五里湖田橋瓦江橋皆在州西北十里烏石橋在州西北十五里武郎橋在州西北十七里安仁竹山橋在城東門外黃土渡在州西五里都陂渡在州西二十五里節舟渡在州東三十五里宜春縣渡在州東三里墨田渡在州北五里後修府縣志俱未載今補附于此

宜春縣志

卷二

地理 津梁

九

古蹟

宜春臺

在城內東南隅漢宜春侯劉成故蹟也高五十餘丈宋建炎中州守卽此以奉仰山之神立行祠

附江爲龍重修宜春臺記

袁城之中東南隅有臺五十丈聳然特立曰宜春臺傳爲

漢長沙定王子成故跡也舊有種桃亭瀉山齋閣其正宇祀仰山之神臺畔石坊二曰憑虛曰積翠爲郡邑名勝之最佳者高明宏壯出雲氣而凌風雨挾光景而薄星辰哀陽諸山勢若環拱凡平沙急湍林木蔚蔚與煙雲禽鳥之出沒漁舸買舸之上皆雜然呈於几席之間予始至是邦攝衣其上見夫殿宇檻榭欹側傾斜聖像金碧剝落塵印鼠跡問所謂亭閣石坊已無一存者不勝今昔之感焉蓋袁之勝地如珠泉化成不一而足皆未若茲臺之雄踞闡中山川平遠可一覽而盡者也奈邑處瘠僻適予葺學宮建義塾纂修邑乘捐俸募貲騷然繁費於茲臺未遑增構惟是瓦級之破缺棟楹梁桷之腐黑撓折者悉治之非敢謂增奇飾美也亦修舉廢墜俾神像殿宇稍新其面目至當日石坊亭閣之勝跡則俟後之賢宰擴而復之以成其大觀也可

地理 口蹟

宜春縣志

卷一

劉嗣隆題宜春臺詩序

江南古郡袁爲佳麗之地宜春臺者又郡之勝遊也闡之旁

崛起四百尺遠而望之峻不可陟按轡徐行坦如平地周覽川原下望人煙四時佳景羅列目前爲一州之壯觀萬家之游息矣夫名山異景多出於郊原之外巖谷之邃若根盤里巷之間影落軒窗之裡則未之見也某甲子歲自臨川移領是郡下車事簡首登斯臺徘徊終日欣然忘返廊廡之間惟相國王欽若寄題詩一首在焉因念韓吏部而下爲郡者鴻儒巨賢清塵相望又郡人盧肇袁皓輩皆魁傑士也無隻文片字書其上豈好奇逐勝之心有所未至耶抑不爲好事所寶有所遺墜耶徒令曉煙暮雲有鬱鬱之狀嘉木修篁如聞太息之聲且世之言滕王閣者衆矣觀其雉堞之上闕無靈異之跡豈足與斯臺爭勝哉而王勃之序播在人口丹青傳之天下何幸不幸有如此者某因成七言四韻一首屬而和者凡八人雪勝慨之遺憤補前賢之闕筆亦詩人之職也

李羣玉登宜春臺寄鄭判官兼簡空上人

曉發

陽暝宿金山寺松風洒寒雨浙漈醒如醉夜中香積飯蔬粒具精異境寂滅塵愁神高得詩思皎皎榮陽子芳

宜春縣志

卷一

二

春富才藝漲海豁心源水壺見門地碧霄有繩序未展

聯行翅俱笑一尺繩三年絆驥摧藏登容麟却胸

襟事名業爾未從臨風默舒志一身渺雲嶺中秋穴滌

泗側枕對孤燈衾寒不成寐繹薪極桂玉大道生榛刺

恥息惡木陰難言劍歌意揚鞭入莽蒼 熊曰華登宜

山驛凌烟翠越鳥日南飛芳音愿相次 熊曰華登宜

春臺 白露下薰葭西風鳴蟋蟀登臺望悠悠飛鳥隨煙

倉卒一片袁山 楊華春臺懷古 策杖上春臺春光在

雲相期慎所出 履踰荆棘路緣石徑斜帽因聽松側迎我夾道花含笑

弄春色春樹發新枝春烟似羅織日暖風更和鶯聲嬌

無力禪房草色中雅喜塵囂息山城平似掌瞻望亦何

極古有帝子名斯臺乃奇特於今幾何年父老傳聞得

搔首望天涯 曹超登宜春臺次韻 尋眺宜陽勝春臺

面一水繞孤城俯此凌空景深余 李夢陽宜春臺春

望 勞勞世路裏今望始登臺人倚楚天盡風吹湘色來

密雲生曉暝遠水上春雷尚有干戈淚憑軒眼倦開

張銓宜春臺眺望 飛閣鬱岩堯憑陵客興豪乾坤留勝

雁遙鄉關何處是北望首頻搔 臺以宜春勝登臨怡

好春竹風如欵客花氣欲薰人山色半依檻江流曲抱

城昔賢棲隱處 趙志皋同立齋秋夜集宜春臺 為眺

凝佇倍含情 臺翻驚秋色來江空寒月上山遠白雲迥喜有 袁一

賢人酒愧無楚客才相依對寥廓頓覺旅懷開 虛窻

菁宜春臺 崇臺今古寺遊屐後先登石磴牽蘿密虛窻

畫還須 架霧層飛觴作賦客敲向老詩僧點染江城

造物能 夏九疇登宜春臺 誰起臺千仞登臨興自如

揮塵雲生座憑欄露漬裾 張世竣登宜春臺 春烟留

山河千里目空翠攬無餘 飛簷橫碧落復道隱晴虛

興自遙登聳翠超千堞凌雲累九層苔荒餘 梁穆宜

古木坐久一山僧廖廓江聲外悠然感廢興 春烟留

春臺 孤臺千尺迥闌檻倚飛鴻禾黍西風外人家暮雨

中溪雲過水白返照射山紅古蹟憑誰問蒼烟自

空 劉權宜春臺遇雨 秋風愁落木懷古上春臺秦嶺

人初過袁山雨乍來鳥低青嶂

外帆掛碧雲隈不盡
登高意黃花滿目開
彭維舉宜春臺晴望
迢遞登高

望平袁峯全對峙秀水半斜橫徑曲巖光轉山空景色
明懸巖疑雨宿香閣看雲生野迥天彌濶林多鳥亂鳴

斷橋依淺渚畫舫泊孤城倚檻心懷遠憑虛翠積成梵
音迴古刹曙色動浮萍樹老偏宜夏葵傾欲向晴薰風

初度處為
報葛衣輕
施閏章臨發登宜春臺短歌贈袁繼梓君問

何事不得登高臺黑雲積雨連江來簿書如山眼不開
今朝走馬且徘徊空濛遠山碧天盡滾滾塵世等飛埃

君不見千山寂寞皆暗嘍大小袁山在人口處士翻成
古郡名古來富貴亦何有袁生今袁生樓頭酬爾一杯

酒
孫燧宜春臺春望
郡治東南舊有臺暮雲登眺畫

花入酒杯疎密人烟聯萬井細縷瑞氣接
三台仰山千古遺靈在棟宇巍巍亦壯哉
徐之孟宜

春臺懷古
帝子向年翠筆迴千秋臨眺重堪哀空傳碧
渡風雲飛盡見荒臺只今芳
高為表九日集宜春臺

宜春縣志

卷一

地理 古蹟

三

江南廣信思堪哀北極雲深首重迴風露城邊木葉下
兼葭洲上雁鴻來千山暮色浮湘渚萬里秋陰起漢臺

短髮未須增感慨
孫慎何筭亭見招宜春臺
宜春臺

長吟聊醉菊花杯
孫慎何筭亭見招宜春臺
上試春

游積翠層軒且暫休
歷歷雲寰圖畫裏溶溶曲水浪花
浮二王臺榭開幽草百代河山自古州
驄馬不妨長作

客長安遙
徐燿元日宜春亭各賦臺字
郭裏青山雪

望總添愁
倚秀江開東風並馬穿花度元日何人載酒來烟草細
分湘浦雨寒潮光動海門雷凭高會有陽春調驚見瑤

華落
王喬齡宜春臺集宴
清秋雲淨露華乾一上高

上台
落江涵蜃氣俯驚瀾文昌石古苔紋合洗硯池
空樹影寒樽俎何當名勝地遠心猶在倚欄杆
張春

登宜春臺
萬峯迴合紫雲塔一水縈流錦障開吳楚東
眼地主逢迎數舉杯留與醉
陳之龍午日登宜春臺
吟乘月去定期歸老及春來
並為汰糧稱慶和吳泰巖公祖元韻
隔岸一峯城裏出
高臺多半夕陽開

疎疎幾派森林木落落荒郊覆草萊知有溪山新入闕
漸無景物共浮杯民忘帝力風方古今日相期闕徑來

陳之龍午日登宜春臺并慶廣畝奉和吳泰巖公祖元

韻年年客夢到春臺叠叠燕雲鎖未開白首鄉關思
韻和衰年少力懇荒萊息陰復淵堂為宇時飲蓮塘菜

作杯日暮相呼勤報鄭燭宜春臺百丈嵯峨倚閣開

國帶經挈伴戴星來山隨夕照來帝子何年移翠輦

龍宮千古鎖蒼苔外吳越山謾謾蒼蒼前過遙送泉聲到酒杯

施閨章宜春臺高臺聳出赤城霞客到春風正著花曲

登嶺當瞻盡樹杪澄江遶郭斜共周體觀登宜春臺

說晴空見衡嶽憑欄身在楚天涯周體觀登宜春臺

乘風獨上最高臺漠漠川原古郡開深谷入雲江折去

崇山無路鳥飛回孤城小市人烟淺火成長征鼓角哀

萬里鄉關歸未得潘于達登總宜樓望月臺上層樓

天涯歲暮兩相催潘于達登總宜樓望月臺上層樓

欄佳氣自氤氳窻吞河漢知天近幔捲星辰落眼紛一把

酒謾遊花下飲鳴琴疑在鏡中聞蟾宮此夜誰為主一

宜春縣志

卷一

四

段天香袁克昌宜春臺層臺積翠聳城陰極目常開

此虛分袁克昌宜春臺層臺積翠聳城陰極目常開

心虛受納雲深輕烟漠漠遙依樹遠響丁丁潘師澍

漸出林自古登臨人不少滄桑閱歷到于今潘師澍

春臺懷古葛屨初登破碧苔萬家烟景逐晴開江拖匹

改吳天風雨早秋來舊時朕袁壽齡步虞伯生宜春

賞滄桑隔若箇重啣酒杯袁壽齡步虞伯生宜春

臺晚眺原韻江城孤起一高臺古木森陰梵宇開清磬

帆千片蓮洞蒼茫石幾堆憑眺李觀宜春臺請官誰

昔賢吟賞地狂歌醉帶月明回李觀宜春臺請官誰

恭惟有宜春最古臺千里待袁克寵春臺懷古憑虛

看毫末去萬家攬作畫圖來袁克寵春臺懷古憑虛

一層臺帝子優游實壯哉今古袁克寵春臺懷古憑虛

詠歌留四壁清風贏得幾仙才袁克寵春臺懷古憑虛

鳳凰臺在府城內枕城為臺樓觀突兀竹松交翠上有鳳
老夫猶記鳳臺生嘉靖間分宜大
學士嚴嵩建亭曰懷鳳載虛廬稿

然人之為山水奇者不歸之仙則歸之佛蓋以世無歟
崎磊落之人足以當之謂非仙與佛不足當其奇也袁
固以高士而得名也况乎登臨流覽又多前賢之遺跡
如韓李諸公足為名山重矣何獨此一邱昔為遊仙煉
藥之區今為浮圖卓錫之境竟無高人韻士收攬其靈
奇以自適其性情者何耶豈山水之趣向有所轉移古
今人不相及耶亦吏勤其職民勞其業無暇觀遊放懷
物外耶吾願今之為政者庶幾遠慕古人以怡神適志
於山高水長可也勿盡委
其奇於學仙學佛之人也
陳之龍重修湖岡臺明教
禪寺募疏
今之譚山川者走筆烟雲潑墨風雷某峯聳
詞拓益此山人墨客之意而假之佛弟子之名何以序
為其次幻為靈異神聖生死禍福之所攸繫迷惑小民
聚米積錢災及土木此術士與妖之言而託之西方聖
人之教又何以序為若本邑之南古刹湖岡山明教禪
寺發言重興於二者之弊無有焉化僧其慧禪師年少
行腳端靜閑雅法門大器初見甚許之及探其淵源乃
博山一派其師寰中和尚閉關有年不知其弟觀其師
此之謂也然則湖岡山之靈足以留師之錫乎抑亦師

宜春縣志

卷一

六

之性足以生山之靈乎此時不下手參證善加護持而
又何待哉又向待哉况乎聖人之像莊嚴佛土令其風
雨浸漬非佛弟子之所安而吾輩有畏聖人之心觸目
之間斷亦不能忍然處此此其公之請詞欲託蓋於宰
官長者居士之前非多事也豈有所勉強以拂人
之性不過有因而自有緣耳是在其師勉之哉
廖
國瓚重修湖岡臺大殿疏
郡南距城十五里有湖岡山
表故宅及唐更為三僧精舍歷宋而明建置梵宇高傑
整麗切雲濯日其時繼伯之般蕃宗風之響振殆於臨
濟博山大有光焉顏曰明教禪寺所由來非一日也緣
值鼎革之際戎馬續紛僧衆多散以致殿堂頽廢視昔
之棟宇椽題金鋪丹堊者俱化為烟雲蕩為冷風不惟
佛祖之靈爽所不安即鄉之士夫遊客亦莫不目擊而
心傷矣戊子間其慧和尚卓錫於此毅然修創遂成巨
觀迄今四十餘年矣茲山之興復不可謂非其力也顧
正殿材非杞楠為質不堅蠹滋觸焉不葺則棟且折師
欲起而更新之此其志願亦不宏大雖然千金之裘豈
一狐之腋大廈之材非一木之支出一人之積以為助
則難為力聚衆人之材以為資則易為功惟在匪勉從

事持益沿門徧向諸位宰官長者檀越善信而告之大
開施濟之門廣發菩提之念共勸善舉以觀厥成余因
謂此山為宜陽勝地非他事者比而老僧有塞山拾得
雲門雪竇風味知其將來必大振於前不同尋常無
關佛法廢興者故不敢以不文附彭維舉湖岡臺秋興
辭漫書之冊端以為樂施者勸
高閣雲常近層林日易斜池寒丹火燼石倚碧藤遮易
草色迷孤寺秋聲急暮鴉偶來依淨土不復怯風沙
家驪詩 山中寂靜啟禪扉屈曲松梢擁鐵衣別徑風傳
瀝幽巖響四圍最喜山僧
忘日月悠然頓與世相違
袁起涵詩 翩然遣興眼前途
怪石嶽崎凌北斗香臺盤鬱俯南湖雲移塔影花枝瘦
雨過丹池草色腴縱步只宜携酒賞幽壑深處喚提壺

江宰相宅 在府治內東隅各
字時代今皆無考

月臺 在東門外大較場演武廳
後池中俗呼為梳粧臺

袁高士宅 在城北大袁山下漢隱士袁京居此卒塋
于側後山以人名州以山名載寰宇記

宜春縣志 卷一 地理 古蹟 七

附江為龍詩 望裏秀州鬢云是袁山趾蜿蜒面城郭平
蕪接村市清風萬古留緬維漢高士志潔
行逾芳當年託遺軌草木有餘馨千載光祠祀悠然溯
遐踪巖光庶肩比霧豹與冥鴻名利豈能餌地以人而

傳風徽
播青史

唐刺史揭鎮宅 在郡東五十步宋
為鹽鐵都作院

梁丞相袁璞宅 在郡治東北後為開元
寺基即今宜春縣治

南平王鍾傳宅 在府城西北化成巖側唐僖宗賜第
也有南北二池今遺址與池尚存

明分宜都憲鍾烱宅 在宜春臺下規制宏敞今
袁臨協鎮治即其舊宅

唐李衛公讀書處 在郡西北化成巖取州
長史時嘗讀書于此

附楊應璠辛巳袁陽歲大稔衛公閣適成喜而歌示僚

友詩 衛公勲名懸日星老夫夙昔心所欲君臣投契古
難遇晉公而後罕其倫雲龍風虎卓變化開濟須

仗英雄人如何國是般紛紜悉相之議撓不行化成邱
壑美無敵聞以融師件遷謫崖前晞髮長讀書宛宛松
根見遺跡當年肇也部下生唯公趨士屬前席破天荒
忽得名元海潮賦就聲赫奕袁陽人文此發祥嗚呼盛
德安可忘臺傾濟濟地幾滄桑白雲暮靄屬空王伐材陶
贊及時舉賢侯濟濟來輸將昌黎一體同表揚巍巍翼
翼開堂皇伏臘泛醴陳膏菊朱蕘畫棟輝且光嗟哉昔
日騰雌黃毋乃鷓鴣空驚恨我生較公實多幸 朝廷
宵旰勤郵政四野救甯樂太平絃歌比戶稱明聖公餘
退食自委蛇豐盈最喜年年慶一官那得為閒忙萬事
終當歸靜正山川城郭想儀型長史風流千 葉涵雲
載情閣下秀江秋樹綠侑觴來薦楚鄉萍 葉涵雲
詠李衛公 熱鬧場中人一旦遭落莫襟期惟浩蕩世情
來烟雲淡淡著長松等虬昂怪石儼鬼鑿謝絕繁華夢
山水恣領畧廊廟江湖心高吟堪寄托快哉十五賦嶽
崎而厯落眼巨識英雄風塵能摸索倡和有同心討論
忘寂寞不知此境界何如平泉樂不知此風景何如崖
州惡但解讀書人隨遇能綽綽傍巖存數椽豐碑記名
爵世遠人已湮風流猶如昨功業非不隆經綸非不博

宜春縣志

卷一

八

能留千載名偏在此邱壑 郭鈺登衛公巖 衛公舊日
何去更向從人當自籌度 落孤亭紫翠中野迥紅光分暮雨天晴木葉響秋風武

皇國勢資雄畧牛黨私讐累至公論定是非誰復在晨
鍾空托 苑王宮

化成巖 在邵西北三里卽
李衛公讀書處

附阮閱化成巖記 宜春太守龍舒陳元明下車之初屬
相形勢慨然念韓退之謝章曰人安吏循閭里無事此

非古刺史語乎銷盜賊還流移撫凋瘵吾職也時方艱
難要以從容鎖之稽考圖經訪求父老見歷代人物之

盛如漢陳重之謙虛唐盧肇之邁往鄭谷之華藻其間
接武公卿肥遯林壑者殆不可勝數則又歎曰山水所

鍾固應爾也仰山峭聳萬仞距郡南數十里地以祈雨
請于神輒應未及詣山拜賜也郡之西北有巖曰化成

距江纔二里許歷覽山川回視城郭號為勝地部使者
趙粹中曰巖與仰山對蓋試登之翌日相與俱來顧于

曰舊傳唐贊皇公嘗居於此因摩挲石刻驗之不誣東

西二軒巖之上與其傍兩小亭皆未名而記之子因以贊皇公宜春十五賦二詩讀之掇其語曰倚巖而將夕故以倚巖名西軒積松杉之翠靄故以翠靄名東軒臨眺峯岑振鷺翔集見於公所賦故以振鷺名其巖傍之亭不但臨流可觀亦想像公之羽儀如此巖上一亭待名曰仰止蓋以見吾曹仰止前人之意而又拱揖仰止相為酬酢雖欲辭此名而不受不可得也贊皇公相太和間方文宗意向訓注奮身排之連敗為是邦長史而不悔放浪林泉著之言語其賦鷺鷥有君子小人之辨而嘉二芳叢之晚榮足以見其崇靜退之風遠相武宗削平澤潞讐服三鎮凜然與裴度齊名大中以後無能繼之者嗚呼昔人謂邱壑廊廟不相為用贊皇公兼有之然則後之所以仰止公者豈獨倦倦於巖石之間為哉子衰且病尚及見公等云紹興四年甲寅七月二日

曹光化成巖記

袁郡西北距城五里許有崇岡平臺可寄登眺之勝者曰化成巖僧屋其上名開化院舊有精舍乃唐李衛公德裕謫

巖僧屋其上名開化院舊有精舍乃唐李衛公德裕謫宦於袁時寓居讀書處也夫衛公立朝大節固莫能殫述然即其陳丹辰排訓注薦盧肇遠平澤潞服三鎮諸事皆可為後人法程則千百載下因其地思其人固景

宜春縣志

卷一

仰先哲之至情豈徒資遊觀焉已哉歷宋及元宦游於袁者如陳述李訖趙篔夫曹叔遠那海諸公相繼建亭構祠侈傳其盛惜其後莫有嗣修之者而歲久寢廢古蹟不可復覩戊午秋尚書郎渤海李公來守是郡飭憲貞度布德宣仁葺年之間駸駸乎百廢俱興暇日登覽仰見岫環如璧巖虛若軒下瞰寒江高樹鬱蟠綺如障如奇觀競出而衛公之蹟則湮矣乃慨然曰先賢遺矩方將為後人繩武而忍其湮沒一至此乎是我守土者之責也遂撤舊稅課局之廢材卜日命工建屋於其上中為燕堂凡三楹扁曰化成軒傍有廟宇以供香火閒館以備庖烹經始於己未年七月辛卯日落成於八月戊辰日其費悉取諸公帑於民無與焉由是舒嘯有止燕喜有居晨憇宵游咸有殊致而昔日荒莽之區蔚乎改觀矣詎非斯巖之幸歟嗚呼自有天地則有此巖歷數千百年得衛公而名始顯今去衛公又數百年得季公公而名復揚是巖之得遇於衛公又得遇於季公若相得以有成者豈偶然哉使後之繼守是郡者亦如我公所以追慕衛公之意而益葺其所未備則茲巖之名稱雄於袁郡當不朽矣不然安知茲巖不為樵牧之地而亦如今之所以悲昔者耶予以臺末謫貳是郡其

跡稍同於衛公自愧才德不逮遠甚而竊謂季公之恢
復古蹟真有以克紹衛公之休者也是不足為良二千
石乎時僚友汪君魯泉蒞任樂觀厥成子乃為稱述其
事勒石以記俾後之觀斯巖者有考焉季公名德甫字
仲修別號竹隅蘇之大倉人其他政

施閏章化成巖

記亭於化成之巖曰語石以其與石相對堪共語也巖
若在宜春城北大石礪礪矗立數丈好事者覆之以閣
三日新婦耳盍去之郡丞孫君曰諾於是發屋而石出
徙閣而亭成稍進為李儒公讀書臺巖洞炯然其色深
碧如茵苔初開而拳其半名之曰青蓮洞撤巖下敗屋
數楹始見巖勢側出如覆掌又如老人俯首舉袖揖客
於烟霧間客之同遊者皆曠若發覆僧之居是巖者亦
詫以為非吾故巖也於是與客舉酒歡甚山水之有亭
樹猶人之高冠長佩也在補其不足不得揜其有餘向
之人非不亟賞之也愛護之已甚而失之觀面者也予
非能有所加也因是損益相之物外而遇乎其天者也
是不記

江臯化成巖記

地理 古蹟

宜春縣志

卷一

因人為顯晦曠者遇深幽孤寂之人雖曠亦晦與者遇
朗朗軒豁之人雖與亦顯袁之山大而曠者惟仰山小
而清且與者為化成巖仰山距城百里外荒寂不可遊
化成去城北二里許耳枕江蒞城短策輕舸朝暮可造
李文鏡謫長史時曾讀書於此人至今稱之山不甚高
迴合委蛇茂樹深叢怪石嶸崎自成崖壑曲有奧趣勞
人應接秋晴操小艇溯洞從之倚棹沙汀步至山麓石
之排突森列若躡若趨類牛羊虎豹奔而下飲於江與
客爭路當門一亭特立衆石紛繞其旁拱揖趨承如相
應答顏曰語石愚山施先生所構也舊有亭曰倚巖曰
翠靄皆用文鏡賦中語石苦為所掩盡鬱其礪阿層疊
之奇先生拆而新之呼石與語也今亦倦欲休矣巖鑿
山數十丈環以亭軒中為文鏡讀書臺憑高眺遠江流
繞足下羣山星拱屏列兒孫羅立荒翠空濛想見其置
身高曠俯視塵寰也右折數武有石撐崖側出色鮮碧
如波上青蓮乍舒半萼下小洞豁舒偃僕而入曲身盤
折望之疑蜂入花房卷舒高下而嵐氣烟痕盡收襟袖
矣壁多題名剝蝕不可讀此非境之至幽且奧者哉然
居者遊者朝斯夕斯杖履盤旋往來無間而宦遊為政
之人雖曰名山不遠必得一登茲邱觴詠嘯歌以為曠

豈非以文鏡之高風亮節曠絕千古因人以重其地哉故曰山水之顯晦在人也若仰山吾終對烟雲而惆悵矣

附隆泰化成巖偈和紀畧序 李衛公唐中興後名相也以訓注宗閣之譜出為鎮

海節度使再貶袁州長史袁城西北五里有巖曰化成郡志載公嘗讀書於此余觀唐宰相自憲穆以來局量稱裴度而以才畧著者唯衛公公之勲業文章煥炳炳炳字宙間卓然不可磨滅者悉詳名臣傳中蓋可考而知也余蒞袁初每至巖必拜禮公尋閱郡志知巖為公讀書處益嚮往之余平素極愛讀書人公以大臣謫居

猶疏疏孜孜若此因命兒子德成篆李衛公讀書處六字鐫於石壁重新其額曰託賦樓不獨為袁之多士勸亦欲使我輩居官者其加鞭策也巖高十數丈俯瞰秀

江風帆往來烟波萬狀崖壁間怪石離潰立者為屏風為釜為破窠形突者為玉筍為塔尖為旗為蓋為屏風

為帆為獅象熊羆其右峭石撐扛成洞中可布席容四五人旁有寶竹樹交蔭最上一徑斜通山頂日光逗漏

景趣奇絕巖之勝於是為最石壁詩章行草題詠如織

宜春縣志

卷一

余於公餘時邀二三僚友遊覽其間諸君興致蓬勃不能已已德成雖不工詩而有詩癖彼此倡和累積成帙不下數百首就中擇其於化成巖可以存亡補闕使舊蹟重新者得若干首鐫之而以化成巖倡和紀畧名篇篇首併繪以圖俾閱者一目瞭然謂之鐫詩也可謂之臥游也亦可並使遊集於斯者意不備在山水間恍然有悟於卜氏子仕優學優之旨是則余攜題衛公讀書之微意也夫曰紀畧者聊當別志云道光元年辛巳之秋

附隆泰托賦樓跋 巖左側有樓前明郡守黃公鳴喬建督學黃公汝亨署其額曰托賦樓以

衛公十五賦故名距今數百年寺僧失守覓之不可得余不欲往蹟之就湮也重書以示不忘古初之意云

附鄭強化成巖詩 城郭羣塵外江山勝槩中鑑然一灘水和以萬松風夾徑森奇石危亭納

大空蒼崖不能吳南岱登化成巖呂祖閣同青巖作語曾識贊皇公勝蹟貽唐代天書見草萊閣從山半出仙自岳陽來吳楚文章合風雷石洞開願言清夢裏指點脫塵埃

施閏章化成巖語石亭

古樹垂藤匝繁花夾路生為亭當怪石選洞錫嘉名晚照遙峯

見高飛獨鳥輕無僧堪共語擊磬數聲清

潘士丰九日遊化成巖

二首

秋風苔留雨後蹤嵐光催宿鳥灘響答晨鐘水落千盤曲山圍萬壘重危亭支未穩卻立撫孤松

裏林虛入暮曛沿江平野合列障片雲分帆影

張鴻

沈廷瑞劉慶永孝廉招同潘元功遊化成巖

地僻秋光老巖高日色曛江流千派合山勢萬形分連洞沿溪入霜鐘隔

浦聞勝遊逢益友濁酒易為醺

袁克紳登化成巖有石鐫如畫二字

偶來如畫處俯石盼江流曲瀉千山水輕過一葉舟古蘿幽掛月新竹嫩搖秋飛閣浮天半橋危步且休

沈廷瑞劉慶永孝廉招同潘元功遊化成巖水飲二首

數里入雲峯留題憶舊蹤危亭誰語石卓午但聞鐘徑轉苔紋漬巖高竹影重探尋原不厭小立倚長松秋色晴光裏憑欄對夕曛片帆飛處急山郭望中分佛火層樓出漁歌別浦聞勝遊情不倦把酒各顏醺

宜春縣志

卷一

黃在中夏日化成巖偶作

兩岸春聲急巖扉盡日間野雲愁外合谷鳥夢中還欹枕

送長夏憑軒掛遠山暮鐘何處起明月滿禪關

劉師殷秋日遊化成巖

風烟

迴紅塵隔素秋巖懸千磴險霞映一江流靜倚

袁起

渭遊化成巖

石壁寒巖險亭空草樹深宿雲歸洞口落葉下江心秋水通吳楚春城聞古今雨餘

山返照松響壑迴音讀罷衛公賦情

梁穆遊化成巖

暖風初噪簷前鳥思向城南踏芳草漫驅羸馬緩尋春

休沐喜無俗務惱沿堤弱柳染輕黃一羣花鴨戲芳沼

黛色迎眸分外青化成巖畔東風早嶙峋怪石虎豹踞

溪流如玉蕩微波萬頃春光入浩渺青蓮洞裏更深邃

嘉名錫白宣城老一峯側出勢若懸暎疑驚天柱倒

我聞仰山山絕奇突兀有餘幽秀少何如此巖靜且便

孤情祇與邱壑宜蝸角任渠鬪工巧披拂苔蘚誌奇字

勢走蛟蛇不可曉坐石臨流鼓我琴一曲忘機滌煩燥

盤礴竟日興未窮夕陽已掛蒼松杪歸鞭迴指讀書臺
衛公遺跡誰探討山川無恙人是非僕僕風塵何日了
逝將解組焚銀魚西屏臥
對青山好四屏恒郡山名
梅照壁化成巖
弄刀斧斫

劇石根伐頭土清空一片現玲瓏形狀怪變指難數惟
餘一事尚未足無讀書聲山總俗忽然招致李衛公相
業抱殘此遷逐長吟短吟山谷鳴十五篇賦咳唾成書
聲一歇又千載山靈抱恨鬱不平堂堂我公來出守政

事遂繼衛公傳名山每結才人緣山中花鳥俱改色春
江秋月爭喧妍却怪唐家大昏蔽賢如衛公成鑿柎廟
堂寂寂山孤淒撫卷那免感慨係何如方今際
昌期鼓

吹休明儒者為公子翩翩好
才調蓬瀛仙島相待抒鴻詞
冀弢書化成巖紀畧後
呈保齋太守公十上峯
我州不見李長史但見太守隆袁

新樓憶昔尋詩桂林去往來此地搜韓句竭聞典郡有
名賢十載欣逢為李御一編出示惟化成特假贊皇心
迹清豈其美仕始能學要以去日猶知名此際微黃歸
袞繡我公政業三黎後新圖別紀化成石玲瓏巧繪篇

宜春縣志 卷一

篇瘦此巖何止百平泉我公且笑鬱林船安帆自飽風
兩袖賢嗣能傳祿二千我亦題詩附新畧有人偏我鞭
先著何日紅綾文字
遊再寫青油笑談樂
德成詠化成巖獅子石
巖前有

獅子遂以此三字鐫之
君不見媧皇鍊石天缺補離
奇光怪爍千古又不見梵王宮前聲若雷驚人一吼獅
子柱阿誰移此鏡山門鋸牙鉤爪巍巍蹲突出儼然百
獸長渺視衆山如兒孫小獅帖耳復仰首大獅顧盼張

巨口吞吐雲霧驅風烟虎豹潛踪屏兕走目光閃閃紫
電飛仰鼻奮鬚震巖威生平具有超羣志肯與羣毛共
卑微我今命爾名白澤爾能成獅我叱
陳之龍遊化

石石乎獅乎應點頭大書三字於爾額
成巖
登臨最愛是春風扶杖難窮第一峯舉目荒城烟
霧淨縱觀翠岫宿雲空無心水石長相激有豔山
花暫未逢力倦歸來舟
施閩章許將軍元公置酒語
檝好呼童載向月明中

石亭亭是予初構遇雨飲竟日
陰巖細靄入青冥坐石
提壺向晚汀乍見華筵
山鳥怪共驚急管野樵蕪酒酣濕沾從花雨吏隱
蕭疎見客星緩帶雅歌君不黍風流他日記吾亭
潘

于遠登化成巖值雨雨絲風片灑幽亭乘興何妨帶濕

臨石壁生潮添畫意溪流按節人

深獨坐不堪長嘯从恐驚潭底蟄龍吟潘士丰九日

新霽陪沈榜巖遊化成巖履齒探奇屈曲尋參差古木

鎖烟深巖知息靜孰跌坐松

解投機響梵音涼雨洗開千嶂色農雲時送袁起濤

一城陰溪山我輩都知已舉酒相邀賢素心袁起濤

化成巖感舊朝草長莓蕪一碧鮮登臨記得暮春天乍過

移洞口潮聲吞吐近巖前老來

魯鴻化成巖懷古勝

杖策西郊路峭壁依稀似昔年

當年結構勤野曹猿鶴自為羣蓮歸古洞春光在石抱

空亭夜語聞千載勳名餘落照一時恩怨總浮雲宜陽

自具江山勝何彭維舉化成巖懷古

層層石磴薛蘿

必平泉草樹芬叢烟水蒼茫一

派通亭館於今留斷碣松杉依舊嘯春風草荒曲徑雲

連寺花落禪堂鳥下空極目南天憑眺遠夕陽江外數

青幾度攀援百尺巔好將

傅臣高詠化成巖託賦樓舊蹟續新篇醉鄉春滿

峯

宜春縣志 卷一

地理 古蹟 十四

胸中竹談陣風翻舌本蓮莫謂山林無宰相可知富貴

有神仙千秋若問三生事訪石分明認此年是口上

峯覓石書篆得石張嗣古化成巖

三首 雨餘山石

後遂別號訪石洗孱顏臥虎蹲羊

各自閉杖履貪穿秋色好不知衣惹蘚痕斑迢迢綠野

送平流喚得風光入小舟撐破蘆花波底月淡烟衰草

不勝愁長松吹斷晚來風水底輕溶落

照紅獨立黃昏無一事好山忽在暮雲中傅行簡化

成巖巖石虎走萬山掛長江龍蟠百舟集

成巖梅花已晚桃花明馬上東風彩雲濕施閏章化

成巖青蓮洞石作蓮花半未開玲瓏幾曲盡莓苔

宜春縣志 卷一

地理 古蹟 十四

十四

繼道化成巖語石亭步月石亭月冷照泉流綠暑多應

午夜遊古刹斜懸空際影一

聲清磬陳灤借范頤天學博登呂祖閣

金仙高閣畫

萬山秋似鶴可能飛去復飛回

江自嶮化成巖青蓮洞

唐盧肇宅

在秀江北有洗硯池產綠毛龜今為宜春縣學

呼為盧城上通盧洲為講學之所下為弋林即今官園地

盧肇讀書堂

在城西南三十里肇嘗讀書於此

附劉今隆盧肇讀書堂記

袁之名勝多矣凡靈巖幽谷奇峯秀鳥覽勝者罔不即其

地建亭臺苑囿以恣登眺乃不一二代而高費巨榭竟
蒼烟白露而荆棘矣崇臺雕榭竟頽垣斷塹而荒墟矣
嘯歌之場管絃之地竟為興譏鳥雀噪音之區矣徒使
探奇之士致嘆於今昔不常無他少所藉以長留也邨
之西南有山名震山之上讀書堂存焉堂為唐狀元盧
肇讀書處樓閣無奇製以肇曾讀書其中遂圯而後與
與而不廢以至於今嗟乎肇之去今遠矣海潮一賦十
古絕唱名賢之聲施固宜不朽即一讀書堂亦歸然不
滅倘所謂地以人傳是耶非耶竊見古之傳其地者矣
陋巷以顏子傳東里以子產傳他如富春之山傳於子
陵卧龍之岡傳於諸葛凡物皆有幸有不幸焉幸者遇
其人即因人以傳不幸者雖具異觀未遇其人終歸泯

宜春縣志

卷一

五

沒斯堂其因人而存乎故記之以嘉其遇

附葉涵雲詠盧子發詩

自有登科錄三年一狀頭何以

姓名宅復名洲世俗所欣羨奪標詠龍舟此道骰子選
那堪重名流衛公誠好士一顧博前籌非附青雲客能
無戚戚憂得失等閒事知己感難酬器識務宏遠榮名
固浮漚古人可不朽豈藉科第留三復海潮賦誠足傳
千秋 陳涇盧狀元讀書處 雙流明鏡夾一架彩虹張地
城北道虛館水中央有錦當年奪是龍此處藏文
標全集蝕祇樹半園荒月下書聲冷低徊夜色蒼

盧石

舊在東湖之南因狀元盧肇名宋知州張杓弟南軒

介亭之石本盧肇家故物也挺然特立有汲黯在朝淮
南寢謀氣象予取豫卦六二之義以題其亭後亭圯移
石府學前乾隆二十二年知府陳廷枚刻碑立亭於石
側揭曰介亭石至縣學前立一石亦稱盧石蓋肇宅前

石也非介亭石

附任大中和祖擇之題盧石詩宜陽刺史才祖擇之雄傑大早雨一方轉瞬焦

枯活公退趣向深水石探其絕長江北岸林唐有盧子

發曾居此林下高把簪組脫歲遠成荒墟佳名詎泯沒

有石數尺長猶是舊時物沉辱泥途久實有堅重節擇

之渡水見特為必慘切萬夫一呼聚撓動雷聲揭地驗

若驅來巖谷俱震裂齒輔郡東湖脫得大華骨白玉漏

織紋雨頻為澡刷草蔓漸盤遶柳綠頻揮拂潤恐欲逆

泉怪亦有與穴安知無蟄龍時見微雲出幾因中夜吟

向曉捲簾月氣暗逼人寒蒙籠無分別烟重風掃開獨

立勢突兀蘇武見單于傲晚腰不折人皆畫將歸手筆

恨羸拙擇之豈不賢天涯避讒舌對此憂足忘我觀未

甚悅不得見媧 楊應瑤廟側二盧石恒思移之未得

皇願天無破缺 五嶽鍾靈秀三山擅天工我

時經營語石亭因作是詩 昔夢瀛海百萬青芙蓉怡悅

莫可接時時着心胸盧家兩石筍聞在宜城東鯨牙與

龍角比擬終難同何人昇廟外隔置俾勿通譬彼圭璋

器翻棄塵埃中燦然立道路氣上摩蒼穹化成一片地

莪莪起新宮雲藍而水碧蘭白蕉花紅安得遣壯士移

宜春縣志

卷一

六

挽近簾櫳間之以疎竹木植雙梧桐晨夕其暗語妥此

幽人蹤鑒賞品甲乙不屬奇章公平泉醜酒石可以類

相從誰為後來 祖無擇盧石詩 覆遺基誰氏宅皆云

者當成位有以文章名藉藉宅中舊物何所存惟有

子發其姓盧往以文章名藉藉宅中舊物何所存惟有

嶙峋一巨石濶纔三尺高倍尋丈塵沙羣瓦礫余心

好義因獨往下馬環觀聊拂拭地表可見十二三已足

怪駭動魂魄呼工運鋪墜其旁挽以長繩百夫力謹然

鼓譟登大車恍爾如蒙兀無與鄰頓覺亭臺增氣色彎環

澄波映天碧倚空笑兀無與鄰頓覺亭臺增氣色彎環

幽竇莫敢探恐有垂龍飛霹靂余嘗南游到陽朔衆峯

轟轟春筍植捫蘿踏窮之遍若此奇作曾未識郡人

奔走來如雲故老驚視復啾啾具言此石遇真賞屈指

於今年二百沉埋曠代誰爾珍一日光怪愈荆璧嗟予

束髮無大夫後區區志尚惟忠直廿年再謫非不窮猶慕

堅純無改易如何故老不我愚感物再三形歎息石不

能言人有言勿 梅堯臣盧石詩 袁州大守蓬山客來

使他時重埋阨 梅堯臣盧石詩 過盧家尋怪石盧家

百物今已空惟石難移留舊蹟埋沒尚存三四分雨淋

日炙如被渤太守惻然呼健兒荷鋤秉錘爭來役健兒

掘土不為堅旋旋剝沙見圭隙漸奇漸異人忘勞更索
更深知幾尺高峯削出嵩華骨虛窟鑿破蛟螭額千指
曳繩車駟輪擊鼓助力歸東陌東陌東頭湖水傍黃泥
洗盡何蒼潔故宅愈冷東湖喧貴賤競觀無礙隔太守
自憐堅直心愛少憎多屢遭謫南入蒼梧及桂林名山
偏訪無窮僻所宜厭慣不入眼向此歌吟尤愛惜我思
承叔滌陽時大誇古翠菱谿獲作詩遠寄子與蘇高唱
相隨無節拍今知賢人趨向同玩好託情忘俗格廷康
從事胡公疎一見託君如李白雄才落筆瀉天河綴嶺
孤清仍險窄人探虎穴誰為難辭通造化方能敵殿後
吾雖胆力強獨 彭維舉盧石歌 東湖之水連天碧東
鞭疲馬終無益 彭維舉盧石歌 風吹浪振危石嶙嶙
踞上流巉巖遠映明霞赤呀嗟盧室成墟墟遺石千年
空赫赫雨露淒涼鳥雀棲風霜飄泊蒼苔積物換星移
亭復頽介然猶白重方格古人傲骨不可留石頂封雲
增惋惜盧洲水遠盪孤舟盧石烟寒迷大澤海潮聲遠
幾徘徊仰止 易儒傑介亭石詩 數仞壁立勢崔巍奇
高峯懸咫尺 易儒傑介亭石詩 石小與宮牆依當年
故物屬盧氏盧公好事世所稀持節歙州宦情薄不載
金玉載石歸人間轉盼成今古烏衣巷口宅無主敗瓦

宜春縣志

卷一

顏垣石湮埋數百年來飽風雨憑誰移向東湖東太守
風流人姓祖巖巖氣象類應孤後先相賞有吾徒汲黯
何人石堪比品題定自張敬夫從此經歷幾歲月介亭
地盡湖水竭萬夫推挽入城來泮水澄鮮石突兀諸君
愛石豈徒然欲使此邦仰前賢石
以人重人不作此石嶸嶸常如昨

盧洲

在城北秀江橋下里許一名狀
元洲舊有閣道光六年洪水毀

附袁業泗盧洲三元閣記

按盧洲盧狀元肇讀書處臨
洲之上品甚卓絕初豎石以

志千霄韓昌黎刺袁時西北有慶雲現洲實當之不數
年而肇大魁則洲名尚矣後石移東湖張南軒且謂其
挺然特立望之似波瀾寢淮南氣象嗟乎一石猶繫人
愛况茲洲哉時代遞遷滄桑互易志士高人徒懷仰止
一日鄉紳士民僉曰狀元洲雄據中央迴瀾砥柱一郡
鎖鑰矧盧君寔式憑之建閣壯觀實合邵利賴時郡別
駕毛侯從中憇憩之注向鼓舞適中州李侯貳守吾袁
兩攝篆得修舉盧洲狀析然首肯親臨賜額前後捐金
幾三百毛侯與司理伍侯邑廉侯各捐金有差一郡士
夫同心捐助三元閣不日成矣障以石岸周以高垣繡

柳星拱綵柱雲連門廊亭臺漸次重構下蟠地軸上磨
大樞中流峻起四望岬嶸南瞻大仰則鄭拾遺書堂在
焉雲臺一編載入金匱至今炳炳北眺袁江高士遺跡
清風萬古西顧化巖遙對昌黎文鏡遺愛猶堪墮淚朱
幡墨綬暇日登覽倘亦有甘棠思乎東企鈞臺以下徵
君之風采太常之忠狀動少微貫日月吾儕亦有意乎
猗歟茲閣成而神靈護綏波恬川澄月恒日升鍾英毓
秀洵足美矣然則地之靈孰翼之靈人之傑孰助之傑
閭閻之豐盛孰錫之盛工始於歲乙卯竣於丁巳計費
金幾二千餘此時予方解政歸養首事者素文子不敏
聊誌其創始如此且
識狀元興復之機云

附黃河清募重修狀元洲文標閣小引 秀江自西來逕郡城北東下里

許有洲焉為一郡鎖鑰以唐盧子發會讀書於此至今
稱狀元洲舊有文標閣以奉子發今其主寄於僧寮蓋
閣之不復久矣夫子發本孤寒士自幼以文行受知於
盧邑侯萼其後李大尉知之王主衡知之盧斐諸節度
亦無不知之當日中朝朋黨如水火然士不幸生其間
若杜牧之李義山之徒或至於黨怨或陷於輕薄子發

宜春縣志

卷一

六

出入贊皇之門獨能嶮然不滓誠如其自進表所云知
臣有立至無親黨者大非同時才士所能幾則其宜在
鄉先生沒而祭祀之列豈獨以其掄魁哉今閣既頽圯
而舊齋石岸亦被水齧主僧一輪有志於興修而恐其
力之不勝也將求助於郡邑之好善者文標集萬載幸
上舍重為表章而是閣及洲址又得復其舊觀固非特
為子發幸也諸君子尚其相成之爰為弁其簡端

陸魁春盧洲卽事詩 興采探勝地小艇渡盧洲雨色烟波午江聲草木秋飛梁橫北郭高

閣砥中流一鉢伊 蒲饌空餘古宅幽 劉幼發詩 勝蹟留洲渚溪山到眼來灘聲喧日夜水氣湧

樓臺往事懷先哲隆 名屬上 彭澤潤狀元洲感秋 澄

才千秋佳話在登眺 獨徘徊 彭澤潤狀元洲感秋 澄

飛白練砥柱耿中流 海勢驅詞壯潮聲入夜秋水 施

寒魚傍石霜肅雁棲 洲往事浮雲散摩碑識狀頭 王光烈

閨章詩 鵝鳴城下水東流草色青青過白鷗 劉長發詩 一

詩 洲頭一望萬山環碧水明沙照客顏 劉長發詩 一

寒烟鎖碧流野僧乘月渡扁舟人
間莫訝無仙島又見蓬萊第幾洲

鄭谷讀書堂 在城南仰山下 距城八十里

附李侗題鄭補闕山居詩 高節諫垣客白雲居靜坊馬
饑餐落葉鶴病曬殘陽野霧

昏朝燭溪牋惹御香相 僧皎然題鄭谷江畔桐齋 齋
招倚蒲壁論句夜何長

開別業坐占綠江濱流水非外物閑雲長屬君浮 僧
榮未可累曠達若為羣風起高梧下濤絃日日聞

齊己題鄭郎中谷仰山居 詹壁層層映水天半乘岡壠
半民田王維愛客難拋畫支

遁憐才不惜錢巨石盡含金玉氣亂峯深鎖 江為龍
棟梁烟秦爭漢奪虛勞力却是巢山得穩眠

詠鄭守愚 緣何一代風騷主卻只人呼鄭鷓鴣
後改為關帝廟今呼為嚴府關帝殿

忠彌堂 在府治西明分官少師嚴嵩第自籍沒
在城內燕樓外街南宋李冲元

難禪閣 為宜春曹掾時建黃庭堅作銘
地理 古蹟

宜春縣志

卷一

九

附黃庭堅難禪閣銘 龍眠道人李元中為宜春法曹掾
者伏辜而即罪如罪在己治罪之器人服而病焉如傷

在己卹其寒饑痾瘵加以保惠教誨使宥者浹然而悔
杖者自今而悔流者在塗而悔死者方來而悔孔子曰

子產衆人之母也而書言不盡其行事未知其能若是
乎獄事既助於是築閣以退聽已無憾而後安禪而乞

名於其友山谷道人山谷曰菩薩久習勝妙禪定於諸
三昧心得自在哀憫衆生欲令成熟捨第一禪樂而生

欲界是名菩薩難禪可名曰難禪閣龍眼曰若不倦勤同
豈能不勉焉請為我銘之山谷曰勸己以不倦勤同士

以不倦勤萬物以不倦故曰難爾夫禪又何難銘曰
亘念現前常樂我禪於法不難生死險地於物無畏於

法不易能易能難則無難易迥豆鳩毒使合虎兕蛻乎
其無功淡乎其無味至道之極不出於聖人萬物之祖

不歸於天後百世而見堯舜忘義忘年不動不禪坐無
禪生

禪生

四藤閣 在府城南仰山寺朱子帥湖南經此為
學者講道邵士李長明等皆受業焉

潺湲閣 在府城南仰山廟右自溪前

附婁乾曜詩 一派洽洽遠檻清塵襟洗滌自涼生
夜深好夢才驚破疑是半天風雨聲

龍王閣 在府城南山下

棲霞閣 在府城內

稽古閣 在府學內宋清熙
間州守張杓建

附蔡袖登郡學稽古閣晚望詩 簷外川原迴烟中草樹
微山城暮吹角客子淚

沾衣歲月經身老行藏與願
違歸禽帶落日渺渺背人飛

需宴亭 在州治南唐天寶間郡守房瑄建後刺史王涯
增修併刻李華房公德銘柳宗元書其碑陰

浩然堂 郡守祖
無擇建

慶豐堂 有碑郡守祖無擇建自記河南柳淇書京兆章友
直篆額碑久沈沒土中乾隆乙亥邑士陳敏等呈

宜春縣志

卷一

請郡守陳
廷枚復立

附祖無擇慶豐堂記 予去年春正月自廣南東路徙荆
湖北路皆為提點刑獄秋七月按

部道次鼎州奉詔改廣南東路轉運使時廣源州蠻人
寇陷嶺外數州朝廷趨行乘遽日馳二百里浹辰達所
治遠方人無事戎備既寡糧餉不給賊氣方銳我師屢
敗予不量力亦提羸兵追躡其後逐出境外未幾以罪
移典此州其始至也見城郭井邑在迤邐衆山之間如
圖畫屏障使人俗慮都去郡僻務簡居多暇日小寢西
有地一畝餘荒穢無人迹命冀除之為堂以休焉公退
則擁書隱几而坐考聖賢之事業以自廣間或速賓友
以琴樽相歡因謂坐客曰昔也委妻子而去履山川之
險見危致命可謂勞矣今也曹無事秩有祿飽食終日
不亦泰乎人雖以為貶予不以為貶也顧無以報陛下
之德為憂矣是秋禾大熟百姓足食上下莫不悅懌乃
名其堂曰慶豐且持其說私自
賀焉皇祐五年十月二十日記

祖無擇慶豐堂閒詠十首 吏散鈴齋掩閒眼到日斜無
端是春夢容易繞金華鄭聲

良可厭聞按七絃琴欲識調絃意理人先理心年長身
多病閒抄已試方未甘先犬馬畢命報恩光青山日相
對閒看白雲生誰謂無心出中含濟物情晚按三杯後
閒烹北苑茶色香俱絕品雲泛滿甌花偏州賓客少閒
作道家裝迹靜心還靜逍遙覺日長兩路輕埃息閒吟
面曲池游鱗時對擲雙破碧連漪朝來因試筆閒答故
交書莫怪音塵絕吾心與世疎漸老無功業同思惜壯
年桑榆如有待猶可勒燕然晴軒足清趣閒與鶴開籠
寄語北山侶
無驚蕙帳空

南園道堂 宋宣和間州守辛炳建

附辛炳詩 縱步幽園晚未回已馴魚鳥莫相猜垂楊當
路從教折細草沿階不費栽花樹影中流水
過林梢缺處遠山來一節春
事無人共踏破空庭幾點苔

吏隱堂 宋州守趙資道建

附祖無擇吏隱宜春郡詩 六首 吏隱宜春郡年豐獄
訟稀餘糧委南畝茂草滿園

宜春縣志

卷一

地理 古蹟

三

屏天意憐艱食民心耻畫衣萬家行樂處車馬有光輝
吏隱宜春郡溪山樂畫圖纖鱗時自躍幽鳥靜相呼
曉浪噴寒雨晴嵐鎖綠蕪漁樵本吾事搔首更踟躕
吏隱宜春郡山城少客過靜中窺物理閒外養天和春
暖尋花鳩宵涼瓶月波將迎者誰子勞逸兩如何 吏
隱宜春郡放懷詩酒閒未能漸千里幾欲效中山杜甫
藩誠窄劉伶幕未慳高吟與沉醉榮辱詎相關 吏隱
宜春郡窮通懶更占矜名遺巧認晦迹喜深潛昔慕死
爲聖今師靜養恬優游無一事不覺歲時淹 吏隱宜
春郡素餐實愧余政聲慚遂霸文藻謝嚴徐使節分銅
虎仙廬秘石渠君恩殊未報不敢話歸與

無訟堂 宋州守阮閣建

附沈昭遠無訟堂詩 有序 袁人稱好訟比來假守見
其士力等而知廉耻民樂善而守
儉嗇於是待以平恕宥以寬簡愚則教之不從刑之
踰兩月而牒不盈百謂之好訟可平因以郡圃之堂名
曰無訟堂聊以雪袁人之謗庶幾後來者以平恕寬簡
爲治而可以無事矣 欲爲袁人雪謗聲因將無訟榜

堂名他時芟舍棠休剪近日圓屏草已生自是索披求
太察却疑東矢聽難明要知本樂農桑處請看東郊境
耕上

四益堂 宋州守張杓建

敬簡堂 宋州守黃劭立

尊德堂 宋州守周必達建其弟必正有記

附周必正記 有云正直慈愛宏才碩德吾尊房公詆排異端扶植聖道吾尊韓公交謀武畧外定

內理吾尊李公其他相繼而稱賢者吾次第尊之

節正堂 宋州守羅克開立

勤順堂 宋州守羅克開立取韓愈勵州溪堂序上勤下順之語以名

落梅堂 在府治內

宜春縣志

卷一

地理 古蹟

三

附王孝先詩 有云聊將三更初笛吹向五更初

澄源閣 在府治後圃宋乾德初州守呂延真建

觴齋 在後簡堂

無雙亭 宋州守高誨之立

幽巖亭 宋州守劉履忠立

漱玉庵 宋州守戚如琬立

小清涼境 宋州守李沈立

清心堂 宋州守沈昭遠立

附趙資道詩 燕坐都忘塵慮繁小橋橫絕跨幽亭
澗澗池面銀開鑑滌蕩庭心玉展屏

景韓堂 宋州守陳熾立慶元三年高誨之重修

不受暑堂

高誠之建在府治內後有月臨庵修禊庵

鴻雪齋

在府治內

綠陰亭

在府治內

附袁皓綠陰亭詩

綠陰亭檻枕江流辭去重來三十秋百里溪山都在目一川風月幾回頭

官分皂蓋終期老職奉皇華不自由珍重斜陽兩山水他時相伴寄漁舟

歐陽薰和袁皓

綠陰亭

多才太守大風流吟倚危亭麥正秋兩岸樹陰遮水面一軒山色簇江頭朝中譽遠思田叔物

外情高想許由輕掛雲帆又東去不堪從此憶僊舟

疏泉亭

在府城內宋天禧間袁延度守是州民罹火災為疏李渠以備火民甚便之因建亭於上自為記

附袁延度疏泉亭記

和刺史李將順以民嘗若火公指源引水灌城而入周遠民居不獨為火備亦以灌溉漑漑源民獲利焉公罷去繼者不能循其績渠於是堙後二

宜春縣志

卷一

三

百年王公懿典是郡復以州人頻為火困王公察治舊渠以為備然經制靡固王公適去渠隨塞又二十年延度自同得罪倅是郡至郡時居民新為火焚蕩然而野處噫民何知居上者不與之為備耶由是訪耆老詢故迹深決而浚引溢城西池循環宛轉無所不周潺湲洽洽聞之使人有山林興接郡之左因瀦為池池中築洲洲植以竹其下種蓮復為是亭意蓋欲其登則思李之經始王之嗣興而延度復大其迹將以防民患建民利無使如李公後二百年間無若李公之用心者乃命之為疏泉賦詩一章刻於壁天禧三年九月五日記

飼龍亭

在木平山下興化寺距城七十里善道禪師嘗咒飯飼龍於此又有儲月亭景物清絕

附施閏章珠泉亭詩

亭榭何曖曖倚檻臨潺湲穴魚游暖日庭柯含碧烟微響瀉哀玉清

流膏渚田心懷濠上賞日謝區

袁業泗詠黃郡伯重

修珠泉亭

為訪城南踏運苔珠泉重對賞心開瀟澄媚色侵桃岸點點瓊花入鏡臺幾度昆明啣照

澤一鄉之善貢士趙監稅賦進士李蒙亭趙重
存凡收租發糶以時一聽其經畫官不預知市估有
昂積財有登耗悉居其實糶畢具某年斂散米若干
各幾何報州學或租戶逋負過期中州學幾糧官遣
督治深惟此邦限以貢額之窄士氣沮折其待補前
較以時江清江取放蓋在解送之域而諱勞憚費有
前之二說聞者深明是莊初成人情積習頹弛必藉
大夫勸率經理以越其行惟茲事龍圖右史張公暨
局李判院實啟初議幸不隕墜後日縱更其初僉言
屬一試之後如就熟路孰不競勸凡赴補人給三十
不許併支起程十千或慮人意難憑則發軔五千至
汝五千亦在審度到三衢十千行都試罷十千人多
不足以券盡止人穿券有餘儲之以俟次補衢暨行
當有寓券之所人給二帖取之寓券非卿大夫或郡
貳移書齎往不可自本推之待補亦勸駕之小者得
其責哉乃若致嚴分餉州選委一察吏治之足矣莊
訖工右史張公大書其扁揭諸門端觀者懽敬凡田
土名畝步租額佃戶列具下方敬饒諸石用貽永久
禧三年二月初

宜春縣志

卷一

地理 古蹟

三

東湖

在東門外三十步宋至和二年州守祖無擇始於湖
上建臺榭為遊觀之所曰樂遊堂廉堂讓堂休亭銷

暑亭風亭月臺采香閣采珠閣北有射棚南有盧石讓

亭以避濮安懿王諱易讓為遜紹聖中州守鄭民瞻易

廉堂為閣武堂又以盧石在遜堂之前易名盧石堂淳

熙五年張杓知州事弟棫書東湖廬且易盧石為介亭

石仍題字於側紹熙元年州守黃邵再修易休亭為平

易堂來香閣為浮蔭銷暑亭風亭皆為圓庵令僧任灑

掃之責庵旁建仁智軒開應中州守羅克開重修歲久

湖洞嘉定十三年州守滕強恕瀆築今廢久矣

附祖無擇東湖記 袁城之東有湖焉上有四亭與自近

不治以荒初予至州目其處不及往者三月既而吏曹

事簡登城而觀水雖盈而甚行屋雖存而將傾迺議葺

之且官無羨才苟賦於民則予不為也聞封山之浮屠

氏多藏者籍其餘什之一募工掄材一皆新之別為亭

臺閣五楹以珍木嘉果間以奇卉幽草紅蕖綠荷雜襲

波上於是游者日往焉予樂州之人觀游是好遂畱其
中堂曰樂游其東堂曰廉循匡之南其亭曰休因城之
高其臺曰月抗水而榭曰采香閣為庖廚二次供賓客

舊亭皆無名亦名之在樂游之西者讓堂堂北有射柳
南有石高丈餘奇秀可愛實自盧肇故宅徙焉皆城而
東向者曰采珠閣閣後有石亦惟舊廉與讓采香采珠
皆東西相值據城之隅者曰銷暑亭與月臺相屬而差
小者曰風亭其浮有航其絕有梁其登有磴道其周有
續牆南北其門後谿前市山烟水風淵魚林鳥明滅虛
徐浮流下上眺聽之際可以釋幽鬱可以道和粹予以
公事不得自放於其間月或一至再至蓋希矣子猶以
為數也越二年新太守在道予行有口矣因置酒為會
同僚舉觴屬予曰湖亭雖舊而增廣之以至大備者非
君而誰不可以不聞於後蓋文而刻諸金石乎予曰池
館之作耳目之娛非政之急何足道哉然此州自江以
西最為窮處故朝廷往往以有罪者居之予即其人也
或以終年不逢王人出於其塗非數君子相與樂此子何
成民和能無燕嬉之事歟若以罪譴而來又宜有登覽
之美庶幾忘遷謫之累焉繇是而言則茲境也當不廢
也奚取於予文如欲誌其歲時請以斯言刻之至和二
年冬十一
月一日記

宜春縣志

卷一

地理 古蹟

六

附趙汝鎡東湖歌

湖光釀綠春拍塞百雉之東纔咫尺
五步一亭十步榭軒窗處處臨水關

露濃晝暖花溜紅烟嫩堤平草連碧
俯窺萍鱗魚上下
仰聽木杪禽格傑拂拭塵埃讀祖碑
摩挲峰竅憐盧石
中年懷抱多感慨東西跳丸駒過隙
山林鐘鼎同一盡
可笑世網甘形役繞邊吏部真得計
右酒左蟹船中拍
明朝風雨那可料且對湖山醉今夕
祖無擇東湖樂

游堂

晴烟幕幕湛湖光形勝居然占一方
拂水萬絲楊柳弱倚風千蓋芰荷香
縱游閑泛蘭舟穩半醉狂

眠石楊涼公退每來多
李觀東湖

萬象城東雅人詩
半湖雲靄卷殘暉

老龍借雨慵離蟄幽鷺逢人慣不飛
岸僻自宜安釣石

王古東湖清熙閣

選勝開軒俯北城登臨風物有餘清
畫屏疊翠千峯秀玉鑑涵虛一水明

絕境忽逢幽鷺下賞心時覺白雲生
趙資道東湖清

熙閣

滿園桃李繞池阿下瞰長江萬頃波
晝靜無風澄古鑑源深有路接天河
花茵草帶隨堤盛漁唱樵

吟隔岸多政暇閒遊賓
侶賞夕陽歸處引笙歌
西湖在城外西北唐刺史李將順所開以蓄渠水名曰溢
洲塘中留二島曰臥龍上有仁智義政亭二亭歲久

傾圮
淤塞

孚惠聖泉 在宜春臺仰山行祠之下冬夏不竭病者飲之
立愈政和七年州僚張沈為銘壬辰兵後填塞

李渠 唐刺史李將順
開鑿詳渠志

仰山正祠水渠 其源即仰山水分流會於正祠元豐中通
判孫級就上流醵渠分灑入壩深三尺廣

稱之凡八百二十餘丈
澄澈可鑑冬夏不涸

司理院井 在府治東南十步
水重漏壺多用之

雙井 在府治西北茶倉前數步水清
味甘居民爭汲大旱不竭

義井 在府治東集慶坊南唐刺史李將順開鑿又開防虞
池菱池疏理清水池以為火備高熙間州守張杓修

宜春縣志

卷一

明宏治庚申知
府朱華重修

雙清井 舊為龜鼻井在府治東北甘棠坊府學左
畔舊水積庫左濶丈餘內有二小石孔

揚清井 舊為左龜眉井橫二尺長
六尺在府治北達里坊

澄清井 舊為右龜眉井橫同在上在縣
治前文會坊西去西明井十步

東明井 舊為左龜目井濶丈餘在府治東
北隅達里坊西去揚清井三十步

西明井 舊為右龜目井在古開元寺浴院後即今縣治前
三十步文會坊之西舊志云世傳府地形如龜

天罡袁先生於城內鑿龜鼻眉目井以至龜象不專為
為汲亦取克制回祿之意高熙間州守張杓修治歲久
為居民所侵寶慶間州守曹叔遠既復李渠井浚是井
明宏治庚申知府朱華復浚之始亦今名五井歲久俱
於塞康熙戊申知府李芳春詳
查原井挑浚疏通如舊今湮廢

秋家巷井 在府治北百餘步清水池
西其水特重漏壺用之

盧氏弋林在震山之西咸通七年盧肇建

錦繡谷在宜陽門外半里宋元祐初薦李觀知虔州不赴

輿勝覽

太平園在仰山集雲峯下

北墅在城東七里宋鄭居仁建為遊觀之所中有悠然等亭載名勝志

靈應石寶龜在城南仰山正祠

文筆峯在城東五里高九丈明天啟二年知府王猷知縣王嘉賓倡建俱有碑文

附王嘉賓新建文筆峯碑予令宜次年壬戌會新天子豈帖括未遠狎盟中原仰山川靈秀作者南洩待者後興乎往聞之形家龍自南來水從東注層巒疊嶂非不環拱而秀江一派瀉盧洲尾遂北眺則濤抱之脈微貴砥柱之力峻也因相與謀之袁觀察朱明府楊學博諸

宜春縣志

卷一

三

鄉紳及孝廉弟子員咸議建文筆嶺之興數百年所未備并頡頏十二郡以補坤輿之缺乃營度水口山麓築文筆峯九丈屹然中立俾潺湲散漫到此關鎖不惟風氣凝結郡邑嘉賴將毓為人文連翩鶴起繼盧易而大魁天下寶式憑之西江諸邑不推袁狎主齊盟乎哉是役也始於天啟二年孟夏落成於三年季冬諸鄉紳孝廉弟子員不約而同義捐所餘善者陳國鏡等實董其成區區子捐薄俸數十金不過隨郡大人公助後為地方舉塵固有所事何功之有焉始末當別有紀敢授筆纂歲月云爾系以詞曰崔嵬者峯俾彼震方挹茲辛流迴瀾於狂濟濟多士應時其昌於萬斯年邦家之光

附潘士豐文筆峯詩當年按地立基初一柱擎天卓筆如煉石近城封管子花磚向日拜

中書月明雁影傳奇字秋老蛩聲賦子袁克紳筆峯

虛占斷江天風景秀霞箋濃寫雨飛餘野望

詩興未闌聞說使君曾入夢曲江宴罷得餘閒

清卿坊 為明大常卿龍遲立

進士坊 為明龍夔立

天官清署坊 為明吏部主事蕭義立

秋官大夫第 為明寶慶知府前任刑部郎中袁一鼐立

兩臺總憲坊 在南門

都憲坊 在北門外為明蘇松巡撫張鳳立

金榜傳芳坊 為明進士郭叙立

繡衣坊 在南門外明刑部右侍郎郭紳立

喬梓清門坊 在南門為明彭彥克之子光祿署丞彭澄孫廣西布政使夔立

昂霄坊 為萍鄉明舉人黎獻立

宜春縣志 卷一

貫雕坊 為明舉人傅泰立

鳳鳴坊 為分宜明舉人劉儀立

大夫第 在北門上水關為明維摩知州陳巽言立

會魁坊 在西門外為明進士龍靈立

秩隆三獨坊 在北門上水關江南總督邸廷佐為都御史陳之龍立

丹桂坊 在北門外為明知州陳鐔立

綸恩褒顯坊 在府治西為明封浙江道監察御史楊春美立

二傑坊 為明嘉靖壬午舉人龍復禮高祉立

解元坊 在府學東為明郭鵬立

已上舊有坊而今廢者

地理 古蹟

多寶塔 在南門外一里許建年無考
上有胡椒樹至今尚有子墮

擢秀坊 在邑治東七十步李衢膺薦名

熙春坊 在邑治東南近春臺

獎廉坊 在鐵爐巷宋理宗時州守趙鉉
夫以廉聞御賜手詔獎勵故名

三賢坊 在邑治東一百步宋許載王
欽若胡從義講學於此故名

尊賢坊 在邑治東九十步
宋李奇膺薦名

宜陽坊 在邑治東門內

懋仙坊 在邑治東棋盤巷
以唐黃頤登第名

育材坊 在縣治東

桂枝坊 在縣治東南唐
進士易標所居

宜春縣志

卷一

地理 古蹟

三

桂仙坊 在縣治西二十步
以唐王穀登第名

三登坊 在縣治西二十步宋曹傳
與弟藻子遷同登第名

儒林坊 在府學門左

叢桂坊 在邑治西二十步
唐鄭谷登第名

都憲坊 為萍鄉明僉都
御史張文昭立

司諫坊 為明都給事
中劉聰立

世恩坊 為明同知
劉衛立

都憲第 江西巡撫蔡士英為
都御史陳之龍立

中丞第 為明鄖陽巡
撫高琬立

大司馬第 為明兵部左侍
郎袁繼咸立

三元坊 在府學明知府鄭停典為唐狀元宜春盧肇易重明會元分宜黃子澄明解元宜春郭鵬分宜易安

立器

江袁首邑坊 在縣前

保愛坊 在縣治東

綏猷坊 在縣治西

遠尊坊 為分宜明少師嚴嵩立

龍飛四雋坊 在東門為明萬歷癸酉舉人宜春朱廷諫分宜宋希堯彭士遠萬載唐應試立

兩闈四彥坊 在東門為明舉人宜春順天中式朱志本省中式宜春袁業泗揚國章萬載張以宗立

清朝人瑞坊 在東門為明梁封大恭人年百歲袁母黃氏立即業濂業泗業渠之母刻人瑞集姪孫繼

引咸

宜春縣志

卷一

地理 古蹟

三

秋鶚雙飛坊 在東門為明舉人宜春潘懋勳萍鄉喻以達立 按以達姓喻府志誤周

進士坊 在東門為明易可夙立

進士坊 在東門外為進士分宜宋希堯萍鄉簡繼芳立

雙鶚搏霄坊 在東門外為明萬歷丙子舉人宜春袁業濂萬載張璧立

聚奎坊 在東門外為明萬歷己卯舉人宜春彭學夔分宜嚴堯武宋希張萍鄉吳三益萬載彭自新立

桂史坊 在北外廟為明進士楊衍慶立

疏泉坊 在邑治東判官巷因疏西陂水名

論恩坊 在府城東南

集仙坊 在邑治東以唐盧肇為集賢學士名

重光坊 在邑治北唐魯受易重同稱此會昌五年並擢稱利因名

逍遙坊

在邑治東唐韋無強隱居其地郡守董禎名坊以旌之

集慶坊

在邑治西北六十步以唐刺史韓愈守邠慶雲見於西北名

通泉坊

在邑治北七步落驢巷

貢賢坊

在邑西北本名積慶唐蔣肱居此擢進士第四名

秀水坊

在比城下巷口

狀元坊

在袁山門外唐盧肇舊宅上

永安坊

在邑治北城下

高士坊

在邑治北城外因漢袁京名

祥應坊

在門南

阜通坊

在門北

宜春縣志

卷一

地理 古蹟

三

相儒坊

因唐李德裕名

飛騰坊

在北門外為明舉人朱鑾立

文明坊

在學前

蕃宣坊

在布政分司前

澄清坊

在按察分司前

進士坊

為明袁魯訓立

鳴珂坊

在北外廂為明工部左侍郎分宜嚴世蕃父子立

賜輿坊

在袁山門外為明少師分宜嚴嵩上賜內苑乘輿立

內臺風憲坊

在江北嶺為明河南道監察御史何傑立

龍門接武坊

在北門外為國朝接貢應侍衛陳傑立

奕葉重榮坊 在北門外為明選貢

大憲臬坊 在江北嶺為明進士楊以誠立

金榜題名坊 在岡比嶺為明進士何爾立

迎恩坊 在東門外大較場宏治十五年建

貞節坊 在北門外石神巷內有奉萱堂為州同楊伯憲妻周氏立

判官巷 在府學右因通判署在巷內故名今存

鈔庫巷 在府學左

銅壺井巷 在謙樓下

菱池巷 在府學前

顏家嶺巷 在府學前菱池巷內天符廟側對門

宜春縣志

卷一

地理

古蹟

三

廂院巷 宋寶慶間廂民立院以聽公務

登雲巷 府治西舊有登瀛巷未知即此否

榮封巷 在宜春臺下即沙子巷唐西平王子李憲居此歷千餘年咸豐間為賊拆燬今其子孫即故址建祠

祀之

丁竹巷

萬家巷 在東門

蔡家巷 在十字街

王子巷 在東門因祠宜春王子故名今存

落驢巷 在東門以唐彭伉落驢名

新街巷

觀音巷 在報恩寺前

丹桂巷 在城隍廟前

盧祝巷 在北門城下以盧祝廟名今存

神岡嶺巷 在南門街

孚通巷 在府署左又名二府巷

已上亦有廢而名存者

宜春縣志

卷一

地理

古蹟

三四

風俗

宜陽山高水清好尚儒雅有豪傑之士羅秀序事簡民

醕輿地志講誦為業士尚氣節晉書藝文儒術為

盛杜氏通典風土爽塏山川特秀家給人足多尚黃

老清淨之教樂於隱遁有徐孺子遺風與隆興吉州同

寰宇記士好經學諷誦之聲有若齊魯晉傳故家

遺俗皆知尚氣節畏清議隋地理志士力學知廉恥

民樂耕好儉嗇阮閱無訟堂記賦稅及時間里無事

韓愈謝表土俗愿樸汪應辰序士夫秀而文細民

險而健黃庭堅賦士人好恬靜勵廉隅布衣蔬食不

宜春縣志

卷一

地理 風俗

人公府終歲不至長吏之庭張棫志江南火耕水耨

食魚與稻以漁獵為業雖無蓄積亦無饑餒其俗信巫

鬼好淫祀君子善居室小人勤稼穡隋地理志風氣

茂密城郭完固人力田勤生業粳稻魚笱果蔬之利足

以自資故重違其鄉載府志元旦行獻歲禮家尚慶

賀人日俗呼上七日食羹湯上元張燈家設酒茗極

絲竹管絃之樂是日農家將除夕紙束供神之米作

窩糍十二簽載月分蒸熟撒看糍窩水色以占每月雨

水多寡輒應清明具牲醪紙錢掃墓惟新墳無得過

社日五月五日蚤設治龔酒具角黍懸蒲艾舟人競

渡爲樂 中元祀先祖焚冥資僧寺多設盂蘭會 中
秋以月餅相饋遺夜具果餅賞月兒童燒瓦埕用冬青
樹枝繫楮條焰火爲楊梅燈束藁然香爲火龍燈戲
除夕守歲飲屠蘇酒放爆竹擊鼓鳴鑼以待雞鳴曰迎
歲 村婦之勞甚於男子井曰無餘閒農時鷄鳴起治
中饋日中盪餉夜業麻杲雖士夫之婦多手自紡織縫
紉罕有寺觀之遊風最近古 丈夫初舉子卽日以鷄
酒饋外家謂之報庚外家以猪羊襦襖衣被相送謂之
送三朝受賀宴客先上飯於家廟告以生月日時及乳
名謂之燒三朝是日用香湯浴兒煮鷄子以相餉謂之

宜春縣志

卷一

地理 風俗

二

洗三朝 邑人重譜牒無數十年不修者同姓異宗必
嚴辨之且有同宗而異譜者不妄援達官不輕錄養子
猶爲風氣之古 冠禮人廢惟女子于歸日行笄禮謂
之尙頭問名納采豐儉稱家納吉謂之下聘蒲節及歲
杪各饋遺一次謂之大勞節卽古納徵意成婚前一
日男宴媒氏綵輿迎導詰朝女繡帕蒙頭升輿男不親迎
女到門割雞灑血曰斷煞擇夫婦元配多子孫者揭與
羣男女交拜訖入洞房庭宴客夜飲酒半擇賓燃花燭
賓讚送新郎入房合卺曰交杯賓朋歌舞房中曰鬧房
擇賓立高處手撒五穀果食曰撒帳次日壻冠婦帔出

拜祖先卽古廟見遺意次拜翁姑尊長及諸姻親禮畢
遞果品傳茶謂之拜茶婿至外家曰過門外家隆禮設
宴以迎曰接新客 聘缺六禮童時迎歸者謂之童養
媳及長告知二姓族親始成婚先是男女以兄妹相呼
女稱翁姑曰父母

喪禮 人始死治殯具擇殯期殮畢曰三哭三奠葬無
常期惟聽日者言弔日亦無常期擇日致訃曰聞香主
人當席謝弔三年服闋延僧巫建醮焚紙馬靈床曰除
靈今士大夫家多從家禮黜僧巫與俗不同

祭禮 諸 姓皆有祠祠有祭田祭期率以清明冬至

宜春縣志

卷一

地理 風俗

三

或中元節及臘長小年日族人咸聚尊卑長幼秩然亦
有非紳士不得與執事者主祭或用族長名以子弟代
行禮或以達者主之受胙頒胙如儀祭畢合族燕飲祭
田有滋息至百千畝者讀書者給膏火歲科鄉會試厚
資助之荒年量所收計戶分穀以勵讀書養貧乏尤有
古義田之遺意云

物產

穀屬

五月早 大粘 鬚粘 贛州早 團穀早 以
上皆早稻 了粘 二禾粘 冬粘 八月白
觀音秈 硬頭紅 鐵脚粘 以上皆晚稻 又有早穀

陸地可種

糯穀 早糯 種子糯 白殼糯 矮脚糯
燕口糯 鴨婆糯 重陽糯

麥屬

大麥 穀麥 米麥 小麥 蕎麥 苦蕎麥
粘粟 糯粟 黍子粟 草子粟 鷹爪粟

菽屬

黃豆 黑豆 青豆 早豆 六月爆 晚豆 紅
綠豆 絳豆 豌豆 派豆 蛾眉豆 刀豆

蔬屬

薑 菘 芥 芹 蕪菜 韭 葱 蒜 薤 蕹
菜 荳蔻 黃芽菜 薯蕷 蒿苳 園荳 茨菜 甜
冬筍 豆角 茄 莧 冬莧 石耳 玉版筍 春筍
鞭筍 菱筍 蕨 蘿蔔 油菜 藟粟菜

宜春縣志

卷一

瓠瓜

百合 苦蕒 苧蒿 茵菰 辣椒 南瓜
甜瓜 東瓜 稍瓜 黃瓜 絲瓜 芳瓜 苦瓜

果屬

桃 李 梅 銀杏 楊梅 石榴 梨 棗 榛
栗 茅栗 柿 枇杷 橙 橘 香櫞 蓮子
柑 金橘 芡 木瓜 荔枝 西瓜 蓮蓬

木屬

松 杉 柏 柳 楸 楠 柞 梧桐 桐 榆
樟 檀 杉 檜 椿 槐 柘 柘 黃楊 棕
茶 羅漢松 烏柏 冬青 山寮 金絲柘 楓
杞 桑 椴栗 牛筋木 黃荆 皂莢

竹屬

筍竹 苦竹 斑竹 甘竹 方竹 義竹 淡竹
煙筒竹 篁竹 紫竹 綠竹 毛竹 菰竹 實
竹 慈竹 天竹 白竹 石竹 扁竹

花屬

牡丹 芍藥 蘭 西番蓮 山礬 木蓮
真珠 水仙 觀音蓮 茉莉 棠棣 珍珠蘭
仙人掌 玉蕊 海棠 蓮 含笑 芙蓉 櫻桃
蜀葵 玉蕊 海棠 蓮 含笑 芙蓉 櫻桃
秋羅 秋牡丹 紅蛺蝶 菊 茶蘼 綠萼 山茶 剪
一丈紅 梔子 月月桂 千葉石榴 紫薇 錦帶 木樨

